


WANTOK

Great Quality

Affordable Price

Niuspepa bilong yumi ol PNG stret!



Wan Wik,

Jenuari 6 - 12, 2005

NAMBA 1590

K1 tasol



Ol Niu yia poto insait long pes 24



PNG i stat helpim Esia

Taim olgeta kantri long wol i wok long givim helpim na sapot i go long moa long planti milien manmeri husat i kisim bagarap long birua bilong solwara long Esia, Papua Niugini tu i statim wok bilong bungim mani na helpim tu. Planti milien pipel i kisim bagarap long skin na bodi, ol haus na ol kago bilong ol i lus na bagarap nabaut pinis. Inap long Tunde aste, samting olsem 145,000 pipel i bin dai tasol planti tausen i lus yet na ol atoriti i wok long painim yet. Dispela em i wanpela bikpela birua bilong solwara long dispela taim.

Long dispela wik ekting Prait Minista Sam Akotai i tokaut olsem gavman i redim K2 milien bilong givim i go long ol kantri we i kisim birua tasol bai i nogat stop bilong helpim PNG bai givim. Bikos wok bilong stretim ol lain i kisim bagarap na stretim ol ples i bagarap bai i go het yet na helpim bilong PNG i mas go het yet.

Ripot i kamap pinis olsem moa long 115,000 manmeri i bin dai na ol i ting namba bilong dai i wok long go antap yet bihain long solwara i brukim ol ples long Indonesia, Tailan, India na Sri Lanka long nu yia taim stret.

Long PNG nau i gat 4-pela grup i kamap pinis bilong bungim ol mani na helpim ol pipel, bisnis na komyuniti laik givim. Ol dispela grup em; Aceh Tsuanmi relief, Caritas PNG, Sri Lankan Community, National Government Tsuanmi appeal, na Red Cross PNG.

Mista Akotai i tok taim ol pipel bilong PNG bai i go het long bungim ol helpim bilong ol,

...Gavman askim olgeta pipel long helpim

Gavman i wok long toktok tu long salim sampela wokmanmeri bilong mipela olsem ol dokta i go long wok wantaim ol arapela dokta na helpim lain bilong arapela kantri long ol hap we i bagarap long solwara. Bai ol i stretim wanpela polisi pepa long dispela liklik taim, em i tok.

Taim Mista Akotai i tokaut long dispela helpim bilong PNG, em i tokaut tu olsem i bin gat sampela Papua Niugini husat i bin go mekim wok yut long Tailan na dispela birua bilong solwara i kamap. Tasol ol i ring i kam na tokaut olsem olgeta i stap orait.

Wanpela ripot bilong UNICEF opis i tokaut olsem em i redi long salim ol tisa bilong go wok wantaim ol skul pikinini husat i stap long dispela birua. Planti pikinini i stap wantaim pret long dispela birua na tu planti pikinini i lusim ol papamama na ol famili memba bilong ol na tingting bilong ol i no inap stap gut.

UNICEF ripot i tok bai ol tisa i go wok klostu wantaim ol pikinini taim ol arapela i wok long stretim gut ol klasrum na ol samting bilong ol pikinini i ken yusim long lainim samting.

Long dispela taim em planti lain haus na ples bilong ol i bagarap em ol i stap long ol banis na hap olsem skul eria na sios eria o hap we ol pipel i ken bung na stap long en.


Taim olgeta lain i kamapim ol rot bilong pulim mani na bungim ol helpim, televisen kampani

long Papua Niugini, EMTV bai givim fri toksave bilong Gavana Jenerel Sir Paulius Matane long ol toktok bilong sunami long Esia na wanem samting mipela i mas mekim long helpim. Sir Paulius bai mekim toktok makim PNG Red Cross.

EMTV i tokaut olsem olgeta toktok bilong Sir Paulius bai ron fri wantaim olgeta akaun namba bilong ol benk we ol pipel i ken putim mani i go insait long en long go long dispela bagarap long Esia.

Wantaim tu bai EMTV i soim wanpela bikpela kriket gem namei long Australia na Sri Lanka we tupela tim wantaim i kamapim mani bilong givim i go long dispela bagarap bilong sunami long Esia. Ol bisnis komesel o edvetismen we i kamap long dispela TV so bai EMTV i bungim na putim i go tu long Red Cross long bungim ol helpim na sapot ol pipel bilong PNG i givim.

Namba bilong ol lain i dai we ol i kaunim i kamap inap long Tunde aste. Tasol ol i wok long painim tausen yet bikos nem bilong ol i no kamap klia yet na ol i putim olsem ol lain i lus yet.



• Wanpela medikel wokman bilong Nevi bilong Amerika i karim wanpela yangpela meri husat i bin kisim bagarap long sunami i go antap long wanpela helikopta bilong Amerika long ples balus long Banda Aceh, Indonesia, long Jenuari 4, 2005. Foto: Yuriko Nakao/Reuters


Namba bilong dai i go yet

Malaysia	68
Bangladesh	2
Somalia	176
Tanzania	10
Kenya	1
Total	145,606

* India i gat 6,123 i lus yet. Atoriti i ting ol i dai. Arapela kantri igat moa long 2 na 4,000 manmeri i lus yet we atoriti iting ol i dai pinis. Tasol ol i wok hat yet long painim bodi.

Indonesia	94,100
Sri Lanka	30,196
India	15,694
Thailand	5,187
Myanmar	90
Maldives	82

WIDE VARIETY
OF HYBRID
VEGETABLE
SEEDS



IDEAL TIME FOR PLANTING YOUR FAVOURITE VEGETABLE SEEDS

Brian Bell
Shop with a friend

PLAZA 105-111 HOME CENTRE CITY, GORDONS 025 8469 LAE HOMECENTRE CITY 472 0200

DISCOUNT HAUS 472 3806 GOROKA 730 1622 KOKOPO 582 0027 MT HAGEN 542 1090 MADANG 642 1890

Polis Ripot

Bogenvil:

Bogenvil i bin gat isi na gutpela Niu Yia na Krismas, Buka Polis opis i tok.

Ol pipel i bin stap wantaim ol famili na selebret wantaim na tu, ol bin stap insait long ol sios sevis. Opis i tok Bogenvil i bin gat gutpela Krismas na Niu Yia selebren bikos long ol sios yut reli ol bin holim bipo na long taim bilong Krismas na Niu yia, ol spot pilai ol bin holim long dispela taim na wok bilong PNG na Australia polis.

Polis ripot i tok polis i bin holim pasim sampela lain long ol liklik meknais long dring hombru na dring long pablik ples olsem long nambis eria.

Ripot i tok olgeta sios i gat insait long em Katolik, Yunaitet, Seven De na ol arapela moa i bin gat ol lain bilong ol insait long ol preia reli.

Ripot i tok tu olsem ol Bogenvil polis i wok gut long daunim lo na oda hevi long olgeta hap bilong ailan na dispela tu i kamapim gut lo na oda insait long ol komyniti na provins.

Ripot i tok tu olsem hombru i no bikpela hevi nau na ol yangpela man i no dring spak na wokim ol longlong pasin olsem long bipo.

Ripot i tok tu olsem ol polis manmeri bilong Australia i givim gutpela helpim tru na wanpela long ol eria em sapat long sait bilong transpot we i mekim wok i go gut.

Manus:

Ol pipel bilong Manus i bin gat gutpela Nu Yia na Krismas, Provinsef Polis Komanda Inspekta Alex Ndrasal i tok.

Em i tok olgeta lain i amamas long selebretim gut tupela bikpela de long olgeta hap bilong Manus na bikpela tok tenkyu i go long ol polisman husat i bin wok hat tru long holim spesel polis operesen na mekim Nu Yia na krismas long provins i kamap gut.

Inspekta Ndrasal i tok long nait bipo long Nu Yia, i bin gat wanpela trabel long reipim o bagarapim meri i bin kamap long Pere viles we i stap long saut kos bilong Manus.

Inspekta Ndrasal i tok polis holim pasim pinis saspek husat i bin wokim dispela pasin long wanpela yangpela meri.

Polis ripot i tok yangpela meri i gat 19 krismas i bin stap long haus kuk na man i bin go insait long hap 6 samting long nait bilong Disemba 31 na bagarapim em.

Em i tok tu olsem namel long Krismas na Nu Yia, polis i bin holim pasim 70 pipel long wokim ol liklik trabel olsem dringim hombru, wokim nabaut long narapela, brukim lo bilong trafik na redim o go insait long setelmen long kisim ol trabel man i brukim lo.

Lae:

LAE siti insait long Morobe provins i bin gat gutpela na kwait Krismas na Nu Yia. Polis ripot i tok. Tasol polis i bin holim pasim na mekim ol man i brukim trafik lo fain o mekim save mani we i bin winim K30,000.

Ekting bos bilong ol polis insait long siti em, Superintenden Leo Lamei i tok polis i bin holim 36 pipel namel long Krismas na Nu Yia long brukim trafik lo.

Inspekta Lamei i tok polis i bin kisim K30,000 long ol man i brukim trafik lo namel long Krismas na Nu Yia.

Niu Yia i kamap gut

Desney Koimo i raitim

Ol polis insait long Pot Mosbi siti i mekim wanpela bikpela wokabaut long dispela Niu Yia wiken we i lukim ol i holim 8-pela man taim ol i laik mekim stil pasin.

Planti polis olsem Royel Papua Niugini Konstebuleri (RPNGC), Australian Asisting Polis AAP na Mobait Skwad i stap insait long dispela wokabaut.

Namel long ol, em tupela kalabus husat i bin ronawe long Boroko sel long Disemba bilong 2004. Asisten Komisina bilong Polis Tony Wagambie i tok dispela

...Gutpela wok bilong polis bilong PNG na Australia

wokabaut em ol mekim bilong lukluk i go insait long ol kainkain ol stil pasin we ol stilman i yusim ol bikpela na strongpela gan.

Polis i bin kisim tu wanpela RPNGC yunifom wantaim wanpela AR16 gan bilong ol ami we i gat 14 raun bilong katres i stap insait. Ol polis i no save yet long wanem rot ol dispela man i kisim dispela gan.

Long dispela nait yet ol polis i bin holim

wanpela ka we ol dispela 8-pela man i laik yusim long stil pasin bilong ol.

Dispela ol lain husat ol i kisim em ol i sasim ol pinis long ol kainkain samting stat long pasin stil, ronawe, haitim gan, stilim ka na helpim arapela long ronawe.

Wanpela polis bilong RPNGC husat i bin helpim wanpela man husat i stap insait long Boroko sel long ronowe, em tu i stap long sel.

Mista Wagambie i tok bikpela wok bung namel long ol AAP na RPNGC i kamapim gutpela wok na mekim planti pipel i amamas.

Tupela opisa bilong Australia kamap long helpim PNGCS

Andrew Molen i raitim

PAPUA Niugini Koreksenen Sevis i kisim bikpela helpim long stretim dipatmen bilong em taim em i kisim tupela opisa bilong Australia long i kam wok wantaim ol.

Tasol dispela tupela aninit long dispela Enhens Koperesen Program (ECP) bai

i no inap kam inap long mun Febuari dispela yia.

Deputi Komisina operesen Kelly Karella i tok ol i kisim dispela tupela opisa i kam long kantri aninit long ECP.

"Long plen we mipela i gat nau, wanpela opisa bai i wok olsem operesen menesa na narapela bai i wok olsem Projek

menesa," Mista Karella i tok.

Operesens menesa bai i stap long Pot Mosbi na projek menesa bai i stap long Lae na taim ol i stap long dispela ol wok, ol bai helpim tu long ol narapela insitusen insait long provins na rijon tu.

Mista Karella i tok tu olsem em i gutpela long dispela tupela opisa i kam bilong

wanem PNGCS i wok long mekim sampela senis na tupela bai i ken helpim.

"Ol posisen tupela bai i kisim em ol 'in line' posisen.

"As bilong dispela em olsem ol bai kisim na givim oda olsem PNGCS i tokim ol long en," Mista Karella i tok.

Wok i wok long go het yet.

Klinim gut taun na ples - Sir Paulias

Maisan Pahun i raitim

NIU yia toktok bilong Gavana Jenerel (GG) Sir Paulias Matane i olsem em i mas toksave yet long ol pipel bilong Papua Niugini long tus tingting long ol samting bilong 2004 na stat lainim ol gutpela tingting na pasin long 2005.

Kain pasin olsem korapsen na les long wok i bikpela pasin nogut long laip bilong planti manmeri insait long kantri. Planti ol pablik sevens i save wokim wok bilong helpim ol yet na famili bilong ol i no stret. "Kain pasin i save kamapim lo na oda problem, kros insait long famili kain pasin i mas senis," Sir Paulias Matane i tok.

GG i kamapim ol bikpela toktok olsem pasin bilong laikim wanpela na narapela, lukaut long ol narapela, rispek long ol narapela, wok hat na givim yu yet long wanpela na ol narapela i bikpela samting.

Sir Paulias Matane i tok strong tru long ol mammeri long Papua Niugini i mas lainim long noken tromoi ol rabis. "Ol i mas lainim long tromoi rabis long rait hap. Dispela em long kamapim klin ol taun, siti, na tu ol ples long stat bilong 2005," Sir Paulias Matane i tok.

Pasin bilong tromoi ol plastik pipia na pepa i bikpela tru insait long ol

taun na siti bilong Kantri PNG. Dispela i wanpela bikpela hevi stret we bipo yet i stap na nau i kamap olsem pasin bilong olgeta manmeri insait long kantri. Kain samting i mekim na nau gavman tu i tok tambu long ol stua na fektori long wokim na yusim ol plastik beg insait long PNG stat long dispela yia 2005.

Sapos ol manmeri i lainim long tromoi ol rabis na pipia long raitpela hap bai kantri bilong yumi i luk naispela. GG i bin toktok strong tru olsem dispela yia ol pasin bilong ol manmeri i mas senis na tu em i toktok strong i go long ol pablik sevens long wokim gut wok bilong ol.

85 pesen (%) ol manmeri o populesen bilong Papua Niugini i save kisim sevis i kam long gavman na ol pablik sevens i save wokim ol dispela wok. Stat long dispela yia GG i tok ol Pablik sevens i mas wokim stret wok bilong ol. Ol i mas noken wokim wok bilong helpim ol yet na famili bilong ol.

Plantil ol sevis i no save go long ol ples insait long kantri bikos ol sampela pablik sevens i les lain stret na save stap tasol na kism pei tasol. Na tu pasin long wok wantaim taim em GG i tok em bai toktok yet i go inap ol wokmanmeri i klia olsem taim em i bikpela samting lon wol tude.

Namba bilong AAP bai go antap moa

Desney Koimo i raitim

NAMBA bilong olgeta Australian Asisting Polis (AAP) husat bai kam insait long kantri long wok bung wantaim ol polis bilong Papua Niugini bai kamap olsem 210 bihain long sampela mun i kam.

CID Sief Inspekta Peter Guinness i tok dispela i stap aninit long ECP we bai lukim dispela bikpela namba bilong ol Australian Polis bai kam insait long kantri.

Mista Guinness i tok nau yet i gat 76 AAP polis i stap insait long Pot Mosbi na 19 i stap long Bogenvil. Klostu olsem 17 na 20 polis kar em ol i kisim i kam wantaim ol long Papua Niugini na bai stap long Gordons Polis stesen olsem ples bilong wok.


"Namel long ol mun i kam bai dispela ol arapela polis bai kam olsem 30 grup long wanem ol bai go aninit gen long narapela trening long Bomana olsem ol namba wan lain i bin mekim" em i tok.

Dispela ol AAP polis em bai ol i stap tasol long Pot Mosbi na Bogenvil na bai i no inap go aut long ol narapela provins.

Nau yet ol i statim wanpela nupela wok bilong stretim ol polis kar bilong RPNGC we bai lukim ol i putim ol het lait bilong wok long nait.

Taim ol niustlain i bin askim long sekyuriti bilong ol AAP, Mista Guinness i tok sekyuriti bilong ol AAP i bikpela samting tasol Papua Niugini i no wankain olsem Solomon Ailans na ol bai wok yet long dispela samting. Tasol em i tok AAP bai bihainim olgeta Lo aninit long Lo bilong Papua Niugini.

Plantil manmeri i amamas long wok ol dispela polis bilong Australia i wok long mekim wantaim ol polis bilong PNG yet na ol i wok long lukim ol liklik senis i kamap.



Planti grup bilong sunami apil

Maisan Pahun i raitim

WANPELA bikman bilong Pacific Environment Network bilong Papua Niugini i no amamas long planti Sunami apil fand draiv i wok long kamap insait long kantri. Nau yet i gat 4-pela ogenaiesesen i karim aut fanresing na ol manmeri na kampani i paul husat stret bai i ol i givim mani bilong ol i go long helpim ol lain kisim bagarap long Esia.

Mera Mine i siaman bilong Pacific Environment Network long Papua Niugini na Pasifik i bin kam lukim *Wantok Niuspepa* na autim dispela hevi i tok i gat 5-pela ogenaiesesen na dispela bai wokim planti manmeri na ol kampani i paul.

"Nau yet i gat Aceh Tsunami relief, Caritas PNG, Sri Lankan Community, National Government Tsunami appeal, na Red Cross PNG - man husat stret bai mipela i givim mani bilong mipela i go long helpim ol lain i kisim bagarap," Mera Mine i tok.

Ol narapela tripela ogenaiesesen olsem Caritas PNG, Sri

... husat tru bai ol pipel givim putim mani long?

Lankan Community na Red Cross PNG i orait bikos ol i gat hetkota bilong ol i stap long ovasis we bai helpim long salim mani i go long ol ples i bagarap.

Tasol PNG pablik long hia i mas gat wanpela bikpela apil draiv we olgeta manmeri i mas givim mani i go insait na salim i go long ol bikpela ogenaiesesen husat i go pas long helpim ol lain long Saut Is Esia olsem Oxfam relief Fund, United Nations relief fund na Red Cross Federation.

"Mi laikim Gavman i kamapim wanpela kontribusen apil na kolim "Civil Society of PNG" we dispela bai i makim maus bilong olgeta manmeri insait long kantri na i no wanwan grup o ogenaiesesen. Nau yet mipela i paul olsem wanem grup i gutpela,

wanem grup bai i lukaufim gut mani o hau bai mipela givim olsem K1 o liklik helpim nambaut," Mera Mine i tok.

Sapos ol bikman bilong PNG i gat tingting long kamapim kain samting ol i mas kamapim wanpela bikpela Sunami rilif fund akaunt insait long wanwan BSP benk long kantri bai dispela i klia long ol manmeri bilong Papua Niugini long givim helpim bilong ol.

"Sapos Gavman na Bank South Pacific i kamap wantaim wanpela agrimen na yusim ol BSP benk long wanwan senta long putim bokis na tok putim K1 long helpim ol lain kisim bagarap long Sunami. Traim tingim populesen bilong PNG, sapos 4.5 milien i givim bai kantri i ken kisim K4.5 milien i go long helpim ol lain long Saut Is Esia," em i tok.

Nau yet i gat 5-pela fand apil i long kantri we i wokim ol manmeri i paul bai ol i givim mani na ol klos samting i go long husait stret long halivim ol lain i kisim bagarap long Sunami. Kain tingting bilong Mera Mine i gutpela sapos Gavman i bin bihainim bipo yet taim nius i kamap long ol lain i kisim bagarap.



Blesing...Membra bilong Wabeg Open, Sam Abel, i kisim blesing long lotu bihain long em i winim bai ileksen long las mun. Foto: FR PHILLIP GIBBS

Papua Niugini mas helpim ol lain i kisim bagarap

Maisan Pahun i raitim

OLGETA manmeri bilong Papua Niugini i mas givim helpim igo long ol pipel long Saut Is Esia husat i bin kisim bikpela bagarap taim Sunami i bagarapim ples bilong ol na moa long 150 tausen manmeri i bin dai. Nau yet i gat planti manmeri moa i lus we oli no painim ol yet na tu planti lain i nogat gutpela haus long slip na kaikai na wara long kisim.

Planti kantri long Esia rijon i bin givim mani na helpim long laik bilong ol yet taim Papua Niugini i painim bikpela hevi olsem taim maunten i bin pairap long Rabaul long 1994, Sunami disasta long Aitape long 1998, na tu helpim i bin kam taim maunten i bin pairap long Manam Ailan long las mun.

Planti kantri i bin helpim PNG long ol dispela taim nogut. Helpim bilong ol i save kam insait long ogenaiesesen olsem Red Cross PNG na Red Crescent Movement. Olsem na nau em i taim bilong bekim na Gavana Jenerel (GG) yet i go pas long dispela PNG Red Cross Society East Asia Tsunami Appeal we i stat long Januari 5 igo inap dei namba 31.

Dispela apil i bilong husat manmeri, kampani, grup o ogenaiesesen i laik givim helpim mani igo long ol kantri i kisim bagarap long Sunami i ken putim mani i go insait long wanpela akaun long Westpac Benk.

Red Cross Society bilong PNG bai i givim helpim

mani i go long International Federation of Red Cross na Red Crescent Societies we bai ol i salim i go long ol ples we i kisim bagarap long Sunami.

Petron bilong Red Cross PNG Sir Paulias Matane taim opim dispela apil i tok olsem olgeta manmeri bilong PNG i mas lainim long givim nating helpim i go long ol lain i kism bagarap long taim nogut bikos papa God i save givim blesim long ol lain helpim ol narapela.

"Nau em i taim bilong yumi long helpim ol narapela husait i painim hevi, na tingim tu olsem dispela bai i bekim helpim ol narapela kantri i bin givim yumi taim PNG i bin bringim kain hevi bipo," Sir Paulias Matane i tok.

Planti manmeri i kisim bagarap i stap long kantri olsem Sri Lanka, Indonesia, India, Thailand, Maldives, Malaysia, Burma, na Bangladesh.

Dispela Sunami i bin bagarapim sampela kantri tu long Afrika olsem Tanzania, Somalia, Seychelles na Kenya.

Sunami i bin kamap taim bikpela graun guria i kamap long ailan Sumatra long Indonesia we i wokim solwara i kirap na bagarapim ol ples.

Husat i laik givim mani i go long Red Cross PNG em het tok bilong dispela apil em "People Helping People" i ken putim mani i go long Westpac POM Branch Account No. 6000 947066.

Neville tok Siune i bagarapim dipatmen

Andrew Molen i raitim

MINISTA bilong dipatmen bilong Agrikalsa na Laivstok (DAL), Mathew Siune i save bagarapim ol plen bilong Gavman long strongim kantri long sait bilong agrikalsa na em i no gutpela long holim dispela opis olsem na em i mas risain.

Dispela singaut i kam long Gavana bilong Milen Be provins, Tim Neville long Tunde dispela wik bihain long em i kisim wanpela leta i kam long seketeri bilong DAL Mathewwela Kanua olsem Mista Siune i wokim planti wok long baksait bilong seketeri we em i no save long em na planti taim em i pretim Mista Kanua olsem em bai rausim em olsem seketeri bilong dipatmen.

"Em i save tok nogut long ol wokmanmeri na bagarapim stret olsem ol dok o enimol.

Insait long leta Mista Kanua i tokim Mista Siune olsem em i no amamas long em i tok nogutim tupela junia opisa bilong em na em yet tu na em i lukim olsem dispela i wanpela bikpela samting tru.

"Mipela inap pinis long dispela ol pasin bilong yu long pretim na tok nogutim mipela olgeta taim.

"Sapos yu i gat sampela kain hevi orait yu kam taim yu i no ring na bai yumi traime

painim sampela rot long stretim wari bilong yu," Mista Kanua i tokim Mista Siune long leta ya.

Long wankain taim Mista Kanua i askim Mista Siune long kisim tingting bilong em long mekim ol wok bilong gavman na em yet i noken go na mekim wok wantaim ol narapela junia wokmanmeri bilong dipatmen.

"Dispela kain pasin bai i no inap helpim dipatmen long wok gut na helpim ron bilong kantri," Mista Neville i tok.

Em i tok Gavman i gat plen long strongim kantri long sait bilong agrikalsa we ol i kolim "Green Revolution" tasol planti samting ol i askim long em i no save kamap bilong wanem Mista Siune i save rausim ol.

"Agrikalsa em i wanpela samting we planti ol narapela kantri insait long wol i kirapim ikononi bilong ol long em bilong wanem em i no olsem gumi, petrol, oil na ol narapela samting yumi kisim long graun bilong wanem ol samting bilong agrikalsa i no save pinis," Mista Neville i tok.

"Mi singaut long Praim Minista long saspenim minista bilong Agrikalsa na sampela wok painimaut i mas kamap long em bikos we bilong em i no helpim polisi bilong Gavman," Mista Neville i tok.

43 manki mekim HIV AIDS aweanes kamap long Pot Mosbi

Desney Koimo i raitim

NAMBA olsem 43 manki bilong Lae Morobe provins i stap nau long Pot Mosbi bihainim wanpela bikpela wokabaut bilong ol long bringim aweanes bilong HIV AIDS i go long ol ples we nius i no go long en.

Dispela ol yut bilong Lae i bin ron long baisikel i go olsem long Wau, Kaintiba na i kam daun olsem long Kerema na kamap long Mosbi.

Siaman bilong Eda Ranu Timothy Bonga i bung wantaim ol na givim wanpela sek mani olsem K1, 200 i go long ol long helpim ol long stretim ol baisikel na baim liklik kaikai bilong kisim i go wantaim ol taim ol i mekim narapela hap bilong wokabaut bilong ol i go bek long Lae.

Mista Bonga i tok amamas long ol dispela yut long kirap long laik bilong ol yet na mekim dispela wokabaut bilong soim olgeta manmeri insait long Papua Niugini olsem HIV AIDS i wok long bagarapim laip bilong ol manmeri na pikinini.

"Yupela i soim mipela olsem maski yu wanem kain man, HIV AIDS i stap pinis long kantri na wok long bagarapim plan-

ti laip" Mista Bona i tok.

Jay Simoi husat i lida bilong ol dispela grup manki i kisim sek mani na i tok mak ol i laik winim em long ronim baisikel raunim PNG na bringim awanes bilong HIV AIDS i go long olgeta manmeri. "Dispela sek mani bai helpim mipela long stretim ol baisikel bilong mipela long ron ken i go long Alotau, Popondetta na kamap gen long Lae" em i tok.

Nau yet ol i slip long wanpela trening senta bilong Lady Carol Kidu long Koki na bai stap pastaim long mekim wanpela fanresing bilong helpim ol lain husat sunami i bin bagarapim ples bilong ol.

HIV AIDS em i wanpela bikpela hevi long PNG na i kisim pinis luksave bilong Gavman.

Ol i luksave olsem ol manmeri i mas wok bung wantaim long stapim dispela sik long i kamap bikpela moa na bagarapim kantri.

Ol kain ogenaiesesen we i save helpim pait egensim dispela sik nogut em Nesenel AIDS Kaunsel (NAC) na planti arapela non gavman ogenaiesesen na ol sios.

Wok i wok long go het yet long daunim dispela sik nogut.

Hap Hap Nius

Dion laikim ol opisa long wok hat

Gavana bilong Is Nu Briten provins Leo Dion i laikim bai ol pablik seven insait long provins i mas wok hat long dispela yia. Mista Dion i bin mekim dispela singaut taim em i givim Niu Yia tok-tok bilong em i go long ol manmeri insait long Is Nu Briten. Em i singaut long ol pablik seven long mekim wok bilong ol stret na luksave olsem ol i mas mekim wok bilong ol pipel. Mista Dion i tok olgeta pablik seven, maski aninit long nesanel o provinsel dipatmen, i gat bikpela wok insait long gavman. Em i tok tenkyu long ol long wok ol i mekim long 2004 na askim ol long mekim moa gutpela wok long dispela yia.

Niu Yia haus paia kilim tupela man

Wanpela paia i bin kamap long namba wan de bilong nupela yia i daunim wanpela haus na kilim tupela man long Kavieng taun. Dispela bikpela paia i bin kirap long wanpela haus we ol wokman bilong wanpela bikpela kampani bilong painim pis i bin slip long en. Dispela paia i bin kirap long bik moning long Sarere, Jenuari 1. Polis i tokaut pinis long dispela wik olsem ol i wok long mekim wok painimaut yet i go insait long dispela paia. Wok painimaut i wok long go het yet.

Ol nupela Bogenvil lida i mas wok hat - Sir Peter

MINISTA bilong Inta Gavman Rilesens, Sir Peter Barter, i tok 2005 i mas stat wantaim bikpela wok bilong kamapim otonomi bilong Bogenvil gavman na dispela i mas kamap long han bilong ol lida bilong Bogenvil yet.

"Taim Otonomas Bogenvil Gavman i kisim opis, olgeta Bogenvil lida i kisim wok i mas strongim tingting long wok hat na luksave long strong bilong dispela wok.

"Dispela i karamapim wok bilong ol salens bilong ol pipel long mekim wok developmen long kamapim wanpela ikonomi we inap long kamapim gutpela sindaun insait long Bogenvil," Sir Peter i tok.

Bihain long Bogenvil Mama Lo i kisim luksave

bilong Nesanel Eksekutiv Kaunsol, na Gavana Jenerel i tok oraitim, rot i go long kamapim ileksen bilong otonomas Bogenvil Gavman nau i klia.

"Nesanel Iktorel Komisin na Bogenvil Edministresen, i wok long wok bung wantaim ol lokol opisa na ol i stretim pinis ol plen.

"Nau taim i ron pinis long 6-pela mun we Mama Lo bilong Bogenvil i makim bilong rere long ileksen. Salens nau bilong ol Bogenvil lida, opisa na komyniti em long pinisim dispela wok rere.

"Ol wanwan pait gan i stap insait long ol kontena long Buin na Kieta ol i mas rausim kwik taim. Dispela i stap aninit long Bogenvil Peace Agrimen," Sir Peter i tok.

Em i tok Nesanel Gavman i mekim wok bilong em pinis long luksave long dispela Agrimen na nau i nogat as long wok i ron isi isi.

Sir Peter i tok tu olsem nau olgeta samting i wok long ron stret, Francis Ona na ol sapota bilong em i stap insait long No Go Zon i nogat as long stap ausait long wok i kamap nau.

"Nau em i taim bilong ol manmeri i stap ausait long pis proses long wok bung, long helpim long kamapim gutpela sindaun bilong Bogenvil long bihain taim na tilim gut kaikai dispela wok bung bai karim."

Longpela taim nau Bogenvil i wok long askim long gutpela sindaun.

Surikim wok bilong UNOMB

GAVANA bilong Bogenvil, John Momis i tok orait long surukim wok bilong Yunaitet Nesens Obseva Misin long Bogenvil (UNOMB) i go olsem 6-pela mun inap em i pinisim las hap bilong wok rausim bilong ol pait gan.

UNOMB bai i stap tu long luksave long ileksen bilong Otonomas Gavman bilong Bogenvil.

Yunaitet Nesens Sekyuriti Kaunsel i tok orait long askim bilong gavana na ol Join Lidasip bilong Bogenvil Provinsel Gavman, Join Lidasip bilong Bogenvil na ol pipel bilong Bogenvil long tok tenkyu long Praim Minista Sir Michael Somare, Minista bilong Foren Afeas, Sir Rabbe Namaliu, Minista bilong Inta Gavman Rilesens Sir Peter Barter na bikpela tok amamas i go long PNG Gavman long wok bilong ol long surikim wok bilong UNOMB.

Em i tok UNOMB i bin mekim bikpela wok long Bogenvil Pis Proses we em pinisim stes 1,2 na 3 bilong Bogenvil long rausim ol paitgan long planti hap bilong Bogenvil.

Wok bilong UNOMB na ol lida bilong bogenvil i pinisim 93 pesen bilong ol gan i stap long Bogenvil.

Tasol Mista Momis i tok sampela liklik ples olsem Buin na ol arapela ples we UNOMB i no bin go long en, sampela pait gan i stap yet.

Em i tok Pis Kodineting na Bogenvil Pis na Rekonsiliesen Ministri i wok strong long rausim olgeta dispela pait gan pastaim long AGB ileksen.




Gavana bilong Bogenvil, John Momis i amamas long surikim bilong wok bilong Yunaitet Nesens Obseva Misin long Bogenvil (UNOMB) bai ol i ken stap bilong glasim namba wan ileksen bilong sanapim Otonomas Bogenvil Provinsel Gavman. Foto: ALOYSIUS LAUKAI

Mista Momis i tok PNG Nesanel Eksekutiv Kaunsel i givim tok orait bilong en long Mama Lo bilong Bogenvil na Gavana Jenerel i sainim pepa pinis long luksave en.

Dispela i soim klia olsem nau em bai kamapim wanpela fri na demokratik ileksen bilong ol Bogenvil pipel na kamapim gavman bilong en.

Mista Momis i tok ol manmeri i gat rait long votim husat ol i laikim long kamap lida bilong ol, olsem tasol em i ting i gutpela moa dispela ileksen i mas i nogat ol paitgan we ol manmeri bai pret long vot.

Em i tok wok bilong UNOMB long dispela taim bilong ileksen i gutpela bai em i helpim Bogenvil Pis Agrimen long luksave long driman bilong em.



POLIS long Is Nu Briten i pinisim olgeta operesen bilong ol long Krismas las yia na Niu Yia.

Polis insait long provins i tok olsem maski ol i no bin i gat inap polis manmeri, ol operesen bilong ol i bin ron stret.

I bin i gat wanwan liklik bikhet i bin kamap, na wanpela paia long Niu Yia long Kavieng i bin lukim tupela man indai, tasol olgeta arapela hap bilong Niugini Ailans i bin stap isi tasol.

Eksekutiv Opisa bilong Niugini Ailans Komand, Sief Superintenden Ephraim Tomonmon i tok i bin i gat gutpela sindaun insait long rijon bilong wanem polis i bin go aut na mekim wok aweanes pastaim long operesen bilong ol i bin stat.



PNG Power go bek long Buka ...24 aua pawa saplai

PAWA kampani PNG Power nau i go bek pinis long Bogenvil.

Dispela i kamap taim Bogenvil Provinsel Gavman i givim bek Buka Pawa Stesen i go long PNG Power long lukautim.

Ekting Praim Minista na Minista bilong Maining, Sam Akoitai i bin stap long luksave long dispela bikpela wok senis.

Nau PNG Power i lukautim Buka pawa saplai, bai ol i ken givim 24 aua pawa saplai i go long Buka taun na ol ples i stap klostu long Hutjena.

Ekting Sief Eksekutiv Opisa bilong PNG Power, Lawrence Solomon i tokaut olsem Bod bilong PNG Power yet i bin tok orait long kisim bek Buka pawa saplai.

Pastaim long pawa saplai long Buka i bin pas long 1990, ELCOM i bin lukautim.

Long taim bilong bikpela pait long Bogenvil, pawa stesen, ol haus bilong ol wokmanmeri na ol pawa lain

i bin stap gut. Opis na haus bilong menesa tasol i bin paia.

Long 1990 tu wanpela grup wokman bilong ELCOM i bin go long Buka long sanapim bek pawa saplai long Buka. Buka taun i bin i gat pawa, tasol i no ron strong olgeta taim.

Nau PNG Power i kisim bek pawa saplai bilong wanem ol i pilim olsem ol i gat wok long mekim na dispela em i wok bilong ol stret.

Dispela pawa stesen i ken givim samting olsem 1,750 kilowatt pawa.

"Nau mipela bai i ken helpim ol pipel bilong buka.

"Nau ol kastoma bilong mipela i ken gat pawa inap long 24 aua na bai ol i ken peim long liklik ret tasol," Mista Solomon i tok.

Em i tok tu olsem i nogat pten yet long karim PNG Power i go long Arawa na Kieta tasol ol i ken helpim provinsel gavman long sanapim ol pawa saplai long dispela tupela hap long bihain taim.

Boram Haus Sik kisim helpim

Desney Koimo i raitim

BORAM Haus Sik long Wewak, Is Sepik provins, bai kisim nupela ol sterilaisa na medikel samting bilong wok bihain long em i sainim wanpela agri-men o wanbel wantaim Bod bilong PNG Sastanabal Developmen Progreim Limited (PNGSDP).

PNGSDP bai givim helpim long mak bilong mani klostu olsem K526,464.77 i go Boram Haus Sik long baim dispela ol samting.

Ekting Sief Eksekutiv Opisa bilong PNGSDP, Camillus Midire, i tok amamas long dispela samting i kamap long wanem ol i luksave long sevis Boram Haus Sik i givim long ol pipel insait long Is Sepik provins.

...K500,000 mani mak i kam long PNGSDP

"PNGSDP i luksave olsem planti bilong ol haus sik insait long kantri i save ron bikos long sapot ol i kisim long ol kopret grup na ol wanwan man o meri husat i save givim mani i go long haus sik bilong lukim olsem em i ron gut," Mista Midire i tok.

Dispela i bihainim wanpela askim bilong Bod bilong Boram Haus Sik long PNGSDP long helpim ol bihain long ol nius i bin tokaut long hevi haus sik i bin bungim we i nogat gutpela ol samting bilong givim helt sevis long ol pipel.

Boram em i wanpela bikpela haus sik we i save

givim sevis long ol komyuniti insait long Is na Wes Sepik provins na tu long Manus na Madang.

Dispela mani PNGSDP i givim bai karamapim sterilaisa yunit mak olsem K276,904.77 na medikel samting bai kos olsem K249,560.00.

Mista Midire i tok em i save tu olsem dispela bikpela fanresing we i bin kamap long 2004 bai inap long helpim haus sik long taim bilong hevi.

Dispela helpim i gutpela bikos planti taim ol siklain i save kam long haus sik na i no kisim gutpela helpim, i no bikos ol woklain long haus sik i les long helpim ol, tasol bikos ol woklain i no gat ol samting stret long helpim ol wantaim.


Nau ol siklain i ken amamas long kisim gutpela sevis long ol woklain.

Hap Hap Nius

PNGDF redi

Wanpela Papua Niugini Difens Fos (PNGDF) patrol bot i redi long helpim ol pipel bilong Manam Ailan bilong long mauten paia long hap i bin pairap. Ol bai helpim ol karim ol i go i kam na mekim sindaun bilong ol i isi liklik tu. Wanpela tim i bai skelim wanem ol pipel i mas i gat.

Ol Manam pipel i laikim taitel bilong graun



• Manam maunten paia.

Michael Novingu i raitim

OL PIPEL bilong Manam Ailan i singaut i go long Gavman long hariap long givim ol taitel bilong graun we gavman i bin peim pinis long sindaunim ol lain i kisim bagarap long maunten paia.

Dispela tripela plentesen em Asurumba, Mangem na Potsdam graun we olpela mamba bilong Bogi Tim Ward long ya 1995 i stap long gavman i bin peim pinis long bipo taim. Mak bilong mani Gavman i bin peim i olsem K1.25 milien olgeta.

Dispela singaut i bin bihainim wanpela lukluk raun bilong Praim Minista Sir Michael Somare long Disemba 2004 we em i tokim ol Manam pipel long Asurumba plentesen olsem bai ol i lukluk long painim graun bilong sindaunim ol pipel bilong Manam bihainim maunten paia i bagarapim ples bilong ol long Oktoba 24 2004.

Sir Michael Somare i tokim ol olsem dispela graun bilong gavman na yupela i gat rait long sindaun long em.

Keateka menesa bilong Asurumba, Potsdam na Mangem plentesen, Peter Yambo, i tokim *Wantok Niuspepa* olsem em i wari long ol pipel bilong Manam long Gavman i mas stretim taitel hariap na ol bai i ken wokim plen bilong kamapim setelmen progrem we ol pipel i ken stap long en longpela taim bihain.

Nau yet mipela i no inap long go het long kari-maut dispela plen long wanem mipela i nogat taitel bilong graun, em i tok.

"Ol pipel bilong Manam i tok ol i no laik long i go bek long asples bilong ol long wanem ples i bagarap pinis long maunten paia. Ol i laikim graun bilong sindaun long en long graun bilong gavman long Bogia long sindaun long em," Mista Yambo i tok.

Em i tok moa olsem ol toktok i kamap long nius olsem ol bikples Bogia pipel i kros long graun i no tru.

"Mipela i gat luksave na wanbel i stap wantaim ol long pastaim taim bilong ol papa tumbuna we mipela i save senisim pis na kaikai wantaim ol na dispela strongim gutpela pasin i stap namel wantaim ol. Ol i amamas tasol long mipela i sindaunim ol long bikples Bogia," em i tok.

Mipela i bin givim pinis risetelmen progrem plen bilong mipela pinis i go long Gavman tasol Gavman i no luksave long dispela plen bilong mipela. Mipela i laik save Gavman i mekim wanem long dispela long risetelmen plen bilong mipela, Mista Yambo i tok.

Skul ya bai i stat long tripela wik bihain na ol samting bilong skul bilong pikinini i no redi. Mipela i singaut long Dipatmen bilong Edukesen long hariap long stretim ples bilong skul bilong moa long 2000 ol pikinini nau i stap long ol kea senta long Bogia.

XSELL

OL DIL HAT LONG WIN! NAO ON!

SEWIM K100

ARI ENZER TELEFON

AKITA EN21-83N
21" Kala TV #103794
• NTSC pilai bek
• igat 255 chanol memori
Bipo Kes Prais K799

SEWIM K32

ARI ENZER TV #32

AKITA EN14-83N
14" Kala TV #101794
• NTSC pilai bek • 255 chanol memori
Bipo Kes Prais K399

SEWIM K604

ARI ENZER VCD PLICA

ENZER ETV29-148N
29" Kala TV #105760
• NTSC pilai bek
• igat 255 chanol memori
Bipo Kes K1,299

SEWIM K20

ARI ENZER TV #20

ENZER GA1408BB #224784
Redio Kaset Rekoda
• dabol kaset rekoda
• 4-ben set ikalisa
Bipo Kes K229

SEWIM K52

ARI ENZER TV #52

ENZER HF1308 #202895
VCD/MP3 Mini Hi-Fi Sistem
• 1200 W PMPO • VCD/CD pleia
• MP3 pleim-bek • stereo radio tuner
• karaoke maikrofon

SEWIM K19

AKITA DVD5148

DVD Plea #114851
• pilaim DVD, DVD-R, DVD-RW, VCD, SVCD, CD, MP3-CD, CD-R, CD-RW
Bipo Kes K399

SEWIM K74

ENZER GA1418 #224787
CD Redio Kaset Rekoda
• CD/RW • 2-wel spika • blu-pela power lait
• 4-spika wantaim stronpela pawa
Bipo Prais K299

SEWIM K54

AKITA HF1598MC #202930
VCD Mini Hi-Fi Sistem
• isi long rausim spika • tupela keset dek
• 4-spika wantaim stronpela pawa
Bipo Kes K299

SEWIM K125

AKITA HF1598MC #202930
VCD Mini Hi-Fi Sistem
• isi long rausim spika • tupela keset dek
• 4-spika wantaim stronpela pawa
Bipo Kes K299

Edim valu OLGETA dei!

COURTS GORDONS
Spring Garden Road, 5th Floor
Phone: 527 4808 • Fax: 525 4149

COURTS LAE
Millers Avenue Road, Lae
Phone: 527 4803 • Fax: 477 4677

COURTS GOROKA
For Street, Goroka
Phone: 527 2011 • Fax: 712 2061

COURTS MT HAGEN
Hagen Drive, Mount Hagen
Phone: 542 1401 • Fax: 542 2517

COURTS MADANG
Bukitua Plaza, Manulua Street
Phone: 527 2711 • Fax: 527 2612

Ol Driman Prais

- PNG FOAM - 6 SITA LAUNS SUIT
- RPS - PLES KANAKA SOLA LAIT
- BOROKO MOTOS - HONDA GADEN PRODAKS
- COURTS - K5,000.00 KES MONI
- WIKEN TRIP BILONG TUPELA LONG MADANG RISOT
- SVS - 50 KLIN DITASEN PAKET PRAIS VALU K500.00
- CONKIONS - TUPELA MOBAEL PHON + STAT UP KIT
- COURTS - K10,000.00 SHOPIN VASA
- BOROKO MOTOS - HONDA GENERATA SET
- PNG RAGS - MIX KOLOS BEIL VALU K1,000.00
- BM - 21FT BANANA BOUT + JOHNSON 40HP MOTA
- BOROKO MOTOS - NISSAN URVAN/BUS

K600,000.00

INAPIM KES MONI NA PRAIS!

Baun wanem #10 long 3 Courts bilong Manam ya long kamapim driman bilong ya long ol Bora-Gadans

04-02705

Hap Hap Nius

Balus birua

Wanpela liklik balus Cessna185 i bin bungim birua long Simbu provins we i kilim pailot husat i wanpela man tasol insait long dispela balus we i wok long mekim ron bilong em namel long Karamui na Kora.

Tingim dai bilong Papa Jim Nombri



Papa lewa bilong mipela, yu lusim mipela wanpela yia pinis na lewa bilong mipela i bruk yet. Dai bilong yu i bringim bikpela pen na wari insait long laip bilong mipela we nogat wanpela inap stretim. Yu dai pinis tasol memori bilong yu i stap yet long lewa bilong meri bilong yu Elsie na ol pikinini: Maryann, Rex, Ire, Manu na olgeta Nombri famili.

Mipela i misim yu papa lewa.

Enga na Sauten Hailans helpim Manam pipel

SAUTEN Hailans provins i givim helpim long ol pipel bilong Manam husat i kisim bagarap long volkeno o maunten paia long las yia.

Gavana bilong Sauten Hailans, Hami Yawari, i bin givim K30,000 i go long Minista bilong Inta Gavman Rilesens, Sir Peter Barter, husat tu em rijinol memba bilong Madang provins long dispela wik.

Gavana Yawari i tok dispela helpim bilong ol pipel bilong Sauten Hailans provins em long helpim ol brata susa long Manam husat i bungim hevi long bagarap bilong volkanu na i stap nau long kea senta long Bogia.

Mista Yawari i tok Manam em ol pipel bilong mipela long Papua Niugini husat i kisim bagarap long hevi bilong volkeno na olgeta pipel bilong kantri i gat wok long helpim ol. Olsem taim ol pipel bilong Sauten Hailans i tingim dispela na givim dispela helpim long ol.

Sir Peter i tok bikpela amamas long ol pipel bilong Sauten Hailans



• Mista Yawari (lephan) i givim K30,000 sekmani i go long Sir Peter (rait).

long dispela sapot Mista Yawari bilong ol i givim long ol pipel bilong Manam.

Em i tok bai ol i yusim dispela mani gut long ol wok bilong helpim ol manmeri husat i kisim bagarap na i stap nau long kea senta. Bai ol i putim mani i go long ol grup i gat save long mekim dispela kain wok olsem Caritas PNG long go het long wok ol i mekim long stretim sindaun na hevi bilong ol pipel long kea senta.

Wankain taim tu Enga provins tu i tingim ol pipel bilong Manam na makim K20,000 bilong helpim ol.

Gavana bilong Enga provins Peter Ipatas i tokaut long dispela long wanpela ripot bilong em we i kamap wantaim long baset bilong provins long dispela yia.

Enga provins i bin kisim tok orait bilong ekting tresera Sir Peter Barter long oraitim 2005 provinsel baset bilong ol.



Caritas Papua New Guinea

We are prophets of a future not our own. (Archbishop Romero)

Caritas PNG Saut Is Esia Tsunami Apil

Caritas PNG (CPNG) i singaut long olgeta Katolik pipel na ol arapela manmeri wantaim gutpela bel i stap long PNG long givim helpim mani long dispela bikpela bagarap.

Yu harim na lukim long TV na ritim long niuspepa long bikpela bagarap long tait-wara i pundaun antap na brumim ol nambis bilong 8-pela kantri long Saut Is Esia wea planti tausen pipel i bin dai. Ol bikpela taun na komuniti i lus nating na planti milien manmeri na pikinini nau i nogat haus, kaikai na klos.

Yu ken sore long ol na helpim liklik long daunim dispela hevi. Sapos yu laik givim helpim, orait, salim skel bilong yu long Caritas PNG. Em i save wok poroman wantaim planti kantri aninit long Caritas Intanesialis. Mipela bai salim mani long Caritas Osienia na bai go long Caritas South Is Esia. Na ol yet bai skelim i go long ol kantri i nidim helpim.

Plis salim kontribusen bilong yu i go long:
Caritas PNG
A/C Namba: 717856801
Westpac Bank Limited, Waigani Branch

O kam long lukim mipela long:
Godwit Street, Gordons (Hapsait long Australia Hai Kornisin Opis o Limana Vokesinal Skul)
P. O. Box 6576
BOROKO, NCD

Ph: (675) 325 6255/6485
Fax: (675) 325 9726
Email: caritaspng@caritas.org.pg

Mipela bai salim risit na raitim tok tenkyu leta long olgeta kontribusen mipela i kisim. Olsem na ringim mipela o faksim risit bilong mani yu putim long benk bai mipela i ken tok tenkyu. Caritas PNG bai yusim mani bilong en yet long bungim na salim olgeta mani i go helpim ol manmeri i bagarap long Saut Is Esia Tsunami. Bilong pinisim wok mipela bai raitim ripot bilong Apil na putim aut long publik.

Polis helpim long kamapim gutpela Krismas na Niu Yia

Steven Dama i raitim

DISPELA Krismas na Niu Yia i kamap gutpela moa yet. Simbu provins i wanpela ples we i save bungim kainkain liklik na bikpela hevi long kain taim olsem krismas na nu yia tasol dispela i no bin kamap, Sief Inspekta na Provinsel Polis Komanda (PPC) Jimmy Onopia i tok.

Mista Onopia i tok, dispela senis i kamap bilong wanem, i luk olsem ol manmeri nau i luksave long wanem i Krismas na Niu Yia.

Em i tok ol pasin na wokabaut bilong ol pipel bilong Simbu i kamap gutpela long dispela tupela selebrensen.

PPC bilong Simbu i tok ol kain pasin olsem tromoi ston long ol ka, haus na mekim rot blok i no bin kamap olsem bipo.

Dispela i soim olsem olpela tingting na pasin i laik senis na nau ol pipel i kisim gutpela tingting long laip

bilong ol, em i tok.

Em i tok tu olsem ol i bin karimaut toksave na skulim ol pipel olsem pasin bilong pait, tromoim ston, stik na rot blok i no moa pasin bilong ol man i gat tingting long glasim na skelim.

Sief inspekta Onopia i amamas long ol pipel bilong Simbu long soim pasin rispek long dispela krismas na nu yia taim.

Em i toksave long *Wantok Niuspepa* olsem wanpela man bilong Moru Maule bilong saut Simbu i stap long Polis sel nau bikos polis i holim em long trabel bilong kilim wanpela man i dai.

Em i stap wetim kot bilong em long kamap.

PPC i tok tu olsem ol polisman bilong em i nau mekim wok painimaut long wanpela trabel we sampela man i bin holim na bagarapim wanpela meri long dispela bikpela de bilong Krismas na Niu Yia.

Nupela Hela provins inap kamap

Maisan Pahun i raitim

HELA Gimbu Asosiesen bilong Sauten Hailans provins i mas toktok strong long ol tingting bilong ol Hela pipel long kamapim wanpela Hela Provins pastaim long 2007 nesenele ileksen i kamap.

Minista bilong Inta Gavman Rilesens Sir Peter Barter i bekim toktok i go long olpela memba bilong Komo Margarima Mista Alfred Kaiabe na i askim ol lain long Hela rijen long tokaut long tingting bilong ol long kamapim wanpela provins bilong ol yet pastaim long 2007 nesenele ileksen.

Sir Peter i tok olsem Praisin Minista Sir Michael Somare i promis long luksave long kamapim nupela Hela provins kam aut long Sauten Hailans Provins pastaim long 2007 jenerel ileksen.

Na tu Nesenele Gavman i skelim opis bilong Sauten Hailans Igo tripela rijen we wanpela i klostu kamap Hela provins.

Dispela yia tu Nesenele Gavman i kamapim wanpela Baudri Komisin we bai i glasim dispela kamapim bilong Hela provins.

Sem taim yet Sir Peter i tok lukaut i go long ol pipel bilong Sauten Hailans wantaim ol Hela rijen long toktok.

Pukpuk kilim dai man

Wanpela papa bilong tripela pikinini i dai bihain long wanpela pukpuk i tanim kanu em i bin stap insait na karim em i go aninit long wara long Galp provins.

Sauten Rijon Divisenel Komanda na Ekting Asisten Polis Komisina John Marru, i tok olsem, Sepu Lau bilong Mapaio viles long na tupela pikinini meri bilong em i wok long painim pis las Trinde long tais wara,

taim dispela pukpuk i bin kamap.

Em i tok dispela pukpuk i bin swim aninit long kanu, apim na tanim, na Mista Lau wantaim tupela pikinini i bin pundaun i go insait long wara.

Mista Marru i tok olsem ol tupela pikinini i bin swim i go long sua tasol pukpuk i bin holim pasim Mista Lau na karim em i go aninit long wara.

Mista Marru i tok ol pikinini i bin tok-save long ol pipel long viles husat

hariap tru i bin pasim maus bilong wara na painim Mista Lau.

Em i tok ol polis long Baimuru tu i bin helpim ol pipel bilong viles long painim Mista Lau.

Dispela painim i bin go inap Fonde taim ol i bin painim bodi bilong em.

Galp Provinsel Polis Komanda, Sinia Inspekta Albert Korin, i tok olsem ol i bin karim bodi bilong Mista Lau i go long Kerema Haus Sik long

ol dokta long glasim.

Mista Lau i bin wanpela komyuniti wokman husat i bin wok wantaim Kerema Haus Sik na i bin wok long malolo wantaim famili bilong em long Krismas taim dispela birua i bin kamap.

Bodi bilong Mista Lau i bin go bek long viles bilong em long Tunde long dispela wik we famili bilong em bai planim long matmat.

Planti yangpela strit meri long Mosbi

I GAT planti yangpela meri namel long ol strit pikinini bilong Mosbi husat i mas painim we long helpim ol yet.

Neseneel Kapitel Distrik Provinsel AIDS Komiti Slaman, Temu Elly, i mekim dispela toktok bihain long em i raun long lukim sampela ol hap we ol pikinini i nogat haus i save slip long en long nait.

NAC PAC, Humanity Foundation, Neseneel Kapitel Distrik Komisin (NCDC) na sampela o volentia, i bin raun i go long ol dispela hap long karim kaikai na ol dring i go long dispela ol pikinini. Ol i bin statim dispela las wik.

"Taim yu lukim ol dispela hap, ai bilong yu bai laik wara bikos sampela ol dispela pikinini i yangpela tumas long stap long strit olsem," Mr Elly i tok.

Em i tok ol i save raun i go lukim ol long 2 kilok long moning bikos

dispela em i taim planti bilong ol dispela pikinini i save bung long ol dispela hap long dispela taim.

Mista Elly i tok olsem planti bilong ol dispela pikinini i save kisim 5-pela aua bilong slip tasol insait long wanpela de bikos ol i save kirap long bik moning na stat painim ol tin ken long salim na kisim mani.

"Ol i save kaikai ol 20 toea skon we ol kaiba i save salim na dring wara. Dispela em i kaikai bilong ol," em i tok.

Mista Elly i tok olsem sampela bilong ol dispela pikinini i save yusim ol wara tep long ol maket na ol hos bilong ol bisnis haus long apinun long waswa na ol narapela i no save waswas tu.

Dispela hevi em i wanpela bikpela hevi we olgeta i mas wok bung wantaim long stretim.



Ol dai bilong mipela...Ol matmat long Bomana Woa Matmat long Mosbi.

Poto: PNGBD.COM

Hap Hap Nius

Raskol pasin i go daun

Namba bilong ol bikpela raskol pasin we i kamap long Pot Mosbi, Sentral provins, long dispela yia, i daun moa long las yia, Neseneel Kapitel Distrik (NCD)/Sentral Polis Sief Tony Wagambie i bin tok las Fonde. Mista Wagambie i tok olsem namba bilong ol bikpela raskol pasin we i bin kamap dispela yia em 3,831, na long las yia em i bin 4,650. Tasol em i tok i tru olsem ating sampela taim, ripot bilong ol bikpela raskol pasin i no save i go long ol polis.

Bekim bek

Long bekim bek dai bilong wanpela man long Novemba las yia, ol wanblut bilong em i bin kukim 4-pela haus long Krismas wiken las yia long Miaru ples long Galp provins, Galp Provinsel Polis Komanda, Albert Korin i bin tok. Dispela man, Sarufa Lari, i bin dai bihain long sampela man i bin sutim tok long em olsem em i sanguma man na i bin paitim em, Mista Korin i tok. Em i tok dispela birua i bin kamap long haiwe tasol Lari i bin dai long Pot Mosbi Jenerel Haus Sik bihain long sampela lain i bin kisim em i go long hap long kisim helpim. Ol i bin karim bodi bilong em i go bek long Kerema long Krismas De. Taim bodi bilong em i bin kamap long hap, ol wanblut bilong em i bin kukim ol haus long bilong ol man ol i bilip i bin paitim em.

Westen provins kisim K90.3 milien baset

FLAI Riva Provinsel Gavman (FRPG) i kamap wantaim wanpela K90.3 milien baset bilong 2005.

Gavana bilong Westen provins, Dokta Bob Danaya, i tok olsem dispela 2005 baset bai lukluk moa long stretim gen na helpim long stap longpela taim.

Em i tok ol bikpela projek we ol bai lukluk long en long dispela yia em, distrik hetkota, infrastraksa o

ol rot, bris na haus, helt, edukesen na lo na oda.

"Baset i lukluk moa long ol bikpela hap olsem plening, menesmen, implementesen o kamapim na monitaim ol funksen o lukluk long ol wok na mekim disisen long we mani i bai go long bungim ol bikpela mak FRPG i laik kamap long en long developmen streteji o plen bilong en," Dokta Danaya i tok.

Em i tok olsem wanpela bikpela hevi we i bin stap long baset pastaim em we ol i wok long yusim mani long ol hap na ol projek we i no ron gut wantaim ol developmen plen bilong ol.

Dokta Danaya i tok olsem ol provinsel, distrik na lokal level gavman na FRPG, i mas kirapim ol sans bilong pablik na pravit sekta developmen aninit long streteji bilong ol.



Land Cruiser 78 Series 4WD Troop Carrier

Advantage :

- Powerful 4.2L Diesel engine
- Proven Over 50 years
- 15 Branch Nationwide Backup
- Genuine Parts & Quality Service
- PNG's Only Quality Assured* Motor Dealer

Quality Performance Proven Reliability

*QUALITY ASSURED AS/NZS ISO 9001 : 2000



Ela Motors

PNG's Toughest 4x4
wheels for the Nation

PORT Moresby 9822340 - LAE 4781801 - KOKO 822100 - MADANG 822100 - GOROKA 7321344 - MT HAGEN 5421230 - WEIYAK 8562210
KAVIRAE 9842200 - KIMBE 9833100 - TABUREI 3462000 - VANIAGO 8511734 - FORSERA 8478007 - EJURA 8739510 - UIR 8664008 - ALGTAR 6119100

TOYOTA (PNG) PTY LTD
www.toyota.com.au

Polis holim nambatu man long Solomon

SOLOMON Ailan Polis i holim pinis na sasim wanpela trabelman long las wik, bihain long wanpela birua i bin kamap long las yia.

Dispela nau i bringim namba bilong trabelman bilong sutim polisman igo antap long tupela.

Polis i holim pasim pinis Philip Suiga Kwaimani bilong liklik ples Sindu, Auki long Malaita provins bilong Solomon Ailan.

Ol polisman husat i wok painimaut long wanpela birua, we ol ibin sut long ol polisman na polis-meri bilong Rijinol Asisten Misin Solomon Ailan (RAMSI) taim ol i wok long nait bilong namba 21 dei bilong mun Oktoba, 2004.

Polis i tok Kwaimani, husat i gat 20 krismas wantaim sampela narapela ol manki i bin sutim tupela polisman meri bilong RAMSI long nait taim, klostu long King George VI maket insait long Honiara taun.

Wanpela bilong dispela tupela polis opisa i kisim sampela liklik hevi long dispela birua.

Patisipeting Polis Fos (PPF) bilong RAMSI wantaim Royal Solomon Ailan Polis (RSIP) i bin wok bung wantaim helpim bilong Australian Difens Fos long holim pasim Kwaimani long las wik Trinde.

Deputi Komisina bilong RSIP na Komanda bilong PPF Sandi Peisley i tok taim ol polisman

BUSTIN ANZU (RAMSI memba) long Honiara i raitim

wantaim ol soldia i wok long painimaut long idai bilong narapela polisman, we ol stilman i sutim em long tupela wik igo pinis i holim pasim Kwaimani.

Kwaimani i bin go long Honiara mejistret kot long las wik yet tasol kot i makim olsem em bai kamap long kot long dispela mun. Olsem na nau yet em i stap long rum gat.

Ol sas bilong em long klostu kilim i dai tupela plisman meri bilong narapela lain wan solowara, husait i wok wantaim PPF.

Narapela wan trabelman bilong Kwaimani, John Ross, husat i gat 32 krismas i go pinis long han bilong ol polis na ol i sasim em long traim long kilim man wantaim ol narapela trabel olsem stil.

Long wankain taim tu Komanda Peisley i tok dispela birua long sutim polis em wanpela bikpela hevi na plis bai wok painimaut inap ol i kisim olgeta ol trabelman na sasim ol long dispela birua.

Polis nau yet i wok long painim narapela trabelman long idai bilong polisman bilong Australia, husat i save wok wantaim PPF Adam Dunning.



• Opisa Dunning husat i bin dai long han bilong ol raskol long Solomon Ailan.

Dunning em ol birua i bin kilim i dai long Disemba 22 long wanpela ples insait long Honiara ol i kolim long Bodalain taim em i wok patrol long nait wantaim narapela polisman.

Ol stilman i bin hait i stap na sut long en na tupela katres i kisim em na em i dai sem taim. Polis i wok long painimaut long dispela yet na ol i kisim wanpela man pinis na nau i wok long painim narapela.

Las wik Fonde, ol i bin planim em long ples bilong en Canberra, Australia, bihain long ol i holim wanpela funeral sevis, we em i bin wanpela namba wan sevis i bringim planti man na meri ol i save long em na ol ino save long em tu.

NEC sapotim kamap bilong Nesenel Dvelopment Forum

PRAIM Minista Sir Michael Somare tokaut olsem, Nesenel Eksekyutiv Kansel (NEC) i givim wok long ol gavman dipatmen long karimaut tok orait i kam long Konsaltativ Implementesen na Nesenel Dvelopment Forum bilong Monitoring Kansel i bin kamap long dispela yia.

4-pela rijonel forum i kamap pinis em: Kimbe long Niugini Ailan, Vanimo long Momase, Maunten Hagen long Hailans na Aiotau long Sauten rijon. Dispela sapot i lukluk long planti toktok olsem HIV AIDS, wok kamap bilong rot na bris, wok rausim bilong ol woklain bilong Edministresen, kamapim gut ol pablik Sekta, Agrikalsa na Lo

na Oda, Sir Somare i tok.

Bikpela tingting bilong bung bilong las yia em "removing obstacles to export driven recovery and rural development- what progress has been made?" ("rausim rot blok i pasim we bilong salim long maket na kirapim rot bilong bisnis i wok na rurel developmen - wanem kain samting em i bin mekim pinis?") Planti gutpela wok bilong CIMC i bin karim kaikai dispela yia;

• Dispela kamap bilong Nesenel Anti Korapsen Alaiaans long Julai bilong mekim wok painim gut na bringim long kot ol bikpela stil na paul pasin o korapsen.

.Dispela tok orait bilong Infomel Sekta Dvelopment na Kontrol Lo 2004 long Jenuari.

• Kamapim Nesenel Rot Otority long stat wok long stretim rot long Hailans Haiwe, na Opening bilong Famili Sapot Senta long Pot Mosbi Jenerel Haus Sik long mun Mei long givim 24 awas sevis long famili na long bagarap i kamap long pasin pamuk.

CIMC i bin kamap long 1990 bihain long Nesenel Ikonmik Samit long kamapim wok poroman namel long gavman, praivet sekta, ol wokmanmeri na long komuniti. Em putim tingting igo insait long mekim baset na tu i givim tingting long mekim polisi.

Gavman i givim tok orait long kamapim Lo na gutpela


PRAIM Minista Sir Michael Somare i tok Nesenel Eksekyutiv Kansel(NEC) i givim tok orait long kamapim Lo na Jastis Nesenel Kodineting Mekenisum (NCM). Em i tok, NCM

hap bilong wok bilong gavman i go yet long luksave long Lo na Oda bilong kantri.

As wok bilong National Coordinating Mechanism (NCM) i bilong kamapim gutpela na stretpela menesmen na lukautim wok na samting bilong Lo na Oda sekta, bihainim dri-man bilong Nesenel Lo na Oda Polisi na wok kamap plen bilong en.

Sir Michael i tok lukluk igo bek bilong 2002 Lo na Oda i kamapim dispela kamap bilong NCM. Dipatmen bilong Nesenel Plening na Pesenel Menesmen i kisim tok orait long kamapim NCM, PRAIM Minista i tok.

NEC tu i lukluk i go bek long Ministeriel wok



• PRAIM Minista Sir Michael Somare - NEC i tok orait.

bilong gutpela sindaun, Lo na Oda bilong 2003 bilong stap anit long lukautim bilong Minista bilong Inta Gavman Rilesens.

Ol komiti bai lukautim ol wok bilong NCM.

Gavman i laik helpim Rurel Dvelopment Benk

PRAIM Minista Sir Michael Somare i tokaut long Nesenel Eksekyutiv Kansel (NEC) long kamapim plen bilong wok kamap bilong Rurel Dvelopment Benk (RDB).

Sir Michael i tok olsem wok painim bilong Prais Waterhouse Coopers igo insait long RDB i tokaut long Mei 31, 2004 olsem beng bin gat planti dinau na i no inap long bekim.

Dispela K10 milien lus taim wok igo yet em bilong 2004 wantaim ful Aset bai i go daun long K5 milien na bai no gat rikapitelaisesen. Nau dispela K43m i kam long Tresari long i go long RDB wantaim ol narapela ses igo insait wantaim IPBC i gutpela bilong statim wok kamap taim Net Aset bilong beng mas i go bek long wok bilong en.


Em i tok bai igat 14 mun wok kamap program. Dispela bai kisim bikpela helpim bilong gavman mani olsem K5 milien long 2004 na K10m long 2005 long PIP sapot baset na nupela mani bilong 2005 bilong helpim benk i kam pinis long benk bod na menesmen.

Sir Michael Somare i tok dispela K10 milien i kam long PIP long 2005 bai lukluk long agrikalsa dinau projek bai i kamap bihain long Dipatmen bilong Plening na Rurel Dvelopment i tok orait.

Sir Michael i tok Gavman laik long mekim wok i kamap na larim wok i go bilong wanem em i mas givim sevis long ol pipel bilong ples insait long kantri.

Bod bilong RDB bai givim ripot bilong sotpela wok kamap i go long NEC long mun Mas, 2005, em i tok.

Sir Michael i tok i gat wok long painim teknikel helpim. Em i tok Gavman bai painim man husat i ken mekim dispela wok we Esian Dvelopment Benk (ADB) i givim i kam.



Inspektora Graeme Arthur (lephan) em komanda bilong ol Australia polis husat i kam helpim polis long PNG, (namel) Suprintenden CID NCD Peter Guinness na narapela polisman bilong PNG i bin bung wantaim long bikpela operesen long Niu Yia long Mosbi we ol i holim sampela bikhet man na kisim dispela sotgan.

Dispela em wanpela strongpela fektori sotgan (M16) we polis i rausim long han bilong ol man rogut long niu yia insait long ol polis patrol na rot blok ins waken. Foto GREGORY KEELEYE (AAPECP)

PNG tok orait long pemenen sitisensip

PRAIM Minista, Sir Michael Somare i tokaut olsem Nesenel Eksekyutiv Kansel (NEC) i tok orait long kamapim pemenen residen bilong ol lain i no bilong dispela kantri.

Sir Michael i tok, Gavman i luksave olsem dispela toktok bilong pemenen residen i stretpela bilong rausim rot blok bilong bisnis na invesmen long Papua Niugini.

Insait long Wol nau planti kantri i lukluk long ol saveman bilong narapela kantri bilong wok wantaim long kirapim wok na kantri insait long wol tude. Dispela rot bilong pemenen residen long PNG em i rot i go long stretim we bilong ol manmeri kam insait long PNG na tu long opim rot bilong stap bilong ol manmeri bilong narapela kantri insait long PNG.

Wanpela man o meri ausait i kisim tok orait wantaim Lo bai i stap long kantri na wankain pasin bai kamap long ol wantok na pikinini stap wantaim ol.

Sir Michael i tok pemenen residen igat rail long mekim wanem kain samting long PNG tasol i no long ol sampela samting bilong PNG i gat tambu long ol long ol ausait manmeri.

Ol manmeri i kisim tok orait long stap long PNG i ken aplai long sitisensip bihain long 8-pela yia long PNG.

Meri lida wari tru long ol yangpela

...na pasin bilong bel isi



Veronica Hatutasi i raitim

TAIM Bogenvil i wok long kamap orait bihain long pait na hevi i bin karamapim ailan na pipel moa long 10-pela yia, ol nupela sosel hevi i wok long kamap. Na dispela i kamapim wari long bihain taim bilong ol pikinini na ol yangpela pipel husat bai kamap ol lida long bihain taim.

Helen Ikilai em i wanpela strongpeta meri lida long Siwai distrik long sautwes Bogenvil.

Wok bilong em tru em tisa na mama. Tasol em i stap insait long Katolik Wimens grup insait long Korikunu eria na i kam aninit long Monoitu Katolik Peris

Misis Ikilai em bin go pas long wok bilong ol meri long kamapim bel isi na gutpela sindaun insait long Siwai distrik long yia 1992 taim pait na hevi i stap yet.

Bikpela wari bilong em long dispela taim em long wanbel na sekan pasin i mas kamap tru long olgeta level. Na dispela i mas kamap na olo lain i mas autim olgeta wari na hevi, sekan na bel isi bikos long dispela rot tasol na trupela gutpela sindaun bai kamap long Bogenvil.

Em i tok tu olsem narapela bikpela wari em long ol yangpela pipel husat nau i wok long bagarapim laip bilong ol na tu kamapim hevi long famili na komyuniti taim ol i dringim hombru.

"Long trupela gutpela sindaun long kamap, bel isi na sekan pasin i mas kamap pastaim long ol distrik level. Em i mas kamap namel long ol lida na dispela i mas kamap long lewa na bel isi pasin. Ol lida i mas sindaun na wokim dispela.



• Sampela ol pikinini bilong Buin long Saut Bogenvil. I gat wari long bihain taim bilong ol. Foto: VERONICA HATUTASI

"Ol lida i no wok wantaim long bildim pis long distrik level. Planti bel isi na sekan pasin i mas kamap long distrik level.

"Taim ol lida i kam fowed na ol i tokaut long ol samting na tok sori long wanpela narapela na sekan, trupela pis bai kamap," Misis Ikilai i tok.

Long ol yangpela pipel, Misis Ikilai i tok em i no long Siwai tasol long olgeta hap bilong Bogenvil. Na em i singaut long ol lida long lukluk long en.

"Wanem kain futsa o bihain taim ol yangpela bilong Bogenvil i gat? Yumi plenim wanem samting long ol? I luk olsem yumi no plenim wanpela samting long ol. Ol wanlain bilong ol i save pulim ol na long dispela taim, wari long ol i dringim

hombru em i bikpela samting insait long distrik. Dispela i singautim wok bung wantaim long famili, komyuniti, distrik na provinsel level long mekim samting na rausim hombru hevi na ol arapela sosel hevi em i kamapim.

"Sapos ol lida i no gat wanpela plen long helpim ol yut na ol yangpela pipel, em i soim olsem ol lida bilong yumi i no wok bung gut wantaim long bildim gutpela sindaun long distrik level," Misis Ikilai i tok.

Em i tok long taim pait na hevi i stap yet long ples, em bin singautim ol meri long bung wantaim na wokim samting long kamapim gutpela sindaun bikos em i lukim ol hevi dispela pait i kamapim long ol meri na pikinini.

"Em bin hat bikos pait i stap. Tasol dispela i no bin stopim mipela long wokim samting. Long ol Sande bihain long lotu, mipela i bin save bung wantaim ol meri, ol yangpela na ol man. Mipela i wok olsem grup na mipela i mas skruim dispela wok long kamapim gutpela sindaun.

Taim PNG ami i bin kamap long Siwai long me 1992, mipela i kisim plen bilong mipela i go long ol. Mipela i no pret. Mipela i sindaun na toktok wantaim komanda bilong ol na ol i sapotim mipela. Mi bin wari stret olsem sapos hevi i go het, ol pikinini bilong miepla bai nogat futsa," Misis Ikilai i tok.

Em i tok ol yangpela pikinini husat i gat 13 krismas i bin joinim ol BRA paitman na go insait long pait.

Em i tok maski ol meri i mamagraun long Bogenvil, ol man i bin stap antap long ol samting. Tasol ol meri i no givap na ol bin skruim wok na isi, ol wok long kamapim bek gutpela sindaun i bin go het.

Strongpela lida meri long Siwai husat i laikim gutpela sindaun i mas kamap bek, edukesen na heit sevis na developmen long Siwai na Bogenvil.

Visen o driman bilong Misis Ikilai long bihain taim bilong Bogenvil em long developmen i mas kamap na dispelas i karamapim self reliance o pasin bilong wokim samting long helpim ol yet na i no wetim helpim i kam, strongim kalsa, turisim na olgeta pikinini i mas go long skul.

Lo bilong lukautim ol mama na pikinini meri



Ol lo bilong reip, inses na child abuse o bagarapim pikinini long PNG i senis pinis.

Ol bin glasim, skelim na senisim ol long mu Epril 10, 2003.

PNG i gat nupela na strongpela lo nau long seksuel vailens na child abuse o pasin bitong bagarapim pikinini. Ol nupela lo i givim moa pawa long lukautim ol viktim o ol lida we ol i bagarapim (man na meri wantaim) na ol i kari9m bikpela mekim save tru long husat i brukim ol dispela rul Kriminel Kod o Lo long Seksuel na Ofensis na Evidens Ekt em ol bin gesetim long Epril 10, 2003.

Sapos yu save long sampela lain husat i bungim hevi long ol samting antap, plis ripotim long polis. Ol meri grup na ol sios lain tu. Larim lo i lukautim yu.

Ol dispela lo i karamapim tu ol man na meri we krismas bilong ol i stap antap long 16 yias.

Reip- I egensim o brukim tu long fosim wanpela man o meri i slip wantaim yu.

I egensim lo long putim sem bilong yu long maus bilong narapela sapos ol i no givim tok orait bilong ol. I brukim lo long putim han long as na sem bilong narapela taim ol i no givim tok orait. I brukim lo long suvim olo arapela samting long as na sem bilong narapela. Na em i brukim lo long man i fosim meri bilong em long slip wantaim em sapos em i les o inc givim yesa bilong em. Man bai kalabus inap long 15 krismas sapos em i brukim wanpela long ol lo ya. Na sapos trabel i bikpela tru, man i ken kisim laip kalabus.

Moa long meks wik.

Sotpela tok lukaut

Ol rot bilong famili plening

Pasin bel em i wok olsem wanem?

Em i stopim kiau bilong man na meri long bung. Em i wanpela liklik opesasen tasol docta i wokim long bel. Em mi no map long stopim meri long lukluk skrupin.

Pasin bel em i wok gut tu?

Dispela rot em i opesasen na lukluk. Ol man i kamap na hevi opesasen na meri long kamapim wanem. Sampela liklik opesasen na meri long kamapim wanem.

Dispela rot em i opesasen na lukluk. Ol man i kamap na hevi opesasen na meri long kamapim wanem. Sampela liklik opesasen na meri long kamapim wanem.

Dispela rot em i opesasen na lukluk. Ol man i kamap na hevi opesasen na meri long kamapim wanem. Sampela liklik opesasen na meri long kamapim wanem.



Kuk Kona wantaim MERI WANTOK

Pinat Bata Biskit

Yu mas i gat:

- I kap pinat bata
- I kap suga
- 4-kap plaua
- 1 spun beking pauda
- 2-pela kiau sampela wara

Wel long kukim:

- 1-Miksim pinat bata na suga wantaim insait long bikpela plet.
- 2-Tanim tanim inap em i kamap malumalu tru.
- 3-Nsu, brukim tupela kiau na kapsaitim insait long wantaim pinat bata na suga. Putim i go.

- 4-kapsaitim sampela plaua na beking pauda i go daun long dispela pinat bata.
- 5-Kapsaitim wara isi isi go daun na yu paitim ol samting bai ol samting i hait gut insait na i strong liklik. Noken kapsaitim tumas wara, nugut em i malumalu tumas.
- 6- Nau, grisim praipan o hap kapa o plet ain.
- 7-Hipim bikpela spun long ol dispela samting yu tanim na miksim pinis na kapsaitim i go daun antap long kapa o praipan, inap wanpela biskit i ken kamap long en. Yu ken putim planti wantaim long praipan.
- 8-Nau yu putim long aven na kukim inap em i tan.



• Helen Ikilai i sanap long fran wantaim Enaha Kwa na Joji long ples Panakei long Siwai.

TOKTOK NATING
Wantaim
Fr. Paul Liwun SVD



I gat wanpela man i stap insait long wanpela komyuniti. Em i no smat tumas. Em i fat tasol bodi bilong em i sotpela tru. Pes bilong em i no gutpela tumas. Em i no wanpela mani man. Em i tu i no wanpela saveman. Wanpela lek bilong em i sot olsem na em i wokabaut nogut. Taim em i singsing nek bilong em i save bagarap tru. Nem bilong dispela man em MILO.

Maski em i wankain man olsem tasol em i gat wok. Olgeta de em i wok long wanpela buk stoa tasol em i no kisim bikpela pe. Krismas bilong em i klostu kamap 40 yia, tasol em i no marit yet. Olsem na sampela taim em i sutim tok long God bilong wanem God i no mekim gut long em. Bilong wanem God i bin kamapim/wokim em olsem. I nogat wanpela meri i save givim biknem long em na laikim em.

Wanpela nait taim em i pinis wok na go long haus bilong em, em i bin bihainim wanpela rot i no gat lait long en. Wantu tasol wanpela strongpela raskol i bin kamap na paitim em wantaim wanpela sap poket naip. Raskol i bin putim naip stret long nek bilong em na i tok: "yu givim mi mani o bai mi kilim yu nau?"

Milo i bekim tok bilong em; "Sapos yu laikim mani, kisim tasol olgeta mani bilong mi long poket". Raskol i hariap na rausim olgeta mani long poket na walet long Milo. Milo i stap isi tasol na i no surik liklik.

Dispela bekim i mekim raskol i askim moa long em: "Yu no pret long indai?" Milo i tok: "Mi no pret long indai. Mi no gat wanpela samting long dispela graun. Mi bilong God. Sapos yu kilim mi nau, em i mak olsem yu givim mi i go bek long God". Long harim dispela tok, raskol i askim Milo gen: "Yu wanpela Katolik?"

Taim Milo i tokim em olsem em i wanpela Katolik, raskol i bin putim naip bek long nek bilong Milo na em i tokim Milo olsem: "Mi wanpela raskol bilong Pot Mosbi. Mi bin kilim na bagarapim planti manmeri pinis. Pastaim, mi tu wanpela Katolik. Papa bilong mi i save paitim mama bilong mi na mipela olgeta pikinini bilong em olsem na laip bilong mipela i pulap long hevi na wari tasol. I nogat amamas long laip bilong mipela. Klostu olgeta de Papa bilong mi save spak. Wanpela nait taim em i spak na kam bek long haus, klostu em i kilim mi. Dispela laip insait long famili bilong mipela i bin pusim mi long kamap raskol long dispela ples". Em i tokim Milo olsem: "Mi no save krai long laip bilong mi. Tunait tasol mi krai long pes bilong yu taim mi stori long hevi na wari mi bin karim inap nau. Mi no save bilong wanem mi krai. Mi olsem wanpela long-long man i krai long pes bilong yu".

Bihain long bungim Milo, dispela raskol, i tanim bel na kam bek long laip bilong em olsem wanpela Katolik man insait long komyuniti bilong em.

Olgeta samting inap long ai bilong God. Tingim gut, yumi wan wan i gat prais bilong em. Yumi wanwan i dia tumas long ai bilong God, na em i laik bai yumi olgeta i mas stap amamas olgeta taim.



"Yumi mas wokabaut long lait."

God i save laikim yupela tru, na yupela i stap pikinini bilong em. Olsem na yupela i mas bihainim ol pasin em yet i save mekim. Yupela i mas wokabaut long pasin bilong laikim tru arapela, olsem Krai i bin laikim yumi tru na givim laip bilong em yet bilong helpim yumi. Em i givim laip bilong en long God olsem ofa i gat gutpela switpela smel. Yupela i noken mangalim ol samting bilong arapela. Tok bilong ol disepla pasin tu i noken kamap liklik namel long yupela. I no inap yumi manmeri bilong God i toktok long ol dispela kain pasin. Yupela i noken mekim tok doti na tok krarki na tok pilai nogut. Dispela lain pasin em i no inap long yumi mekim. Nogat. Moabeta yupela i tok tenkyu long God.

Efesus 5: 1 - 7

Caritas PNG mekim singaut long helpim

Veronica Hatutasi i raitim

GUTPELA bekim i wok long kamap long apil o askim long helpim we Caritas PNG i putim i go long pablik na ol sios memba long givim i go long ol pipel bilong Saut Is Esia rijon we sunami o solwara i solap i bagarapim na kilim dai ol.

Bikpela birua tru i bin kamap long Krismas taim, Disemba 26, taim bikpela gurua tru i bin mekim solwara i solap na kilim dai moa long 150,000 pipel na kamapim bagarap long moa long milien pipel long Aceh provins long Indonesia, Tailen, Sri Lanka, India, Maldives, Bangladesh, Myanmar na liklik lain long sampela kantri long Afrika. Mak bilong ol daiman i senis na i wok long go antap yet bikos ol i painim yet ol bodi.

Caritas em i han bilong Katolik Sios na em i wanpela intanesenel helpim ogenaisesen i stap long olgeta hap bilong wol we sios i stap long en. Deputi Nesenel Dairekta bilong Caritas PNG na kodineta bilong helpim i go long sunami apil bilong helpim ol lain kantri na pipel long Saut Is Esia, Raymond Ton, i tok em i amamas long bekim i kam long pablik long apil we Caritas PNG i putim kamap. Dispela apil long helpim bai stap insait long tupela wik tasol.

Em i tok i nogat mak dispela apil i makim long en tasol skelim long ol 19-Katolik daiosis insait long kantri, K20,000 em liklik mak bilong helpim em i lukluk long en.

Caritas i putim apil i go long pablik na tu long olgeta Katolik pipel long PNG insait long wanpela pas ogenaisesen i salim i go long olgeta bisop long PNG.

"Olsem hap bilong bikpela famili, Kristen pasin bilong yumi i singautim yumi long helpim ol lain i bungim bikpela hevi na pen na tu lusim ol famili memba bilong ol long dispela bikpela hevi sunami i kamapim," Mista Ton i tok long apil leta

Caritas PNG em i han bilong Caritas Intanesenelis i beis long Itali. Mani we Caritas PNG i kisim em ol bai bungim wantaim na givim i go long Caritas Oseania we bai putim wantaim ol dispela



Ol woklain bilong Caritas PNG (Ilephan - rait), Jack Siroi, Raymond Ton, Tas Maketu na Cathy Bolinga. Foto: NICKY BERNARD

ol i bungim long Pasifik rijon, Australia na Nu Silan na givim i go long Caritas Intanesenelis na em bai givim donesen i go long Caritas Esia long tilim i go long o netwok bilong ol insait long ol wan wan kantri hevi bilong sunami i kamap long en.

Taim Mista Ton i askim ol Katolik pipel na pablik long givim helpim i tok em i taim long yumi helpim ol lain i stap long hevi bikos planti taim, PNG i save kisim helpim kwiktaim long ausait long taim em i bungim hevi.

"Long makim maus bilong Caritas PNG, mi salim bikpela bel sori tru na laik givim liklik helpim aninit long netwok bilong mipela long soim belsori bilong mipela. Mipela tu i save kisim hevi na pen long ol kain birua na dispela em ol brata susa bilong yumi i stap long hevi na yumi givim helpim long ol. Moa yet, em i taim bilong yumi long putim han bilong yumi i go aut

na soim Kristen pasin olsem yumi save tok yumi wanpela kristen kantri long ol dispela kantri long Esia we i bilong ol arapela sios olsem Muslim. Budis, tru sampela em ol Kristen na ol arapela moa," Mista Ton i tok.

Em i tok i gutpela long givim mani bikos em bai hat long salim ol arapela samting olsem klos na kaikai samting bikos em bai kostim bikpela mani gen long salim i go. Tasol em i tok sapos sampela lain i givim ol klos na kaikai samting, ol bai salim na kisim mani long em na putim wantaim ol arapela mani donesen na salim i go.

Olgeta donesen em ol bai givim luksave na ol bai rekotim olgeta donesen. Sapos ol memba bilong pablik i laik salim helpim mani long Caritas PNG, yu ken wokim dposit i go long Caritas PNG, Akaun namba: 717856801, Westpac Bank Limited, Waigani Branch.

Taim bilong givim Gutpela piksa long helpim

TAIM nau olsem bikpela bagarap bilong sunami i kamap long Saut Is Esia em i tes o traim taim long ol manmeri bilong graun long kam fowet na givim helpim, Jenerel Seketeri bilong Konferens bilong ol Katolik Bisop (CBC), Lawrence Stephens i tok.

Em i tok bikpela bel sori tru i kamap long ol planti tausen manmeri i bin dai na planti milien moa long 4-pela kantri i kisim bagarap na lusim olgeta samting bilong ol i stap. Na em i hop ol donesen we ol ogenaisesen na grup i bungim long helpim ol bai ol i lukautim ol na givim gut long ol.

Em i tok tu olsem bai gutpela long PNG i givim helpim bikos taim hevi i kamap, hariap stret ol ausait kantri na ogenaisesen i save helpim yumi.

"Em bai gutpela tru sapos PNG i givim moa bikos olgeta taim, kantri bilong yumi i save kisim helpim i kam long ausait taim yumi bungim birua, hevi na bagarap. Mi bilip helpim ol i kisim bai go gut long ol na i helpim ol gut. Yumi ken tok tenkyu long Amerika i givim gutpela helpim nau. Mi amamas long lukim na harim long nius olsem ol manmeri long ol strit bilong Kuala lumpa, Bankok na Jakarta i givim helpim, maski dispela bikpela hevi bilong sunami o solwara i solap i

bagarapim laip na sindaun bilong ol na planti i no sindaun gut nau. Disasta o hevi i bagarapim planti kantri, kiasa na kain kain pipel na em i taim nau long wol i soim helpim," Mista Stephens i tok.

Em i tok dispela hevi na bagarap na wok long bungim mani long helpim ol pipel mekim tingting bilong em i go bek long taim bilong bikpela sunami long Aitape long Sandaun provins na hariap fan resing na helpim we ol pipel bilong Is Nu Briten i bin wokim.

"Mi wok long go long Nonga na ol pipel husat i bin bungim hevi bilong maunten paia i wok long pusim wilbaro long resim mani long ol Aitape pipel we sunami i bagarapim ol.

"Leit Sir Alkan Tololo na pipel i bin karim ol donesen i go long Asbisop Karl Hesse na em i tok ol pipel i tingim bek helpim we pipel bilong PNG na ausait i bin givim long ol long 1997 maunten paia hevi na ol i helpim bek ol.

"Long dispela, yumi lukim gutpela lewa bilong pipel long helpim wanpela narapela na dispela i mas kamap tu long dispela bikpela birua i kamap long Saut Is Esia we neiba bilong mipela Indonesia i stap insait na bungim bikpela hevi tru," Mista Stephens i tok.

GUTPELA piksa long helpim na bel sori i wok long kamap long ol lain i dai na kisim bagarap long sunami long Saut Is Esia.

Wanpela meri bilong Morata Setelmen i bin go wantaim pikinini bilong em i bin go kamap long opis bilong Caritas PNG long Gordons na askim long wanem helpim em i ken givim long helpim ol kisim i kisim bagarap.

"Ol famili, wanwan man na husat moa i wok long gat lewa na bel sori na ol i givim. Wanpela long ol em wanpela dispela meri bilong Morata Setelmen i bin kam wantaim pikinini bilong em na askim mipela wanem helpim em inap long givim. Na mi tokim em wanem samting yu givim bai helpim. Na mi save dispela laik bilong helpim i kam insait long lewa bilong em," Raymond Ton em Deputi Nesenel Dairekta bilong Caritas PNG na man husat i go pas long Caritas PNG Sautis Esia Sunami Apil i tok.

Em i tok laki na meri i save long rit na em i lukim apil bilong Caritas long niuspepa na em i go long painimaut na bai i go lukim ol lain bilong em na i kam bek.

Mista Ton i tok long nau, i gat 4-pela grup i wokim apil long helpim ol sunami lain. Em long NCD memba Bill Skate na Embasi bilong Indonesia, Caritas PNG, Sri Lanka komyuniti na PNG Red Cross.

God i stap we?

...Bisop Peter Fox bilong Angliken Sios i givim tingting long sunami

TAIM bikpela birua i kamap, pipel i save putim askim long God i sanap long wanem hap long ol dispela samting. Sampela i save sutim tok long em na tok God i givim mekimsave long ol lain birua i kamap long ol. O ol i tok God i no bisi long ol. Dispela i no stret. Mipela i no kirap nogut oisem pipel i painim ol arapela lain long sutim tok long rong na birua pasin i kamap. Olsem Jisas i bin dai long diwai Kruse long kisim pen tasol em i no wokim wanpela rong. Olsem Buk bilong Isaiiah i tok, "Em bin kisim mekimsave long rong bilong ol narapela."

Nau taim mak bilong ol pipel i dai long birua bilong sunami long Esia i go antap long 150,000 pipel na kos bilong ol hevi na bagarap i go antap long milien na ol lain i kisim bagarap, i lusim ol famili memba, sampela i laik sutim tok long God. Sampela i tok, "Sapos Papa God i laikim tumas mipela, watpo em i no bin stopim solwara i solap we i bagarapim planti laip, bagarapim ol haus na kamapim bikpela pen na hevi long planti pipel?"

Tru, sapos yumi skelim gut yumi, bai yumi klia gut. Wol i no save wok olsem. Yumi noken sutim tok long wanpela man o netsa. Maunten paia, guria, strongpela win na raunwin em ol i hap bilong rot we graun i kamap na em i save senis. Mipela i save amamas long ol naispela samting God i mekim kamap tasol mipela i mas luksave olsem wantaim ol naispela na gutpela samting i gat tu pen, wari, hevi, sik na dai. Watpo na wol o graun i olsem? Mi no save. Mi save tasol olsem plen long Kriesen i no bilong wanpela laiptaim tasol o wan tausen yia. Plen em i bilong oltaim oltaim na hap

bilong plen we liklik planet bilong mipela (graun) i stap long en em ol i skelim long ol bilien yia na i no dispela bagarap sunami i kamapim insait long wanpela wik.

God tasol bai putim mak long eternity o laip bai stap oltaim. Samting we yumi ken wokim em long luksave long God olsem em i gat plen long planet bilong yumi na askim wanem wok bilong yumi long plen bilong em.

Mi save tu olsem Kristen olsem tru yumi mas karim pen na hevi long dispela graun, God i stap wantaim yumi na namel long ol dispela i kisim bikpela bagarap na ol i brukbruk nabaut. Em i stap namel long ol manmeri i helpim long ribildim ples, ol lain i hilim ol na ol edministreta bilong rilip o helpim wok. Kruse em i sainmak olsem sapos pen na hevi i hap long dispela wol yumi stap long en, pasin bilong sori, strong na kirap bek tu.

God i wok long givim mekimsave long yumi? Nogat tru. Em bin dai long seivim yumi long ol kain mekimsave yumi inap long kisim. God i save kea long ol laik karim pen? Em i kea sapos yumi wokim wankain. Watpo em i no rausim pen? Bikos em i gat gutpela plen long yumi wan wan na sapos yumi lainim long askim ol narapela olsem em i laikim yumi, yumi mas serim pen wantaim em.

Olsem ol pikinini i krai long tudak olsem "O papa, mipela i paul na mipela i no inap long luksave." Na em i tok, "Mi i no inap long mekim kila bikos yupela i yangpela tumas long wol long luksave. Tasol holim han bilong mi na mi save olsem mi gat laik long yupela."

Yumi malolo na tingting, glasim na skelim na askim ol askim we bai kamapim sampela gutpela tingting long dispela kain taim. Bai yumi wokim wanem samting long helpim ol.

Ol Katolik pipel long Amerika givim K25 milien helpim

KATOLIK Rilif Sevis (CRS) bilong Amerika bai givim K25 milien olsem imejensi rilif na tu, long karimaut ol arapela progrem long helpim ol pipel bilong Saut Is Esia we bikpela sunami is bin bagarapim ol wanpela de bihain tasol long Krismas De.

Dispela manimak em i bikpela tru na i US \$10 milien sot tasol long dispela manimak we gavman bilong Amerika i katim long helpim ol kantri we sunami i bagarapim tru.

Mak bilong pipel we sunami i kilim i abrusim 150,000 pipel nau.

Na planti milien pipel moa long Aceh provins long Indonesia, Tailen, Sri Lanka na India i nogat haus, nogat klinpela wara, kaikai o marasin.

CRS i stap long Baltimo Stet long Amerika na em i opisel intanesenel humeniterien ogenaissen bilong ol Katolik komyuniti long Amerika na mani mak ogenaissen i givim em i wanpela bikpela helpim donesen we wanpela grup i givim long wol i kam inap long nau.

"Mipela i mas wokim samting long helpim ol pipel long hevi na givim

long laik na gutpela tingting long helpim ol lain i stap long hevi," Ken Hackett em Presiden na Sief Eksekutyutiv Opisa bilong CRS i tok.

Mausmeri bilong grup Caroline Brennan i tok ol bai givim aut mani long ol progrem ol i kiirapim bilong helpim pipel long em.

Ol woklain bilong CRS long Sautis Esia rijon i wok nau wantaim ol asples poroman grup long India, Sri Lanka, Tailen na Indonesia long kirapim ol progrem long helpim pipel long en long baim kaikai, wara, haus, marasin, klos na ol samting long yusim long kuk, kaikai na slip long ol.

Asbisop bilong Wasington em Kadinel Theodore McCarrick bai lukluk raun i go long Sri Lanka long lukim em yet ol bagarap we sunami i bin kamapim long hap.

Em bai lukim na kisim ol ripot i go bek long ol atoriti na pipel bilong Amerika na ol i ken givim helpim.

Asbisop Theodore bai raun i go long Sri Lanka long neks wik Trinde Jenuari 11.

Dispela helpim bai amamasim ol pipel long hap.

Pop John Paul 2 askim sapot long ol Kristen manmeri



• Wanpela man, Rizal Shah Putra husat i bin kisim bagarap long birua bilong sunami long Malaysia. Tupela lek bilong em i bagarap. Ol niuslain i wok long traime kisim stori bilong em. Foto: AP/ANDY WONG

HETMAN bilong Katolik sios long wol pop John Paul 2 i askim ol bilip manmeri long sapotim na givim bilong helpim ol pipel long Sautis Esia we sunami i givim ol bikpela hevi, bagarap na dai long ol. Na nau i gat pret long sik na dai bai bungim planti gen long ol

dispela we i no bin dai long birua. Taim Pop i tok em i stap wantaim ol pipel i kisim bagarap long preia bilong em, em i luksave tu long intenesenel komyuniti na ol planti humeniterien o helpim grup husat i kam kwik long helpim ol pipel long Indonesia, Sri Lanka, India na Tailen we bagarap i bin bikpela moa na planti tausen tru i dai na planti milien moa i nogat haus, i kisim bagarap na lusim ol famili bilong ol.

Em i tok planti sios na ol sariti ogenaissen i givim helpim bilong ol pinis long dispela hevi


Long wankain taim tu, Konferens bilong ol Katolik Bisop long Sri Lanka i singaut long ol pipel long strongim ol

yet long dispela taim bilong hevi. Na ol i askim ol Katolik pipel na ol arapela long helpim ol dispela i bungim hevi, maski ol i bilong ol narapela lotu o tokples.

Presiden na Jenerel Seketeri bilong Episkopal Konferens Bisop Joseph Vianney Fernando na Marius Peirus i askim ol dispela i stap long hap hevi i kamap long en bilong stap isi na bihainim lo na ol dispela i laik wokim trabel long noken na noken wokim profit long hevi bilong ol arapela brata na susa bilong ol.

Ol i askim tu ol dispela we hevi i no kisim ol long givim mani na ol arapela helpim i go long ol dispela i stap long hevi. Ol bin askim tu ol Katolik pipel long bung wantaim na pre long askim Bikpela i givim strong long daunim ol bikpela birua olsem.

"Dispela taim bilong bikpela sori i singautim mipela long kam bung wantaim na pre raunim ol lain we dispela bikpela birua i kamapim hevi na bagarap," ol Bisop i bin tok.



Kaiba bilong King...Narakain Kaiba i op long Mosbi long dispela wik. Cuisine Melanesia em nupela ples yu ken painim kaikai bilong PNG stret na tu, kaikai bilong strongim bodi na spirituel sait. Vitus na Emily Dalma bilong Simbu provins em ol papa bilong dispela nupela kaiba i stap long First Heritage bilding klostu long Holiday Inn long Waigani. Lukim stori long neks wik. Grace Maai, Faith Kene em tupela susa na Pasto Jeremiah Wala i lukluk long ol Baibel na ol arapela lotu buk we pablik inap long baim hia taim ol i kam long painim lans, ti o dina. Foto: AIVA TAMATE-PNG BIBLE SOCIETY

Angliken Sios bai sapotim Gavman

Veronica Hatutasi i raitim

ANGLIKEN Sios long Papua Niugini bai sapotim ol fan resing wok we Nesanel Gavman i wokim long helpim ol pipel long Saut Is Esia we sunami i bagarapim ol, Bisop Peter Fox i tok.

Em i tok em na lain bilong em i wok long bung wantaim na skelim ol toktoks long traime luksave wanem ejensi ol bai givim sapot long ol fanresing na helpim wok.

"Mipela inap long wokim wanem samting? Olsem wanem long mipela inap long sapotim

Nesanel Gavman long ol wok em bai mekim. Mipela i wetim tasol gavman long tokaut long ples bilong em na bai mipela i sapotim," Bisop Peter i tok.

Long wankain taim tu, Bisop Peter i singautim ol Angliken Sios memba long sapotim ol pipel i dai na bungim hevi long Esia sunami. Na bikpela samting em i tok em long sapotim ol narapela grup husat i givim helpim.

Em i tok tu olsem em i laikim bai ol Intafeit grup i bung wantaim na wokim samting long helpim ol lain long hevi.

Nius Bilong HIV AIDS

Tok Lukaut



Wantok David Ephraim

YES welkam nau long nupela yia 2005. Long dispela yia bai yumi toktok na painim aut ol planti nupela ol rot long daunim na stopim HIV AIDS long bagarapim kantri bilong yumi.

Long las yia 2004, mi bilip olsem yupela ol rita bilong mi i bin lainim planti nupela samting long daunim na abrusim HIV AIDS long laip bilong yupela.

Long dispela yia bai yumi stat wantaim ol nupela het tok o gol, long helpim yu luksave long wokim wok bilong daunim na abrusim HIV AIDS.

Bikpela het toktok bilong 2005 em long "Noken larim tudak pasin bilong bipo i bagarapim gutpela futsa bilong yumi." Dispela em long toksave olsem samting bilong las yia em i go pinis. Nupela yia i kam yumi lainim na mov i go insait wantaim bel isi.

Mi laik tok olsem HIV AIDS stap pinis long kantri. 2004 i go pinis na 2005 i kam pinis, yu gat wanem kain tingting nau long daunim HIV AIDS long kantri. Taim nau bilong wok bung wantaim.

Sapos yu wanpela man o meri we yu wok long pret yet long ol helt ripot olsem long 2010 o 2020 planti manmeri bai dai long HIV AIDS. Em nau i taim bilong yu long lainim moa long HIV AIDS. Dispela i ken helpim yu long abrusim HIV AIDS na tu i kem helpim yu long daunim namba bilong ol manmeri husat i bai dai long HIV AIDS olsem ol ripot i tok.

Mi bilip 2005 bai i hat moa na mi laik tok olsem yumi save kolim yumi yet kristen kantri, em nau taim bilong soim stret kala bilong kristen kantri long wol long dispela yia.

HIV AIDS stap pinis nupela yia i kam bai yumi wokim wanem nau? Noken larim pasin tudak bilong las yia i bagarapim dispela yia. HIV AIDS stap pinis tingting gut na wokabaut long yia 2005. Hapi Niu Yia.

2005 em i nupela yia na long tok lukaut bai mi toktok strong long yupela ol ridas bilong mi long stat kirap na toktok strong long daunim na rausim HIV AIDS long kantri bilong yumi.

Dispela yia bai hat moa na wanem samting yu lainim las yia noken lus tingting. Dispela bai helpim yu abrusim birua olsem sik HIV AIDS.

Long daunim na rausim HIV AIDS yumi mas harim toktok bilong ol manmeri husat i save kempein long daunim HIV AIDS.

Pret i save kam long ol manmeri taim ol i no save harim toktok. Planti pipel bilong yumi i no save long rit na rait. Long helpim ol yumi ol manmeri husat save long rit na rait i mas toktok na soim gutpela rot we bai helpim ol long luksave long dispela birua HIV AIDS.

Wantok helpim wantok pasin em i gutpela rot bilong helpim ol narapela.

Tasol dispela pasin i wok long dai isi isi. Taim developmen i wok long kantri bilong yumi.

Planti save manmeri i save tok developmen i gutpela long ikononi bilong kantri tasol i nogut long pasin kastom bilong yumi.

Long holim yet pasin kastom bilong yumi ol het manmeri bilong ples i mas toktok na painim rot bilong kisim intres bilong ol yangpela manmeri.

Nau yet planti yangpela i paul yet long pasin kastom bilong ol na long kirap bilong HIV AIDS long kantri dispela i mekim i hat moa.

Yumi mas stat long holim strong ol pasin kastom bilong yumi. Dispela i ken helpim long daunim HIV AIDS. HIV AIDS stap pinis tingim na holim strong pasin wantok helpim wantok.

Tisa bilong UPNG bai go wok ovasis

Desney Koimo i raitim

WANPELA leksera o tisa bilong Yunivesiti bilong Papua Niugini (UPNG) bai kamap ges leksera long 4-pela yunivesiti insait long Yurop na Yunaitet Kingdom na bai ritim wanpela pepa bilong em tu long wanpela intanesenel akademi konfrens long Yunaitet Stets ov Amerika long dispela mun.

Profesa Kenneth Sumbuk husat i gat digri olsem Dokta ov Philosophy na tu long dispela het tok Linguistic o ol tokples bai mekim dispela wokabaut.

Profesa Sumbuk i tok dispela kain

ol wokabaut i soim piksa bilong UPNG long wol insait long intanesenel akademi mep.

Em bai statim toktok bilong em long Graz Yunivesiti long Austria long Januari 18 na bihain bai go long ol arapela ol yunivesiti olsem Surrey long Yunaitet Kingdom na Oxford Yunivesiti.

Profesa Sumbuk i bin givim toktok long ol kain pepa olsem pastaim na bai em i mekim wanpela long dispela yia.

Pepa we Profesa bai toktok long em bai fukluk long Linguistic Ecology we nau yet i wanpela nupela rot long

rises bilong ol tokples.

Em i tok planti manmeri na Gavman tu i no save yet olsem ol kain kain tokples insait long wol we Papua Niugini i wanpela bilong ol dispela ples i bikpela samting.

"Dispela stadi bilong ol kain kain tokples i lukluk long rot man nau i stap long wan wan hap ples bilong em na tu long rot we mipela i ken lukautim dispela tumbuna pasin insait long wol" Profesa Sumbuk i tok.

Profesa Sumbuk bai lusim kantri long namba 6 de bilong dispela mun long go mekim dispela bikpela wokabaut bilong em.



Hatwok karim kaikai...Liklik Joe Kanekane i go kisim setifiket bilong em long han bilong ol bikman bilong skul long las yia taim em i laik pasim skul. Foto: YAKAM KELO

Luksave long ol hevi i stap insait long Papua Niugini

PASIN bilong las long luksave i ken kamapim bikpela hevi insait long komyuniti na kantri long wanem mipela i no laik long luksave long ol hevi we i wok long bungim mipela.

Memba bilong Anglimp Saut Waghi, Jamie Maxtone-Graham, i mekim dispela tok long Niu Yia toktok bilong em i go long ol pipel bilong ilektoret bilong em na tu long olgeta manmeri insait long Papua Niugini.

Liklik o nogat infomesen o toksave insait long ol distrik i wok long lukim ol pipel i stap long tudak long planti samting we i wok long daunim developmen insait long kantri.

Mista Maxtone-Graham i tok kain ol hevi olsem HIV

AIDS, Lo na Oda, Praimeri helt ke na ol arapela hevi i bin pasim rot bilong kantri long go yet long developmen long las 30 yia.

"Mi bilip olsem save na inap infomesen bai givim pawa long ol pipel long daunim pasin bilong las long luksave"em i tok.

Mista Maxtone-Graham i laik strongim edukesen tu insait long kantri.

Plen bilong Mista Maxtone-Graham em long mekim ol Infomesen Risos Senta insait long ilektoret bilong em na pulapim ol wantaim ol kompyuta bilong ol lain long ples long kisim sampela save long rot bilong yusim kompyuta.

Save mas kam bek long PNG

Desney Koimo i raitim

AS TINGTING bilong salim ol sumatin i go stadi long ovasis em bilong ol long bringim bek wanem kain save ol i kisim i kam bek na developim Papua Niugini.

John Davidson husat i het bilong AusAID insait long PNG i mekim dispela tok bihain long em i tokaut long namba bilong ol lain husat i winim ADS skolasip long go stadi long Australia.

Namba olsem 130-sumatin bai go stadi long Australia long 2005 aninit long Australian Development Scheme (ADS). Wanpela skolasip aninit long ADS i save kostim olsem K70, 000 long wanpela yia na i save karamapim tu we tiket long go long Australia na kam bek, skul fi na ol arapela fi olsem helt insurance, poket mani na potnait

mani long stap long bilong ol long Auatralia.

"ADS i save givim sans long ol sumatin bilong PNG na ol arapela Developing kantri long go skul long Australia," Mista Davidson i tok.

Ol sumatin husat i winim dispela skolasip em ol i putim ol aninit long wanpela 6 mun seleksen bilong lukim sapos ol i gat dispela jenerel elijibiliti na spesifik save ol i gat pinis long PNG. Dispela rot i bilong lukim sapos ol i gat bikpela save inap long ol i ken go kamapim resis namel wantaim ol sumatin long skul bilong ovasis.

Dispela 130 sumatin husat bai go skul long Australia bai bringim namba bilong olgeta PNG sumatin i go antap long klostu 400. Namel long dispela 130 sumatin 48 bai mekim postgraduate stadi, 52 bai mekim ol setifiket, diploma na advens diploma stadi, 26

bai mekim undergraduate digri na 4pela sumatin bai mekim PhD stadi bilong ol.

Mista Davidson i tok ol bai mekim dispela ol stadi progrem bilong ol long wanwan bilong ol 19 yunivesiti inait long Australia.

Skolasip em ol i givim long tripela katagori. Namba wan em pablik sekta we Gavman i ken makim ol lain long go skul, tu em ol privat aplikens husat ol kampani i ken sponsorim ol na namba tri em open katagori we ol i save kisim ol lain husat ol yet i aplai bikos ol i gat gutpela mak na i pilim olsem ol inap long resis insait long ol ovasis skul.

Dispela 130 sumatin em ol i makim kam long olgeta provins bilong Papua Niugini na bai lusim kantri namel long mun Jenuari na Febuari bilong 2005 long go long Australia.



BERNARD MALLE
Helpim ol pikinini
long rausim
Alkohol na drag

Hepi Nu Yia 2005

long yupela olgeta

Pastaim tru yumi ken tok amamas long yumi yet long winim pinis dispela yia na bungim gen nupela yia.

Nupela yia i kam wantaim ol nupela salens bilong em. Yumi mas redi long bungim ol dispela salens.

Yumi mas noken lus tingting long ol pren, wantok na famili bilong yumi. Yumi tok hepi niu yia long ol. Ol i stap na yumi stap. Sapos yu gat birua wantaim wanpela orait yumi mas sekan na pogivim rong bilong ol. Yu ken statim nupela yia wantaim nupela na gutpela tingting na klinpela bel.

Planti man na meri nau bai i wok long mekim promis long bihainim sampela kain laip i save givim bel isi long ol. Nu yia em taim tru long statim dispela senis. Planti bai promis long lusim ol kainkain pasin i save givim bel hevi long ol. Ol kain pasin olsem kros, pait, birua, stil, raskol, les, giaman kusai. Em i gutpela tru. Bikos ol dispela pasin i no save kamapim amamas na gutpela sindaun. Olsem na yumi mas senisim na rausim olgeta dispela pasin long laip bilong yumi.

Mi taik bringim long yu wanpela stori bilong senisim laip.

Patrick em i wanpela yet na i bilog ples Gollala long boda bilong Morobe na Sentral Provins. Tasol nau em i stap long Hohola basketbol kots na em i bungim mi. na em i stori long mi olsem:

Mi wanpela man bilong slip na kirap wantaim mariwana. Em i kaikai bilong mi tru. Long ples bilong mi dispela mariwana i save gro wail. Wanpela de mi bin painim sik. Na mi wok long ting olsem mi kisim sik malaria. Tasol pen insait long bodi i no save pinismaski mi kisim klorokwin. Mi save kisim pen long het, lewa na olgeta hap bilong bodi bilong mi we blut i save ron long en.

Wanpela de mi kisim sampela pren bilong mi i go long Mosbi na lusim ol long Tapini ples balus. Long hap mi kisim wanpela *Wantok Niuspepa* na ritim. Mi ritim stori bilong hau mariwana i save bagarapim laip bilong man. Mi ritim na mi ritim gen. Na mi kisim tingting nau. Na mi lainim pinis olsem mi kisim sik long mariwana na i no long malaria. Inap long nau mi promis long bai mi noken tasim mariwana. Mi lusim olgeta. Na mi lusim Gollala na mi kam pinis long Mosbi.

Em stori bilong Patrick.

Planti yut i wok long smok mariwana tasol ol i no save olsem dispela smok i wok long bagarapim helt bilong ol.

Mariwana em i drag nogut. Em i gat 421 ol kemikel kompaun (posin nogut) i stap long em. 61 bilong ol dispela Kemikel kompaun ol i kolim ol Delta-9 tetra hydri Canabihol o THC. Na dispela THC tasol i save bagarapim helt bilong ol man. Ol dispela 61 THC i save laik long kaikai gris bilong ol man. Na long bodi bilong man i gat kain hap ples olsem het kru, hat, leva, lang o bokis win, kidni o bokis wara, ples bilong kamapim nupela laip na nupela bebi i stap long bel bilong mama i hap bilong bodi we i gat gris.

THC i save stap longpela taim tru long dispela hap bilong bodi inap long tupela o tripela de. Na long dispela taim i ken kaikai na bagarapim bodi. Ol saientis i no painim aut wanem ol arapela 360 kemikel kompaun i stap yet i save wokim insait long bodi. Sapos yu wanpela man i save smok mariwana i moabeta yu lusim olgeta nau. Yu ken lukautim bodi bilong yu wantaim gutpela kaikai, malolo na pitai spot.

Long dispela yia 2005, yumi bai lukluk i go insait moa yet long ol kain kain nupela drag i wok long kam insait long Papua Niugini. Noken lusim *Wantok*. Ritim long olgeta wik.

Hepi Nu yia- 2005. Moa stori neks wik.

Planti stail i kamap long amamasim niu yia

Joe Ivaharia i raitim

PLANTI pipel insait long kantri i bin kamapim kain kain pilai na ol samting long amamasim nupela yia 2005 na tok gutbai long 2004.

Ol bin mekim ol liklik pati bilong ol yet long haus na eria bilong ol we i no bin gat ol kain bikpela trabel olsem ol arapela yia.

Na dispela em yumi mas tok tenkyu long ol polis manmeri long wanwan hap senta bilong kantri long kamapim ol rot blok na karimaut ol patrol long ol strit na kompaun wantaim ol ples o setelmen eria.

Long Mosbi yet planti ol bikpela nait klap olsem Lamana Gold klab, The

Junction, Warehouse na Star-gazer wantaim ol arapela liklik klab i bin kamapim ol bikpela pati bilong ol ges bilong ol.

Olgeta klab i bin pulap tru bipo long 10 kilok long nait na i no bin gat spes long insait long klab na ausait tu long kar pak we i bin pulap tru.

Long Lamana Gold klab ol i bin kamapim ol paia woks we dispela i save kamap long olgeta yia.

12kilok long biknait stret ol i laitim na skai i bin pulap long kainkain kala tru long dispela ol paia woks.

Ol pati long ol klab i bin go pinis long 6 kilok long bik moning na planti bilong ol pati manmeri i go bek gen long hap bilong ol na pati moa yet.

Long ol wanwan haus na ples ol famili i bin mekim ol mumu na kuk long niu yia de stret Jenuari 01, 2005.

Sampela bilong ol komyuniti i bin kamapim ol spot pilai olsem ragbi lig, voli-bol, netbol na kriket long amamasim dispela dei.

Sori tru planti pik tu i bin lusim laip bilong ol long go stap insait long mumu na pulapim bel bilong ol pipel.

Olgeta strit i bin stap emti o nogat manmeri long rot bikos olgeta i wok long amamas insait long hap eria bilong ol.

Dispela niu yia em kamap gut stret. Yumi mas mekim wankain olsem dispela yia tu.



AMALGAMATED GENERAL WORKERS UNION OF PAPUA NEW GUINEA

AMALGAMATED GENERAL WORKERS UNION OF PAPUA NEW GUINEA BIENNIAL GENERAL ELECTION

Mipela amamas long toksave olsem ol Nesenel Eksekutiv Komiti bilong Amalgamated General Workers Union of Papua New Guinea tem bilong ol long opis em pinis nau na nupela ileksen bai kamap nau.

Ms Vagi Maraga bilong Electoral Commission of Papua New Guinea opis bai ranim dispela ileksen olsem Ritening Ofisa.

Ol Eksekutiv Posisen ol memba bai makim em:

1. Presiden - wanpela tasol na i stap long Mosbi
2. Namba tu Presiden - wanpela tasol na i stap long Mosbi
3. Vice Namba tu Presdien - wanpela tasol na i stap long Mosbi
4. Trustee - tripela (3) i stap long Mosbi
5. 8-pela komiti olsem
 - i. Management Employees Representative
 - ii. Professional Employees Representative
 - iii. Technical Employees Representative
 - iv. Clerical Employees representative
 - v. Semi-skilled Employees Representative
 - vi. General Labourers Employees Representative
 - vii. Women Employees Representative
 - viii. Youth Employees Representative

Nominesen bilong ol eksekutiv bai olsem:

Nominesen bai Op	Mande, 29th Novemba 2004
Nominesen bai Pas	Mande 10th Januari 2005
Postal Vot bai Stat	Mande 24th Januari, 2005
Postal Vot bai Pas	Fraide 25th Februari 2005
Eleksen Risal	Trinde 4th Mas 2005

Biainim lo Pat VII Eleksen, **Rule 14** sub-seksen wan (1), ol memba bilong Yunion husat i stap long Mosbi tasol bai holim ol sia bilong Komiti bilong Yunion olsem inap long liklik taim tasol na Nesenel Eksekutiv stretim. Em i gutpela long bihanim dispela lo bilong wanem Yunion bilong yumi em i nupela tasol.


Mipela salim nominesen fom i kam long makim husat man na meri yu save long en em i stap long Mosbi na memba bilong Yunion.

Ringim Ms Vagi Maraga long telepon namba 325 0675 o Mr Andrew Kanadakasi long telepon namba 325 3758 long kisim moa toktok o nominesen fom.

Mipela bilip olsem yu bai wanbel wantaim mipela long eleksen bilong Yunion bilong yumi.

ANDREW KANDAKASI
 National General Secretary

VAGI MARAGA
 Returning Officer



Pipel singaut yet long ol rot, skul na haus sik

Dia Edita,

Mi laik askim ol lida bilong mipela long Sauten Hailans provins olsem David Basua na Peter O'Niell long harim krai bilong mipela ol pipel bilong Kaure. Mipela i gat bikpela hevi na wari long sait

bilong ol rot, skul na haus sik.

Dispela hevi bilong mipela i bin stap longpela taim i kam nau na mipela i wok long singaut yet long yupela i luksave na mekim sampela eksen long dispela. Em tasol singaut na wari bilong mipela

ol bus lain bilong Kaure insait long Sauten Hailans provins.

NELSON KERESA SAUTEN HAILANS PROVINS

Westen Hailans lukim ovasis sapot

Dia Edita,

Mi laik tok amamas olsem Westen Hailans provins i gat sans tru long lukim han mak bilong ovasis aid mani wantaim helpim bilong Westen Hailans Provinsel Gavman aninit long lidasip bilong Gavana Paias Wingti na WHP administreta Michael Wandil.

Mi amamas tru long lukim ol developmen i kamap long ol rot na bris long WHP. Sampela ol wok

kamap i olsem Minj Mondomil rot, Minj Sigmil rot, Haiwe Hagen Ariam, Kundip Minj bekrot, Mt Ambra rot, bris long Tei distrik na planti moa.

Tenkyu gavana na administreta.

MATT DEDEBOH HOLEYAH NOT WAGHI WESTEN HAILANS PROVINS

Bikpela kos hangamap long Is Sepik edministresen opisa

Dia Edita,

Mi laik raitim dispela pas i go long Wantok Niuspepa na komplem i go long ol pablik na askim Praisim Minista Sir Michael Somare long tokaut long husat bai baim ol bagarap i kamap long opis bilong wanpela sinia opisa tru bilong Is Sepik edministresen.

Em ol kompyuta, potokopi masin, feks na nupela opisel ka em meri bilong dispela sinia pablik seven i draivim na brukim opis bilong em. Olgeta dispela ol bagarap nau i sanap olsem moa long K180,000 na husat tru bai baim ol dispela?

Ating planti taim tru dispela meri bilong Is Sepik edministresen i save draivim ol ka we i gat gavman namba plet.

Olsem wanem nogat draiva na em i nogat PTB Laisens? Em i no praivet ka dispela opisa i baim long poket mani bilong em.

Wanem taim bai Sir Michael i tok-tok long dispela hevi we i kamap?

JOHN KRISAKI WEWAK IS SEPIK PROVINS

Rausim lokel level gavman sistem plis

Dia Edita,

Mi wanpela komiti lida i laik mekim sampela strongpela tok-tok long dispela Lokel Level Gavman sistem (LLG) insait long kantri.

Benson Tiene bilong wod 16 kaunsil eria long Elimbari LLG, Suave distrik bilong Simbu provins i mekim tok olsem dispela LLG sistem bilong gavman i no wok moa na ol i mas rausim.

Mista Teine i tok na long ai bilong mi yet mi lukim olsem LLG i no wok long wanem long hap mi i kam long en long Is Elimbari i nogat gutpela sevis bilong LLG i go insait.

Mi laik tok taim provinsel gavman i stap planti gutpela samting olsem ol sevis i save kamap olsem na mi i laik bai gavman i rausim LLG na bringim bek provinsel gavman sistem.

Mista Teine i tok bai gavman i rausim gavana sistem na kisim bek rijinol memba na primia sistem. Long taim bilong provinsel gavman sistem bipo memba bilong mipela David Goro Mai i bin mekim planti wok insait long provins na ausait long distrik tu.

Mi skekim olsem dispela wok i wankain tasol long wok we nesenel gavman inap long mekim na soim olsem wok bilong nesenel gavman na provinsel gavman i wankain tasol na dispela i gutpela.

Long lukluk bilong mi pawa na wok bilong provinsal gavman i wankain olsem bilong nesenel gavman tasol pawa bilong LLG em i no olsem bilong ol mejistret bilong viles kot.

Long dispela as Mista Teine i tok olsem taim nesenel gavman memba i no i stap long mekim

wok em provinsel memba bai inap kisim ples na wokim wok tasol LLG bai i no inap.

Mi lukim olsem dispela mani bilong LLG i no save kamap long LLG bilong wanem provinsel edministresen i save yusim.

Mi mekim dispela strongpela toktok bilong wanem mi yet mi lukim ol kaunsil presiden ol tu i save yusim planti mani bilong LLG.

Mi laik askim Nesenel Gavman sapos ol i ken senisim dispela LLG sistem na go bek gen i no gat samting i rong wantaim ol memba em sistem bilong gavman tasol i no stret.

WOD KAUNSELA IS ELIMBARI SIMBU PROVINS

Wantok pasin bagarapim wok bung

Dia Edita,

Mi wanpela manki bilong Kimbe taun na mi gat liklik wari long bringim aut long blok bilong mipela. Nau 4-pela yia i go pinis mipela bin stap amamas long wok bilong mipela na nau long dispela yia 2004 mi no ting wok bilong mipela bai wok gut na mi lukim planti man ol i les long komplem na bagarap. Mi laikim ol mas stap isi na noken mekim nabaut long bisnis.

Mararona Keno

Kimbe

Wes Nu Briten provins

Mt Zion lotu bung wantaim kalabus

Dia Edita,

Mi gat sampela toktok we mi laik tokaut long en long Sande bung long Novemba 2004.

Mt Zion kongrigesen i bin singautim ol kalabus i kam wantaim saplin bilong ol na mipela i lotu wantaim. Na tru long lukluk bilong mi mi lukim olsem em i wanpela bikpela samting we mi no bin lukim Luteran sios i wokim bipo taim mi manki yet i kam inap nau mi bikpela man.

Long sait bilong gavman em tambu tru long kisim kalabus i kamaut long pablik. Tasol long God em i isi. Tru tumas mi ken tokim yupela ol pipel bilong PNG olsem dispela kain samting i no bin kamap bipo long Luteran Sios.

Na Mt Zion em wanpela kongrigesen em bikpela blesing bilong God i save stap oltaim. Olsem na God i bekim prea bilong ol bilip manmeri na i opim dua bilong ol kalabus long kamaut lotu wantaim ol

long Mt Zion kongrigesen.

Na dispeal em i wanpela histori long Mt Zion sios insait long Papua Niugini long dispela taim.

Mi gat bikpela amamas tru olsem dispela God mi lotu long em em i ino dai. Em God we husat i save helpim mi na was long mi, lukautim mi na givim kalkai long mi taim mi sot.

Mi yet lukim na bilip tru olsem tru God i stap, olsem na mi no inap pret long man bilong dispela graun. Mi mas pretim God wanpela tasol bikos em i as bilong laip na as bilong dai. Em tasol na bikpela tenkyu na amamas, preis na glori na biknem i go long God wanpela tasol.

DDL 9 MILE MOROBE BLOK MOSBI



Sekim em...Wanpela sekpoin long rot i go long Porgera.
Foto: FR PHILLIP GIBBS

Ol pasindia tekova long kampani kompaun

Dia Edita,

Mi laik komplem long pasin mi save lukim long Kimbe olgeta taim we ol manmeri taim long Kombe na Arowe i save kam pulap olgeta taim long kompaun bilong KCP.

Ol i no save kam isi isi. Ol i gat olgeta taim na mipela ol wokman i kisim taim pinis long baim bikpela pawa bilong lait na bikpela bilong wara. Ol i save kam pulap na westim planti wara na lait bilong kompaun.

Mipela i save baim bikpela bil na dispela i givim mipela ol wokman hat taim olgeta. Waswas bilong ol pasindia bilong Kombe na Arowe i moa moa yet olgeta de.

Ol bai waswas na wasim klos na westim bikpela wara bil tru. Mipela ol wokman yet mipela i no save waswas klostu klostu olsem ol. Mipela waswas long moning na go long wok na waswas long apinun

taim mipela kam long haus.

Olsem na mi laik askim sapos i gat sekyuriti bilong kampani long sekim na rausim ol dispela kain pasindia long kompaun o nogat.

Banis bilong kampani i mas i gat strongpela lo long stopim ol pasindia i kam.

Dispela pasin i stap long olgeta hap bilong kampani long olgeta hap provins tasol Kimbe tasol em dispela i nogat strongpela lo.

Sapos yupela ol pasindia i laik kam long taun tu yupela i mas yusim het na go slip nabaut long sampela hap na i no long banis bilong kampani mipela i stap long en.

Em tasol komplem bilong mi.

ALPET TONNY KIMBE, WES NU BRITEN PROVINS

WANTOK
KOMENTRI

Yumi tu i mas helpim

DISPELA bikpela bagarap bilong solwara o tsunami insait long hap bilong Esia wei kilim moa long 100,000 manmeri i kamap olsem wanpela bikpela bagarap tru insait long wol tude.

Dispela birua nau i kisim stret bel bilong planti tausen manmeri insait long wol tude we ol i wari na sori tru long ol manmeri bilong Indonesia, Tailan, India na Sri Lanka. Planti kantri long wol i givim bikpela helpim wantaim mani na ol samting na tu ol wokmanmeri olsem dokta, ol sosel woka, ol ami na polis bilong helpim long stretim ol bagarap na planti ol masin na kar bilong helpim long karim ol lain i kisim bagarap na stretim ol samting i bagarap.

Gutpela long harim tu olsem Papua Niugin tu i mekim wankain pasin long soim han bilong yumi long dispela bikpela bagarap long ol dispela kantri. PNG em wanpela kantri we yumi save kisim taim long ol kainkain bagarap olsem solwara i tait, bikpela drai, volkenu na arapela moa na ol ovasis kantri i save hariap long helpim mipela.

Olsem na gutpela long mipela tu i soim han bilong mipela long liklik helpim bilong mipela. Maski i no bikpela tasol mipela i mas soim olsem yumi sori tu wantaim ol long dispela buria na bagarap we i bagarapim laip bilong planti tausen manmeri bilong ol dispela kantri long Esia.

PNG i no moa stap olsem em yet long bipo taim bilong tumbuna. Nau em yumi save pinis long ol manmeri bilong narapela kantri na ol tu i save long yumi pinis. Nau em i olsem wanpela bikpela komyuniti insait long dispela ples graun we yumi kainkain skin kala i stap long en. Olsem na han bilong yumi i mas i go i kam long narapela narapela long taim bilong hevi na birua olsem.

Plis olgeta pipel bilong Papua Niugini, givim han. Tromoi liklik wan siling yu ken givim long ol hap we yu save olsem ol i wok long bungim helpim bilong salim i go long ol lain i kisim bagarap long tsunami long Esia.



Nau yu lukim lait bilong 2005

Las wik mi stori long sampela lain i bin soim pes long ol narapela long Krismas taim. Mi bin stori moa olsem i gutpela long ol manmeri i soim pes bilong ol long ol narapela brata susa bikos Bikpela i tingim yumi, na i kam soim pes bilong em, long dispela graun long Krismas de.

Mi bin surikim moa long las wik olsem bikos Jisas i soim pes long yumi, yumi bin soim pes long ol narapela long gutpela pasin bilong yumi, na dispela pes bilong yumi i ken lukim 2005.

Long Fraide nait, taim kilok i sanap 1 minit i abrusim 12 kilok, long dispela taim, 2005 i bin kamap. Long moning, yumi bin lukim nupela lait bilong nupela yia. Mi tok leit hepi niu yia long yu.

Olsem mi bin tok las wik, long Krismas de stret, Gavana Jenerel, Sir Paulias Matane, i go lukim ol kalabus manmeri long Bomana Haus Kalabus. Toktok em i mekim long dispela taim em "Yumi mas traim long sensim pasin bilong yumi long niu yia na mekim kantri bilong yumi i kamap naispela ples long stap."

Long Tunde, mi bin go long Nesenel Palamen. Mi go pinisim wanpela wok mi



TOK PISIN
wantaim
PETER MAIME

bin gat long hap na bihain wokabut i go bek long opis bilong mi long Waigani. Namel long rot em i bin ren na mi go hait aninit long Painapel Bilding (Pineapple Building). Planti arapela manmeri tu i bin hait long dispela haus.

Bihain liklik, taim PNG i kisim independens, dispela haus i bin holim planti ol gavman dipatmen, ol sekreteri na ol gavman minista. Nau dispela haus i bagarap na i sanap nating. Olgeta samting i go pinis na ol ain na simen pos tasol i sanap. Gavman i bin toktok long stretim dispela haus tasol mipela i no save wanem taim stret dispela wok bai kamap.

Taim dispela haus i nupela, mi no ting olsem planti lain husat i bin yusim i ting dispela haus bai wanpela taim bagarap na i sanap nating olsem. Tasol nogat.

Dispela haus nau i bagarap na i luk turagu i stap.

Sir Paulias Matane i tokim ol kalabus manmeri long Bomana olsem, yumi mas senisim laip bilong yumi long niu yia, na mekim i kamap gutpela.

Mi laik surikim toktok bilong Gavana Jenerel olsem laip bilong yumi, famili, ples, provins na kantri bilong yumi i olsem dispela Painapel Bilding.

Yumi nau ting olsem laip bilong yumi, famili bilong yumi, ples, provins na kantri bai i stap olsem wankain tumoro. Em i tru, sapos yumi was gut na lukautim yumi yet na ples yumi stap long en.

Sapos yumi i no lukautim laip bilong yumi na ol famili, pipel na ples yumi stap long en, bai yumi luk turagu olsem dispela olpela gavman opis long Waigani, long Pot Mosbi.

Mi hop yu bringim sampela gutpela senis long laip bilong yu, famili bilong yu, pipel bilong yu na ples bilong yu long 2005.

Wanpela taim gen, hepi niu yia long yu.

Wokboi Nating Bilong Olgeta man



OL PRINSIPOL BILONG GUTPELA LIDA
wantaim
Pastor na Evangelist OHARE JABERE

Lida i bin mekim dispela wok bilong Bikpela (Luk 17:7-10). Tingim wok God i bin givim long Jisas. Em i no slek long mekim (Jon 9.4) Jisas i pinisim wok God i bin givim em, na long dispela pasin em i givim biknem long God (Jon 17:4).

Ol lida tu i mas bihainim Krai olsem: Taim gutpela lida

i pinisim wok God i bin givim em, orait bai bikpela Jisas Krai i tokim em olsem yu gutpela wokboi yu bin mekim gut-

pela wok tumas (matyu 25: 23) Taim lida i harim, bai em i amamas tru.

Lida i mas klia long dispela tok "wokman." Baibel i tok lida i gat tripela wok em wokman bilong God, wokman bilong helpim arapela manmeri nam-baut, na wokman bilong Sios.

As bilong dispela tok i olsem :taim lida i pinisim gutpela wok, ol i noken tingting long kisim biknem. Nogat.

WANTOK

Published Weekly, Wednesday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: 325 2500
Fax: 325 2579
Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Yakam Kelo

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Published by Jeremy Burgess and printed by Pacific Star-P.O. Box 6817 Boroko NCD at allotment 13 section 38 Waigani drive, Port Moresby

WOL NIUS WOL NIUS WOL NIUS WOL NIUS



WOL NIUS WOL NIUS WOL NIUS WOL NIUS

Amamas long Niu Yia

Rome:

Man Itali, Marco Fois, i kalap long Cavour bris long Rome i go daun long Wara Tiber. Dispela em we sampela ol pipel long hap i save amamasim niu yia de.



Elvis i stap yet?

Amerika:

Wanpela so long Memphis, we i soim ol piksa o filim bilong pastaim biknem singa ol i save kolim King bilong Rock na Roll, Elvis Presley, i soim olsem planti pipel i no lus tingting long dispela stail musik man yet. Poto: AFP/Fail/Alan



Putim was

India:

Tupela meri husat i bin bungim

birua bilong sunami o wara solap long India i sanap lukiuk i go long san i go daun long solwara long komyniti bilong Nagattipatinam. Poto: AFP/Emmanuel Dunand



Harim krai

Sri Lanka:

Wanpela yangpela manki Tamil stop krai bihain long em ksim karkai long sampela ol lokal eid wokmanmeri long wanpela refuji kem long viles bilong Palai long not isten Sri Lanka. Poto: AP/Wally Santana



Goliath

Amerika:

Wanpela animol ol i save kolim white-tail buck deer we i save stap long Amerika. Nem bilong dispela deer em Goliath na em i sanap long graun bilong Rodney na Diane Miller long fam bilong ol long Knox. Goliath i bin dai long Disemba 6, 2004. Prais bilong ol hon bilong em, ol i save kolim rack, em inap long sampela hundred tausen dola. Poto: AP/Keith Srakocic



Holim pasim

Irak:

Ol ami bilong Amerika i taitim han bilong wanpela man ol i bilip i bin kamapim sampela birua, long salt bilong helpim ol paitman, long Irak. Dispela man Irak em ol i holim pasim em long Fallujah. Poto: AFP/Hrvoje Polan



Em wanem?

Australia:

Shane Warne bilong Australia i amamas bihain long em i autim Yasir Hameed bilong Pakistan long namba tri tes bilong cricket gem namei long Australia na Pakistan long Sidni long Jenuari 5, 2005. Poto: Reuters/David Gray

Ol pipel i ting wanem long birua long Esia?

Yu ting gavman i hariap long givim helpim o nogat?

Planti manmeri i sori i kamao hevi i kamap long ol kantri long Esia. Na olsem planti i sori na laik helpim ol ting dis-
pela em i wok wantaim Guardmark Sekyuriti kampani. Em i tok mipela i mas givim helpim i go long ol. "Mi pilim sori tru long ol. Planti manmeri i kisim bagarap, i lusim laip na husat i stap i stap olsem turangu. Yumi mas helpim ol. Wankain olsem ol i bin helpim mipela taim hevi i kamap long mipela long Aitape yumi mas bekim helpim em ol i givim long mipela. Taim mipela i kisim bagarap ol i bin kam hariap na givim helpim na olsem yumi wankain wei i mas hariap long givim helpim. Mi amamas long harim olsem gavman i tok long helpim ol taso i no hariap. Em i kisim longpela taim long tokaut long tingting bilong em na wanem taim tru bai em i givim helpim. Ol lain husat i stap nau i laikim helpim nau. I no bhain taim."




Ume Konoba

Ume Konoba i bilong Gabadi Sentral provins na em i wok wantaim Kantri Klab long Pot Mosbi. Em i tok kantri i mas givim helpim i go long ol pipel husat i stap long dispela hevi. "Gavman i wok long isi tumas long givim helpim. Taim mipela i kisim bagarap long Aitape ol narapela kantri i kam hariap na givim helpim na olsem long wankain we yumi mas helpim ol tu. Mi sori tru long kain birua i kamap. I nogat kain hevi i kamap long taim mipela i save long Buk Baibel we i tok long wara i kilim ol man long taim bilong Noah. Tasol nau em i namba wan taim long lukim kain bikpela hevi i kamap. Na i no bagarapim wampela ples taso. Wara i kisim planti ol ples."




Daure Mavara

Daure Mavara i bilong Tatana, Nesenel Kapitel Distrik na em i save wok wantaim Kantri Klab. Em i nogat planti toktok long mekim. "Mi i no inap tok planti. Aiwara bilong i kam taim mi lukim ol piksa. Em i bikpela bagarap. Mi sori tru long lukim ol turangu. Ol i no save olsem ol bai bungim dispela hevi. Hevi i kamap nating long ol. Planti i lusim laip bilong ol. Na planti moa i kisim bagarap. Nau yet planti i nogat ples bilong slip, klos na kaikai. Mi sori tumas."



Elias Robin

Elias Robin i bilong Angoram, Is Sepik provins na em i wok wantaim Guardmark Sekyuriti kampani. Em i tok mipela i mas givim helpim i go long ol. "Mi pilim sori tru long ol. Planti manmeri i kisim bagarap, i lusim laip na husat i stap i stap olsem turangu. Yumi mas helpim ol. Wankain olsem ol i bin helpim mipela taim hevi i kamap long mipela long Aitape yumi mas bekim helpim em ol i givim long mipela. Taim mipela i kisim bagarap ol i bin kam hariap na givim helpim na olsem yumi wankain wei i mas hariap long givim helpim. Mi amamas long harim olsem gavman i tok long helpim ol taso i no hariap. Em i kisim longpela taim long tokaut long tingting bilong em na wanem taim tru bai em i givim helpim. Ol lain husat i stap nau i laikim helpim nau. I no bhain taim."



Job Jokona

Job Jokona i bilong Pori, Sauten Hailans provins na em i wok wantaim Millenium Sekyuriti long Gordons. Em i tok dispela bagarap em i bikpela tru. "Mi no lukim wampela kain hevi olsem i kamap inap nau mi lukim. Dispela em i wampela bikpela birua. Sori tru long dispela ol lain husat i kisim bagarap long em. Moa long ol lain husat i stap nau na i lusim famili bilong ol. Mi laik yumi olgeta i mas helpim long sampela kain wei na givim sapot long ol. Tasol nau yet gavman bilong mipela i isi tumas long tokaut long tingting bilong em long taim hevi i kamap na long givim helpim. Wanem taim tru em bai salim helpim i go long dispela ol kantri?" Jokona i askim.



Pou Lau

Pou Lau i bilong Kerema, Galp provins na em i wok wantaim Coca Cola kampani long Gordons. Em i tok mipela i ken helpim. "Em i bikpela birua tumas. Mi sori tru long lukim ol. Yumi ken helpim. Taim yumi kisim bagarap long Aitape ol i bin helpim mipela na olsem mipela i mas bekim helpim bilong ol. Dispela em i plen bilong God na olsem kain birua i kamap. Mipela i nogat wei long stopim. Tasol mipela i ken helpim long wanem kain wei em mipela i ken mekim. Bel bilong mi i hevi tumas long ol. Mipela ol bilip manmeri i prea long ol na ating olgeta manmeri husat i save i prea long ol tu."



Simpson Thomas

Simpson Thomas i bilong Boroi, Bogia Madang provins na em i wok wantaim Bourani Diesel kampani long Gordons. Em i tok mipela i mas givim helpim. "Yumi mas givim helpim. I gutpela long harim tok olsem gavman i laik helpim. Yumi mas givim helpim hariap nau long dispela taim planti manmeri i wok long hangre, nogat klos na ples bilong silip. Mama bilong mi em i lukim na krai. Mipela olgeta i sori tru long lukim. Dispela kain hevi i no bin kamap bipo long taim histori. Tru long Buk Baibel yes mipela i ritim na save olsem bikpela wara i kilim ol manmeri long taim bilong Noah tasol long trupela histori i nogat wampela stori i kamap long kain solwara i kilim ol manmeri i dai."



Albert Jaren

Albert Jaren i bilong Okapa, Isten Hailans provins na em i

wok wantaim Eda Ranu. Em i tok Papua Niugini i ples bilong kisim kainkain hevi na mipela i mas givim helpim. "Yumi lukim pinis long hevi i kamap long Aitape na Rabaul orait yumi save hevi bai kamap yet long mipela. Na taim mipela i kisim hevi ol narapela kantri i kam hariap na helpim mipela. Orait long wankain we yumi mas givim helpim long ol. Hevi i save kamap long yumi olgeta. Gavman i no ken isi long kisim taim na givim helpim. Nau yet em i wok long isi long bungim mani na ol samting long givim helpim."



Elias Aike

Elias Aike i bilong Okapa, Isten Hailans provins na em i save mekim wok bilong em long Pot Mosbi long sapotim em. Em i tok dispela bagarap em i bikpela bagarap tru. "Dispela bagarap em i bikpela bagarap ol piksa na harim ol stori bilong dispela birua. Planti manmeri i lusim laip na husat i stap i stap olsem turangu. Yumi mas helpim ol. Yu save yumi olgeta bai bungim hevi. Dispela em i ples graun. Yumi lukim pinis hevi long Aitape na olsem yumi no ken lus tingting. Gavman bilong mipela nau yet isi tumas long givim helpim. Na pastaim long dispela em i isi tumas long kamaut long tingting bilong em sapos em i mas givim helpim. Dispela mipela i laik lukim gavman i mas mekim."

John Tongri i bilong Ramu, Madang provins na em i mekim wok bilong em long Pot Mosbi. Em i tok gavman i no tingting tumas long hevi i kamap long Esia. "Kain pasin bilong gavman i kisim taim long helpim ol turangu long Esia i pasin nogut tru. Em i soim olsem em i no wari long hevi i kisim ol. Tru mipela i gat ol hevi bilong mipela tasol dispela hevi i kamap long Esia i narakain. Yumi mas givim helpim olsem ol i givim helpim long mipela long taim mipela i kisim hevi. Maski long gavman i isi isi tumas long givim helpim. Tasol i gutpela em i tokaut pinis long helpim."

CATHOLIC RADIO schedule	
6:00 - ANGELUS	6:05 - MEDITATION/INSPIRATIONAL MUSIC
7:00 - VATICAN RADIO WORLD NEWS	7:15 - VATICAN ENGLISH PROGRAM
7:30 - NON-STOP GOSPEL MUSIC	8:00 - JOURNEY HOME (EWTN)
9:00 - VATICAN RADIO WORLD NEWS	9:15 - VATICAN ENGLISH PROGRAM
9:40 - KIDS SING-ALONG	10:00 - CATHOLIC JUKEBOX
10:30 - GOSPEL MUSIC	11:00 - NON-STOP GOSPEL MUSIC
12:00 - ANGELUS	12:05 - VATICAN WORLD NEWS
12:20 - VATICAN ENGLISH PROGRAM	12:40 - REFLECTION MUSIC
1:00 - LAMB'S SUPPER WITH DR. SCHOTT HAHN	2:00 - MUSIC
3:00 - CHAPLET OF DIVINE MERCY	3:20 - NON-STOP GOSPEL MUSIC
4:00 - CATHOLIC JUKEBOX (ENCORE)	4:30 - NON-STOP GOSPEL MUSIC
5:00 - JOURNEY HOME	6:00 - ANGELUS
6:05 - MADANG LOCAL NEWS	6:10 - VATICAN ENGLISH PROGRAM
6:30 - LAMB'S SUPPER WITH DR. SCHOTT HAHN	7:00 - HOLY ROSARY
7:30 - CATHOLIC INSIGHT	8:00 - VATICAN WORLD NEWS
8:15 - MADANG LOCAL NEWS	8:30 - VATICAN ENGLISH PROGRAM
9:00 - TOK STREET LONG HWAIDS	10:30 - VATICAN ENGLISH PROGRAM
11:00 - ANGELUS	9:05 - MEDITATION/INSPIRATIONAL MUSIC
9:05 - BEST OF JOURNEY HOME	10:00 - CATHOLIC JUKEBOX (EWTN)
10:30 - VATICAN ENGLISH PROGRAM	11:00 - NON-STOP GOSPEL MUSIC
6:00 - ANGELUS	6:05 - MEDITATION/INSPIRATIONAL MUSIC
7:00 - VATICAN WORLD NEWS	7:15 - VATICAN ENGLISH PROGRAM
7:30 - NON-STOP GOSPEL MUSIC	8:00 - RADIO ST. JOSEPH PRESENTS
8:00 - VATICAN WORLD NEWS	9:15 - VATICAN ENGLISH PROGRAM
9:15 - ENGLISH PROGRAM	9:35 - KIDS SING-ALONG
10:00 - CATHOLIC JUKEBOX	10:30 - GOSPEL MUSIC
12:00 - ANGELUS	12:05 - VATICAN WORLD NEWS
12:20 - VATICAN ENGLISH PROGRAM	12:40 - REFLECTION MUSIC
1:00 - OUR FATHER'S PLAN	1:30 - AFTERNOON GOSPEL MUSIC
3:00 - CHAPLET OF DIVINE MERCY	3:20 - NON-STOP GOSPEL MUSIC
4:00 - CATHOLIC JUKEBOX (EWTN)	4:30 - NON-STOP GOSPEL MUSIC
5:00 - WAVE FACTOR (EWTN)	6:00 - ANGELUS
6:05 - VATICAN ENGLISH PROGRAM	6:30 - FATIMA
7:00 - HOLY ROSARY	7:30 - STATIONS OF THE CROSS
8:00 - VATICAN WORLD NEWS	8:15 - CRN LOCAL NEWS
8:30 - VATICAN ENGLISH PROGRAM	9:00 - TOK STREET LONG HWAIDS
10:00 - CATHOLIC JUKEBOX	10:30 - VATICAN ENGLISH PROGRAM
11:00 - NON-STOP GOSPEL MUSIC	
6:00 - ANGELUS	6:05 - MEDITATION/INSPIRATIONAL MUSIC
7:00 - OUR FATHER'S PLAN	7:30 - CROSSROADS (EWTN)
8:00 - VATICAN WORLD NEWS	8:15 - VATICAN PROGRAM
8:35 - MUSIC	9:30 - BACKSTAGE (EWTN)
10:00 - WAVE FACTOR	11:00 - NON-STOP GOSPEL MUSIC
12:00 - ANGELUS	12:05 - VATICAN WORLD NEWS
12:20 - VATICAN ENGLISH PROGRAM	12:40 - GOSPEL MUSIC
3:00 - CHAPLET OF DIVINE MERCY	3:20 - GOSPEL MUSIC
4:00 - BACKSTAGE	4:30 - NON-STOP GOSPEL MUSIC
5:00 - WORLD OVER NEWS	6:00 - ANGELUS
6:05 - VATICAN ENGLISH PROGRAMME	6:30 - MIRACLES OF THE CROSS
7:00 - HOLY ROSARY	7:30 - CROSSROADS
8:00 - VATICAN WORLD NEWS	8:15 - VATICAN ENGLISH PROGRAM
9:00 - WORLD OVER NEWS (EWTN)	10:00 - BACKSTAGE
10:30 - VATICAN ENGLISH PROGRAMME	10:50 - NON-STOP GOSPEL MUSIC
6:00 - ANGELUS	6:05 - MEDITATION/INSPIRATIONAL MUSIC
8:00 - VATICAN WORLD NEWS	8:15 - VATICAN ENGLISH PROGRAM
8:35 - NON-STOP GOSPEL MUSIC	9:00 - SUNDAY EUCHARIST LIVE
10:30 - NON-STOP MUSIC	11:00 - IN THE LORD'S VINEYARD
12:00 - ANGELUS	12:05 - VATICAN WORLD NEWS
12:20 - VATICAN ENGLISH PROGRAM	12:40 - GOSPEL MUSIC
3:00 - CHAPLET OF DIVINE MERCY	3:20 - GOSPEL MUSIC
5:00 - SIGNS OF THE TIMES (RTA)	6:00 - ANGELUS
6:05 - SUNDAY EUCHARIST (EWTN)	7:00 - HOLY ROSARY
7:30 - CATHOLIC INSIGHT	8:00 - VATICAN WORLD NEWS
8:30 - VATICAN ENGLISH PROGRAM	9:00 - IN THE LORD'S VINEYARD
10:30 - NON-STOP GOSPEL MUSIC	
6:00 - ANGELUS	6:05 - MEDITATION/INSPIRATIONAL MUSIC
7:00 - VATICAN WORLD NEWS	7:15 - VATICAN ENGLISH PROGRAM
7:35 - NON-STOP MUSIC	8:00 - BEST OF JOURNEY HOME
9:00 - VATICAN WORLD NEWS	9:15 - VATICAN ENGLISH PROGRAM
9:35 - KIDS SING-ALONG	10:00 - CATHOLIC JUKEBOX (EWTN)
10:30 - GOSPEL MUSIC	11:00 - NON-STOP GOSPEL MUSIC
6:00 - ANGELUS	6:05 - MEDITATION/INSPIRATIONAL MUSIC
7:00 - VATICAN WORLD NEWS	7:15 - VATICAN ENGLISH PROGRAM
7:35 - NON-STOP MUSIC	8:00 - RADIO ST. JOSEPH PRESENTS
9:00 - VATICAN RADIO WORLD NEWS	9:15 - VATICAN ENGLISH PROGRAM
9:40 - KIDS SING-ALONG	10:00 - CATHOLIC JUKEBOX
10:30 - GOSPEL MUSIC	12:00 - ANGELUS
12:05 - VATICAN WORLD NEWS	12:20 - VATICAN ENGLISH PROGRAM
12:40 - REFLECTION MUSIC	1:00 - SUPER SAINTS
1:30 - GOSPEL MUSIC	3:00 - CHAPLET OF DIVINE MERCY
3:20 - NON-STOP GOSPEL MUSIC	4:00 - CATHOLIC JUKEBOX
4:30 - NON-STOP GOSPEL MUSIC	5:00 - RADIO ST. JOSEPH PRESENTS
6:00 - ANGELUS	6:05 - AITAPE LOCAL NEWS
6:10 - VATICAN ENGLISH PROGRAM	6:30 - MOTHER OF REDEEMER
7:00 - HOLY ROSARY	7:30 - SUPER SAINTS
8:00 - VATICAN WORLD NEWS	8:15 - AITAPE LOCAL NEWS
8:20 - VATICAN ENGLISH PROGRAM	9:00 - TOK STREET ABOUT HWAIDS WITH FR. JUDE (ENGLISH)
10:00 - CATHOLIC JUKEBOX	10:30 - VATICAN ENGLISH PROGRAMME
10:50 - NON-STOP GOSPEL MUSIC	
6:00 - ANGELUS	6:05 - MEDITATION/INSPIRATIONAL MUSIC
7:00 - VATICAN WORLD NEWS	7:15 - VATICAN ENGLISH PROGRAM
7:35 - NON-STOP GOSPEL MUSIC	8:00 - SCRIPTURE MATTERS WITH DR. SCHOTT HAHN (EWTN)
9:00 - VATICAN WORLD NEWS	9:15 - VATICAN ENGLISH PROGRAM
9:35 - KIDS SING-ALONG	10:00 - CATHOLIC JUKEBOX
10:30 - GOSPEL MUSIC	10:50 - NON-STOP GOSPEL MUSIC
6:00 - ANGELUS	6:05 - MEDITATION/INSPIRATIONAL MUSIC
7:00 - VATICAN WORLD NEWS	7:15 - VATICAN ENGLISH PROGRAM
7:35 - NON-STOP GOSPEL MUSIC	8:00 - SCRIPTURE MATTERS
9:00 - ANGELUS	9:05 - VANIMO LOCAL NEWS
9:10 - VATICAN ENGLISH PROGRAM	9:30 - FATIMA, HEAVEN'S PEACE PLAN
10:00 - HOLY ROSARY	10:30 - DOCTORS OF THE CHURCH
11:00 - VATICAN WORLD NEWS	11:00 - VANIMO LOCAL NEWS
11:30 - VATICAN ENGLISH PROGRAM	12:00 - TOK STREET ABOUT HWAIDS WITH FR. JUDE
12:00 - CATHOLIC JUKEBOX	12:30 - VATICAN ENGLISH PROGRAM
13:00 - NON-STOP GOSPEL MUSIC	

Yupela save long Dadii Gii?

Cynthia Buckley-Igua (CHM) i raitim

SAMPELA manmeri i save lukim Niu Ya olsem taim bilong statim gut laip bilong ol gen. Sampela ol i save skruim tasol pasin na laip bilong ol bilong yia i lus pinis.

Tasol Dadii Gii o narapela nem bilong em Armstrong Gomara, em i laik statim gut laip bilong em insait long PNG musik long dispela niu yia wantaim namba wan musik albam bilong em aninit long CHM Supersound Rekoding Studios.

Bihain em i laik kamap wanpela long ol biknem musik atis bilong PNG.

Dispela yangpela man bilong Misima na Finschaffen i wok long soim

strong bilong em. Em i bin mekim nem taim em i singsing long wanpela singsing ol i kolim 'Iti Bayama'. Dispela singsing em David George, wanpela manki bilong musik ben Camp 7 i bin raitim.

Dispela singsing nau i kamap nambawan singsing bilong planti manmeri husat i save askim long harim long redio. Musik vidio klip bilong em i save kamap long CHM long olgeta wik.

Nupela musik albam bilong Dadii Gii em i kolim 'Dayz Of Ma Life' na bai em i kamaut long dispela mun yet, na planti musik manmeri i tok dispela albam ating bai i abrusim strong bilong Hausboi.

Armstrong yet i tok olsem dispela namba wan albam



bilong em i stori tru long laip bilong em.

"Dispela albam em mi yet mi kolim Dayz of Ma Life bilong wanem ol singsing long dispela albam i makim tru laip bilong mi yet," Dadii Gii i tok.

Taim em i bin stap long Lae, em i painim laip em i hat tru. Em yet i lukim dispela kain laip na em i putim ol samting em i pilim na tingting bilong em long ol dispela singsing.

Albam bilong em i strong moa long R&B musik o ridim na blus musik. Em i kisim dispela stail na tanim wantaim musik stail bilong PNG yet long laik bilong ol yut bilong PNG tete. Wanwan singsing long dispela albam i karim tu ol gutpela stia tok we i givim skul olsem laip i no hat, em i wanpela blesing.

"Wanem samting yu mekim long laip bilong yu i save makim taim bihain bilong yu. Sapos yu wanpela lesman, bai yu no inap mekim wanpela samting, tasol sapos yu strongim tingting bilong yu long laip bilong yu na yu laik mekim senis, bai yu ken mekim samting long senisim laip bilong yu," Armstrong i tok.

Armstrong i no olsem ol arapela yangpela manki bilong strit. Em i bin i gat sans long go skul long yunivesiti. Tasol lewa bilong em yet i pas strong long musik na em i no tingting tumas long skul.

"Man mi save laik bihainim em Sean Paul, wanpela


man Saut Amerika husat i save singsing hip hop, R&B na rap na mi save lukluk long em long kisim helpim long musik bilong mi yet," em i tok bikos em i bilip olsem Sean Paul i save soim stail bilong em yet long ol musik bilong em. Sean Paul em i wanpela biknem atis bilong Jamaica, tasol em i mekim nem bilong em long Amerika long sampela yia i go pinis.

Nau Dadii Gii i kamap wanpela biknem man nabaut long Mosbi bihain long singsing Iti Bayama i pairap long ol redio stesen. Bihain long en, em i luksave olsem planti long ol lain husat i laikim dispela singsing na musik bilong en em ol liklik pikinini.

"Mi luksave olsem planti pikinini i save lukluk long mi na pasin bilong mi, olsem na mi mas kamap wanpela gutpela rol model na soim gutpela pasin long ol."

Armstrong i bin wanpela man bilong stap isi na i no save toktok tumas, tasol nau em i stap long ai bilong planti manmeri, em i wok long strongim em yet long toktok planti long ol sapota bilong em long olgeta hap bilong kantri.

Wanwan singsing bilong em i toktok long ol samting i save kamap insait long komyuniti tete. Singsing Ee Kande i stap long tok ples Kote na i stori long pasin bilong bagarapim meri insait long PNG komyuniti. Singsing Situation em Soul Harmony na sampela skul



sumatin bilong Korobosea Intanesenel Skul i singsing long en. Em i wanpela singsing bilong bel isi na gutpela sindaun we Armstrong yet i laikim bai ol manmeri i harim na stretim olgeta kros bilong ol. Armstrong i save singsing long tok ples Inglis, Kote, na Asera, tok ples Markham. Em i singsing long tok pisin tu na wanpela singsing bilong em long pasin poroman wantaim meri em i pairapim long tok ples Motu. Long namba wan albam bilong em, Dadii Gii i givim liklik hap bilong laik bilong olgeta manmeri.

Musik bilong Armstrong em i no wankain olsem ol arapela musik atis. Ol singsing bilong em i karim bikpela stori wantaim i kam long lewa bilong em stret, na taim em i tromoi liklik hap musik stail bilong em, bai yu gat wanpela albam we bai i pulim laik bilong planti manmeri long PNG yet na long ovasis tu.

Liklik stia tok em i givim long ol yangpela musik atis em, em i taim bilong stat raitim ol singsing we i gat stori na gutpela stia tok long em bilong strongim tingting bilong ol yangpela tete. Na musik em i wanpela bikpela


samting we yu ken skulim ol yangpela.

"Musik i gat mejik long srukim bodi bilong yu na opim maus bilong yu bai yu singsing. Em i gat strong bilong senisim tingting bilong mipela tu," Armstrong i tok.

Em i givim luksave long helpim em i kisim long Mista Raymond Chin long sapot bilong em na long olgeta lain husat i soim bilip long em long kamapim dispela namba wan albam na long ol wan saun enjinia bilong em husat i mekim bikpela wok long albam bilong em.

Sapos yu no save long Dadii Gii nau yet, bai yu kirap nogut taim musik bilong em i stat long brukim PNG musik indastri. Dispela yangpela atis i gat strong moa yet.


Taim mipela i askim em long liklik strongpela toktok em i laik givim long ol yut bilong tete, em i tok, "Strongim tingting na bilip long strong bilong yu yet long mekim wanpela samting yu laik mekim tru long lewa bilong yu. Ol gutpela samting bai painim yu yet olsem i painim mi." Tru tumas, Dadii Gii, tru tumas.



SEKIM TV LONG
DISPELA WIK:

8.00 PM FONDE NAIT - FEAR FACTOR

YU INAP long mekim ol dispela samting? Ol samting olsem putim pes bilong yu i go insait long wanpela bokis i pulap long ol rat; sindaun insait long wanpela bokis i pulap long ol kokros o sanap na lusim planti handet binatang bilong kaikai man. Sapos yu man tru, bai yu mekim ol dispela samting. Dispela TV so i save kamap olgeta FONDE nait i soim ol manmeri i traim strong bilong ol long mekim ol dispela samting.



8.30PM-FRAIDE NAIT MUWI THE INCREDIBLE HULK RETURNS

DISPELA dokta i save tanim grin na groim ol traipela masol na skin stret. Nem bilong dispela dokta em Dokta Bill Bixby. Tasol sapos yu mekim em i belhat, em i save senis i go kamap Incredible Hulk. Dispela man, strong bilong em i moa yet.



7.30PM - SANDE NAIT SPESOL - THE TRUTH BEHIND THE MOON LANDINGS

TAIM ol spesman bilong Amerika i bin wokabaut antap long mun, em i kamap tru tru o ol i giaman tasol? Dispela TV spesol we bai i kamap long EMTV long Sande nait nau i tromoi dispela askim.



Slim Buda winim YUMI FM Ruki bilong yia

TOK Pisin redio stesen, YUMI FM i bin tokaut long ol PNG Musik Awod bilong em long 2004 las wiken. I bin i gat planti nupela nem na sampela biknem musik atis tu i kisim luksave.

Tasol long tingting bilong mi, trutru wina bilong ol PNG Musik Awod 2004 em 'Tok Musik insait long What's On With Raitman' las wik bilong wanem em i makim stret olgeta wina bilong ol dispela awod.

Tok Musik i bin givim wanwan nem long olgeta awod, na olgeta yet i kamap stret.

Ol dispela musik awod i bin kamap long Niu Yia De stret long YUMI FM long so bilong SP TOP 100 Kaundaun 2004 we i makim strong bilong 100 namba wan singsing insait long PNG na Pasifik long las yia.

Bihain long kain kain toktok na resis insait long PNG musik industri, Rastaman Slim Buda i kisim luksave olsem Ruki bilong Yia long YUMI FM na namba wan singel bilong yia i go long Uralom Kania na Moses Tau.

Na mipela i bin luksave tu long strong bilong pani man bilong Raikos, Julius Moab we em i winim ol arapela solo musik atis long kisim Solo Atis bilong Yia. West Kadam, ben bilong ol manki long Kapore Setelmen long Biialla, Wes Nu Briten i winim Nambawan Nupela Grup bilong Yia.

Tasol ating bikpela luksave tru i bin i go long nupela ben

bilong Bogenvil, Niu Age husat i winim tupela awod - Ben bilong Yia, na ol i winim tu Albam bilong Yia long namba wan albam bilong ol 'Tsomia Alia'.

Niu Age Ben nau i wok long raun pilai musik long as ples



• Slim Buda - Ruki bilong yia 2004

provins bilong ol we ol i wok long singsing long planti manmeri na givim liklik skul bilong pilai musik long ol yut insait long provins.

"Ol manki bilong mipela i amamas tumas long tupela awod," Siaman na Promosen Kodineta bilong Niu Age, Gerard Masa i tok. "Em i bikpela win tru bilong wantaim Niu Age i mekim nem pinis insait long nesanel musik industri."

Gerard i tok dispela em i namba wan taim bilong wanpela ben bilong Bogenvil long kisim dispela kain luksave.

"Mi bin stap wantaim ol manki long Buka long Niu Yia taim mi bin raun i go wantaim Ekting Praim Minista Sam Akoitai na mi no harim toksave long ol awod long YUMI FM, tasol nau mi bai amamas tru long go tokim Niu Age Ben long ol awod ol i winim na mi save olsem ol bai amamas nating tru!"

Gerard i tok dispela win nau em inap long kirapim skin bilong ben long kamaut wantaim namba tu albam bilong ol wantaim Cyclone Studios. Em i tok klia olsem dispela albam em ol i rekodim long Pot Mosbi na i no wantaim Powerhouse Studios long Lae.

Man i winim Ruki bilong Yia awod, Mista Boombastic yet i wok long kisim luksave olsem em i namba wan regei na rabadab musik man insait long PNG.

Albam bilong em i bin strong tru na planti manmeri laikim. Fopela singsing bilong em long dispela albam i bin sanap strong long musik sat long 2004.

Olgeta 4-pela singsing bilong em i bin sanap inap long 46 wik las yia. Em i bin wanpela gutpela yia bilong PNG stail regei musik i kam long dispela musik atis husat i soim olsem em i strongim tru regei na rabadab stail musik.

YUMI FM i wok long mekim ol dispela PNG Musik Awod long 1998 i kam inap nau long pinis bilong olgeta yia we i save luksave long developmen bilong PNG na Pasifik musik na i sapatim groa bilong ol musikman na atis.

Nau yet em i wok long pilai musik raun long Popondeta na i bin hat tru long toksave long em olsem em i winim wanpela awod.

Singel bilong Yia Awod i bin go long singsing Nellien bilong Uralom Kania na Moses Tau. Dispela singsing i brukim olgeta rekod long 2004 taim em i stap inap long 17 wik long namba wan posisen na i stap long musik sat bilong YUMI FM inap long 40 wik. Uralom Kania na Moses Tau i bin rekodim dispela singsing na i bin kamaut long namba tri solo albam bilong lid singa bilong Junia Kopex.

Moses Tau yet i bin harim Uralom i rekodim dispela singsing na em i laikim tru na i tok em i laikim singsing ya long albam bilong em yet. Uralom i no laik, tasol em i askim Moses long singsing long koras tasol. Singsing 'Nellien' i sindaun long namba wan posisen bilong Top 100.

Long sait bilong Seniai Jnr Maob, em i stap long we tru long famili bilong em taim em i harim olsem em i winim awod bilong namba wan Solo Atis bilong Yia.

Dispela pani man bilong Raikos long Madang i no bilip olsem em i win.

"Man, mi harim na mi friz olgeta, na isi, isi tru aiwara i pundaun long ai bilong mi," Julius i tok long Maunten Hagen. "Ol poroman bilong mi, ben bilong mi i holim han tasol na kalap raun raun olsem ol liklik manki taim mipela i kisim toksave."

Em i tok em i amamas nogut tru i stap yet. "Mi gat bikpela amamas tru na lewa bilong mi i no isi yet long dispela taim."

Julius i tok em yet i no bin harim kaundaun, tasol em i bin kirap nogut taim ol manmeri long Hagen taun i wok long kolim em 'Chief' long Niu Yia.

Julius i wok long raun pilai long Westen Hailans wantaim Kuri Rup.

Na bihain, West Kada, ben i kam long ol Wel Pam plante-sen long Wes Nu Briten husat i rausim namba wan Nupela Ben bilong Yia.

Dispela tripela-man ben i bin mekim musik long kisim wanpela rekoding kontrak wantaim CHM Supersounds. Ol bol i bin laik mekim gut wantaim musik bilong ol. Ol i bin laik mekim gut long raitim musik we bai i ken pulim laik bilong planti ol yangpela manmeri.

Mi yet mi bilip olsem singsing we i bin strongim sanap bilong ol em Daon Anda, stori bilong wanpela meri Tolai husat i bin kam bek bihain long em i skul wan yia long Australia na em i bungim wanpela man long Tabari Place long Pot Mosbi.

Dispela tripela manki Sepik em ol bilong ples Angoram, tasol ol i no go lukim ples bilong ol yet. Tripela i tok ol bai go lukim liklik ples bilong papamama bilong ol. Nau yet Kapore em i ples bilong ol manki i rausim awod bilong Namba Wan Nupela Ben bilong Yia.

Redio Anaunsa bilong SP TOP 100 Kaundaun 2004 na maus i save toktok long Brekfis So bilong YUMI FM, Kas-T i tok olsem redio stesen bilong ol i gat bilip long strong bilong ol lokal na Pasifik musik atis husat i wok long go pas wantaim nupela stail musik bilong ol.

"YUMI FM i wok long mekim dispela PNG Musik Awod i stat long 1998 yet," Kas-T i tok. "Na mipela em i wanpela midia kampani tasol we i luksave long developmen bilong PNG na Pasifik musik na i sapatim groa bilong ol musik man long ol dispela musik awod insait long rijon."

Jenerel Menesa bilong PNG FM na Eksekutyutiv Produsa bilong SP TOP 100, Kaundaun 2004, Peter John Aitsi i tok olsem dispela kaundaun em i pikinini bilong Justin Kili na as tingting bilong em long kamapim wanpela independen glasim long luksave long ol PNG na Pasifik musik atis.

"Long ol yia i go pinis, i nogat wanpela samting bilong karim musik na strong bilong olgeta musik atis i go insait long wanpela musik kaundaun we i sekim ol askim bilong ol manmeri na tainim i go long wanpela rekod long strong bilong ol singsing," Mista Aitsi i tok.

Em i tok 93 FM YUMI FM olsem wanpela tok pisin redio stesen insait long PNG i luksave olsem em i mas helpim long strongim ol lokal musik atis bai ol i ken groa na developim ol musik wok bilong ol.

"Bipo ol musik atis i win i kisim ol tropi olsem ol awod, sampela mani, balus tiket i go long ol provins na luksave long strong bilong ol long wanpela pablik Awods nait," Mista Aitsi i tok.

Nau yet YUMI FM na Total Event Company i wok long rere long mekim wanpela nait bilong givim ol awod i go long ol musik atis i winim ol awod. Dispela bai kamap long mun Mas long dispela yia.


***Yu ken ridim stori blong ol musik man/meri long What's On With Raitman insait long POST COURIER tasol, Trinde, olgeta wik.**

EMTV GAID

Forde 6/12/04	Mande 10/01/05
5.00 CREFFLO DOLLAR	5.00 JOYCE MEYER MINISTRY
5.30 JOYCE MEYER MINISTRY	6.00 TODAY SHOW
6.00 TODAY SHOW	9.00 MALOLO CLUB
9.00 2ND TEST AUST V PAKIS	11.00 CREFFLO DOLLAR
11.10 THE CRICKET SHOW	11.30 DR PHIL
11.30 DR PHIL	12.30 EMTV PRIME LINEUP
12.00 2ND TEST AUST V PAKIS	2.00 SPECIAL ONE DAY INTERNA TIONAL CRICKET
4.57 EMTV TOKSAVE	6.00 NATIONAL EMTV NEWS
5.00 THE PRICE IS RIGHT \$100,000 SUPER SHOWCASE	6.30 A CURRENT AFFAIR
6.00 NATIONAL EMTV NEWS	6.58 TOK PISIN NEWS UPDATE
6.30 A CURRENT AFFAIR	7.00 LOTTO DRAW
6.59 LOTTO DRAW	7.01 SPECIAL ONE DAY INTERNA TIONAL CRICKET CONT...
7.00 CHM SUPER SOUND	8.57 EMTV TOKSAVE
7.57 EMTV TOKSAVE	9.00 PRAISE
8.00 FEAR FACTOR	10.00 APPRENTICE
9.00 WITHOUT TRACE	10.30 NEWS REPLAY
10.00 KING OF QUEENS	11.00 CHM SUPER SOUND
10.30 EMTV NEWS REPLAY	12.00 NIGHTLINE
11.00 WALKER TEXAS	12.30 CLOSE
00.00 NIGHTLINE	
0.30 STATION CLOSE	

Forde 7/12/04	Mande 10/01/05
5.29 STATION OPEN	5.29 STATION OPEN
5.30 JOYCE MEYER MINISTRY	5.30 JOYCE MEYER MINISTRY
6.00 TODAY SHOW	6.00 TODAY SHOW
9.00 MALOLO CLUB	9.00 MALOLO CLUB
11.10 CREFFLO DOLLAR	11.00 CREFFLO DOLLAR
11.30 DR PHIL	11.30 DR PHIL
12.00 EMTV PRIME TIME LINE UP	12.30 EMTV PRIME LINEUP
2.30 THE WIGGLES	4.57 EMTV TOKSAVE
3.00 BANANAS IN PYJAMAS	5.00 THE PRICE IS RIGHT
3.30 JUSTICE LEAGUE	6.00 NATIONAL EMTV NEWS
4.00 HOT SOURCE	6.30 A CURRENT AFFAIR
4.30 Y	6.58 TOK PISIN NEWS UPDATE
5.00 THE PRICE IS RIGHT \$100,000 SUPER SHOWCASE	6.59 LOTTO DRAW
6.00 NATIONAL EMTV NEWS	7.00 BACK YARD BLITZ
6.30 A CURRENT AFFAIR	7.30 HOLIDAY SHOWDOWN
6.58 NEWS UPDATE TOK PISIN	8.27 EMTV TOKSAVE
6.59 LOTTO DRAW	8.30 JAG
7.00 TOK PIKSA	9.30 THIRD WATCH
7.30 FRIDAY NIGHT NIGHT	10.30 EMTV NEWS REPLAY
8.27 EMTV TOKSAVE	11.00 ER
8.30 FRIDAY NIGHT MOVIE: THE INCREDIBLE HULK	00.00 NIGHTLINE
10.00 EMTV NEWS REPLAY	00.30 STATION CLOSE
11.00 RENOVATION	
00.00 NIGHTLINE	
00.30AM STATION CLOSE	

Forde 10/12/04	Mande 12/01/05
7.00 IT'S HI-5 CHRISTMAS	6.29 STATION OPEN
7.30 JAYJAY THE JET PLANE	5.30 JOYCE MEYER MINISTRY
8.00 PLANET FANTA	6.00 TODAY SHOW
9.30 DOWNLOAD	9.00 TOUR MATCH CRICKET
9.30 SO FRESH	11.30 CRICKET SHOW
10.30 TOUR MATCH-AUST A V WEST INDIES	4.57 EMTV TOKSAVE
12.30 SPEED MACHINE	5.00 THE PRICE IS RIGHT \$500,000 SUPER SHOWCASE
1.00 TOUR MATCH-AUST A V WEST INDIES CONTS...	6.00 NATIONAL EMTV NEWS
5.00 ESCAPE WITH E.T	6.30 A CURRENT AFFAIR
5.30 FISHING AUSTRALIA	6.57 TOK PISIN NEWS UPDATE
6.00 NATIONAL NEWS EMTV	6.59 LOTTO DRAW
6.30 SPECIAL PRESENTATION CIRCUE DU SOLEIL	7.00 WORLD OF WILD LIFE
NOUVELLE EXPERIENCE- EMMY AWARDS CIRCUS SHOW	7.30 WIFE SWAP- NEW SERIES
8.00 SOUTH PACIFIC MUSIC	8.57 EMTV TOKSAVE
8.57 EMTV TOKSAVE	9.00 WEDNESDAY NIGHT MOVIE: CURLY SUE
9.00 XENA WARRIOR PRINCES	11.00 SOUTH PACIFIC MUSIC
10.00 HEUCLES	11.30 EMTV NEWS REPLAY
11.30 THE LEGENDARY HIDDEN CITY	12.00 NIGHTLINE
0.10 KING OF QUEENS	12.30 STATION CLOSE
00.40 CLOSE	



The Incredible HULK is back 8.30 Friday

Sarere 9/01/05
6.59 STATION OPEN
7.00 IT IS WRITTEN
7.30 WORLD OF WILD LIFE
8.00 WOLVES & DINGOS
8.30 GOOD SPORT
9.00 TOUR MATCH AUST V INDIES
11.30 CRICKET SHOW
12.00 SPEED MACHINE
1.00 TOUR MATCH AUST V INDIES
5.30 THE PACIFIC WAY
6.00 NATIONAL EMTV NEWS
6.30 TOUCH BY AN ANGLE
7.30 PREMIER SPECIAL: THE TRUTH BEHIND THE MOON LANDING
8.27 EMTV TOKSAVE
8.30 MOVIE: SECOND CHANCE
10.30 EMTV NEWS REPLAY
11.30 PRAISE
00.00 STATION CLOSE



Fear Factor Thurdady 8.00pm

NATIONAL WEEKLY HIT PARADE

YUMI FM NATIONAL WEEKLY HITPARADE

Sarere Januari 8, 2005 Twisties i sponsa

Singsing	Musik Atis	Dispela Wik
Sweet Karanas	O-shen	1
Towescop	Itambu	2
Lili	Itambu	3
Iti Bayama	Armstrong	4
Dimigura	Bits & Pieces	5
Sigi Mangi	Grumo Masalai	6
Lareva	Ex Hollie Maea	7
Lewa	Hausboi	8
Kina.com.pg.au	Simbary	9
Jombie Kunex	New Painim Wok	10
Sharon	Uralom Kania	11
Pasin Tasol	Luke Banag	12
Hard Life	X-Anats	13
Naike	Hausboi	14
Na Wonde	Tom Lari	15
Meri Siwi	K-Mala	16
Sugar Meri	Kuri Rup	17
Parasite	Minica Malbak	18
Sikul Sepik	Julius Moab	19
Nellien	Uralom Kania ft Moses	20

Wantok Niuspepa Kalaring Kompetisen Toksave

Yu mas kalarim dispela piksa long ol arapela pikinini bilong narapela kantri. Atis bilong mipela i helpim yu pinis na kalarim yangpela meri Saina. Nau em taim bilong yu long pinisim ol arapela piksa. Taim yu pinis, raitim nem bilong yu, pos opis bokis adres bilong yu na krismas bilong yu na salim i kam long:

WANTOK NIUSPEPA
P. O. Box 1982
Boroko 111
NCD
Papua New Guinea

YUMI FM
Locked Bag 93
Port Moresby, NCD

Ol jas bilong *Wantok Niuspepa* na *Yumi FM* bai skelim sapos piksa i makim stret o i kam klostu long wanem piksa i makim. Yu bai gat sans long winim ol gutpela prais bilong yu long skul neks yia. Mama papa bilong yu i ken helpim yu long givim bekim long ol askim daun bilo.

Bihain long yu pinis, mipela i laikim helpim bilong yu. Plis givim bekim long ol dispela askim:

- Ples mama karim yu?
- Nau yu stap long wanem provins?
- Husat i baim niuspepa?
- Ol i baim niuspepa long wanem hap? (stua, maket, bas stop?)
- Yu laikim wanem samting insait long *Wantok Niuspepa*?

• *Wantok Niuspepa* i lukluk long statim wanpela pes bilong ol pikinini long neks yia. Nau mipela i laik save, yu laik tukim wanem samting insait long ol dispela pes bilong pikinini?

Lo bilong dispela resis:

- Yu mas aninit long 18 Krismas
- Yu yet i mas kalarim dispela piksa
- Yu ken yusim kala pensil o wanem samting wantaim naispela kala
- Yu mas katim na salim i kam long opis bilong *Wantok Niuspepa* na *Yumi FM* pastaim long Janueri 13, 2005.
- Bihain long yu kalarim dispela piksa, yu mas bekim ol askim antap bilong helpim *Wantok Niuspepa*.
- Yu i ken harim *YUMI FM* o lukim nem bilong yu long *WANTOK NIUSPEPA* long Janueri 20th, 2005 long laiv draw sapos yu win o nogat.
- *WANTOK* na *YUMI FM* yet bai glasim olgeta entri long dispela resis na makim ol wina.

UN L C L S D

Hey ol KALARING KOMPETISEN pikinini!

Yu gat sans long winim wanpela SKUL BEG wantaim ol buk na pensil, ruler i stap insait na i kam long ...



...Na tu yu gat sans tu long winim moni bilong skul fi i KAM LONG...



So kamon ol pikinini, em de bilong yupela "INTANESENEL DE BILONG OL PIKININI" Em de bilong amamas!! Ol pikinini ananit long 18 krismas i ken stap long dispela resis.



NEM.....KRISMAS.....

SKUL.....PLES:.....

ADRES:.....TELEPON:.....

Ol wina bai ol i anaunsim long taim bilong laiv draw long YUMI FM na WANTOK NIUSPEPA long 20th Mun Janueri, 2005

Salim kalaring kompetisen i kam long:
WANTOK NIUSPEPA P.O.Box 1982, Boroko,
NCD, Papua New Guinea

YUMI FM, Locked Bag 93, Port Moresby, NCD



Laikim Penpren

Nem: Arnold Yelme

Krismas: 24 (man)

Adres: Internal Revenue Commission
P.O. Box 215 Madang Province

Save laikim: Go swim, pilai gita, na go lotu long ol wiken na go long wok.

Nem: James Omperth Jimmy

Krismas: 19 (man)

Adres: C/- Norbet Ao

P.O. Box 4535 Lae, Morobe Province

Save laikim: Pilai kibod, soka, tok pilai, stadi, rait go kam na serim ovasis eksperiens bilong mi.

Nem: Peter Ken Tolexco

Krismas: 16 (man)

Adres: Margarima High School

P.O. Box 33 Mendi, SHP

Save laikim: Mekim penpren, pilai spot na gita, raitim pas, wokim fani na harim lokel musik.

Nem: Felix Kenny

Krismas: 23 (man)

Adres: Private Mail Bag

P.O. Box 586 Maprik ESP

Nem: Chris Oroko

Krismas: 19 (man)

Adres: P O Box 2497 Lae, Morobe Province

Save laikim: Go lotu, prenim ol ailan lain, kisim poto na harim stori.

Nem: Shiana Araba

Krismas: 16 (meri)

Adres: C/- Wii Zabo Stargate Restaurant,

Lae 411, Morobe Province

Save laikim: Pilai soka, netball, volibal, lukim CD piksa na raun wantaim ol poro.

Nem: Aifan A. Hoya

Krismas: 24 (man)

Adres: P O Box 945 Goroka, EHP

Save laikim: Harim musik, kukim karkai, mekim gaden na raun long arapela ples.

Nem: Jane Semoi

Krismas: 17 (meri)

Adres: Mercy Secondary School, P O Box 580 Wewak ESP

Save laikim: Pilai spot, go lotu, was was long nambis, ritim buk.

Nem: Elice Sasua

Krismas: 19 (meri)

Adres: Mercy Secondary School, P O Box 580 Wewak ESP

Save laikim: Harim musik, ritim buk, go lotu, pilai spot na was was long nambis.

Nem: Lavinia Muiva

Krismas: 16 (meri)

Adres: Mercy Secondary School,

P.O. Box 580 Wewak ESP

Save laikim: Skelim tok pisin wantaim ol arapela lain, karkai buai, smok na drink.

Nem: John Ebe Kon

Krismas: 17 (man)

Adres: Sekipte Good News Christain Church
P O Box 228 Mendi SHP

Save laikim: Autim tok, pre long God i ken blesim ol lain.

Nem: Rhoda Joe

Krismas: 19 (meri)

Adres: P O Box 547

Save laikim: Pilai soka, harim 93FM, was was, painim ol poroman, mekim fani na go lotu long Sande.



STORI TUMBUNA

BIPO tru i gat tupela kain kapul i stap. Nem bilong tupela em Pore na Pesalo.

Pero em i gat longpela nus na blakpela gras bilong em. Na i gat planti nil i pulap long gras bilong em.

Pesalo em i longpela liklik na nus bilong em i sotpela na patpela liklik na em i save kaikai lip bilong diwai olgeta de. Tasol Pore i save kaikai anis olgeta de tu.

Tasol wanpela taim tupela i stori i stap

na Pesalo i bin haitim tel bilong em long wanpela hul na em i tok, "Pore mi bin katim tel bilong mi pinis na yu i gat longpela tel yet na olsem wanem nau?"

Pore i kirap na krosim Pesalo na i tok, "Watpo yu no bin tokim mi?"

Nau em i kirap na kisim busnaip na katim tel bilong em yet.

Nau Pesalo i kirap na pulim tel bilong em long hul na i tok, "Mi giamanim yu tasol mi gat tel yet."

Pore i kirap na krosim Pesalo. "Yu bin krosim mi a? Sori tru ol man i no inap kisim mi hariap."

"Tasol yu, ol inap kilim yu kwiktai bikos

yu stap antap long han bilong diwai tasol. Na ol dok inap painim yu na kilim yu hariap.

"Tasol mi nogat dispela trabel. Mi stap insait long hul bilong graun na ol bai i hat wok tru long kisim mi."

Tru ol man i save hatwok long kisim dispela kain kapul olsem Pore. Tasol Pesalo em ol man na dok i save kilim em.

Sapos Pesalo i no giamanim Pore bai tupela i stap gutpela pren.

Na bai yumi inap lukautim na painim hariap na kilim tupela.

Olsem na yumi hatwok long painim wanpela narapela nau.



Tambu brukim marit

Dia Laiplain,


Sampela mun i go pinis, dipatmen bilong mi i bin salim mi i go long wanpela kos long Mosbi.

Long taim mi go stap long Mosbi, meri bilong mi i kisim liklik bebi bilong mitupela i go long stap wantaim papamama bilong mi long ples.

Wanpela nait, meri i lusim bebi wantaim mama bilong mi na em i go lukim ol lain bilong em. Bihain bebi i kirap painim mama bilong em na em i wok long krai i stap. Na nogat man inap long stopim em. Mama bilong mi i kros na em i tok, "Dispela les meri i no i stap na lukautim pikinini bilong em."

Wanpela man i harim dispela hap tok na em i go tokim papamama bilong meri. Na ol i belhat na i kam kisim meri na pikinini bilong mi i go bek long haus bilong ol. Na meri i no laik go bek na stap wantaim papamama bilong mi. Na famili bilong em i wok long tokim em long lusim mi.

Kandere bilong mi i salim pas na toksave long mi long dispela samting. Na mi askim dipatmen bilong mi long kisim spesol tiv o maiolo na go stre-



tim dispela hevi. Tasol ol i tok nogat. Na ol i no inap long larim mi i go bek na wok long provins bilong mi bihain long mi pinisim dispela kos long Mosbi. Nau yet, meri i stap wantaim papamama bilong em.

Bai mi stretim dispela hevi olsem wanem? Mi wari tu long wanem mi no pinisim pe long meri bilong mi yet. Na ating dispela em i as bilong trabel ya. Mi wari tru long meri na pikinini bilong mi. Na mi laik olsem ol i mas kam bek long mi.

WORRIED

Dia Pren,

Mi sori tru olsem dispela bikpela trabel i kamap bihain long liklik tok kros bilong

mama bilong yu. Ating em i belhat tasol na em i mekim dispela hap tok. Na narapela man i harim na kamapim dispela trabel.

Mi no ting olsem dispela liklik hap tok tasol bai kamapim toktok bilong brukim marit. Ating tingting bilong yu long pe bilong meri em i as bilong dispela trabel.

Na ating famili bilong meri i kros yet long pe bilong em. Na ol i putim antap hap tok bilong mama bilong yu long haitim as bilong tok. Na kisim bek pikinini bilong ol.

Kandere bilong yu i rait na toksave long yu. Inap yu askim em long painimaut long tingting bilong ol tambu bilong yu long pe bilong meri o nogat?

Wanem samting i bikpela? Sem bilong yu long tok long bos o marit bilong yu?

Na meri bilong yu i ting wanem. Yu raitim pas na askim em long kam bek na stap wantaim yu o nogat? Ating yu no pinisim pe bilong em yet na em tu i ting olsem yu no laik em. Ol meri i laik save olsem ol man bilong ol i gat laik yet long ol.

Sapos yu i no inap tru long go bek long ples, moabeta yu yet i rait i go long famili bilong yu na meri bilong yu na askim ol long stretim dispela trabel.

Toksave long ol olsem dipatmen bilong yu i no inap long larim yu i go long ples na stretim dispela samting.

Mi bilip sampela toksave bilong mi hia bai helpim yu long stretim dispela wari bilong yu. Na mi bilip meri na pikinini bilong yu bai kam bek gen na stap wantaim yu.

Laiplain

Sapos yu gat wari o askim, salim i kam long Lifeline, P O Box 6074, Boroko, NCD. Mipela i no inap autim trupela nem bilong yu tasol ol samting we yu toktok long em bai mipela i bekim. Olsem na salim trupela nem na adres na mipela bai salim bekim long wari bilong yu i kam stret long yu.


Laiplain



• Laiv ben i mekim niu yia selebresen long Lamana i kamap stret.

Oi poto bilong 2005 Niu yia selebresen long wiken

Oi poto: JOE IVAHARIA



• Faiawoks long Lamana i karim tru spirit bilong niu yia.



• Dispela grup i kisim taim stret long danis na oi i malolo na kisim win.




• Boiros i patrol long niu yia nait na em kisim taim long moning na silip i stap.



• Kisim patna bilong yu na mekimsave long plua.



• As i muv i kam na go imekim dispela nait i kamap stret long niu yia stret. Musik em non stop.



• Tupela i mekimsave long danis long Lamana long Niu yia de stret.



• Tulait i bruk niu yia Sarere long Lamana pati i on yet.



• Sampela of lain i selebretim niu yia long Lamana.



• Oi skwad bilong Nicky Bernard bilong Lepwing Draiv tu i selebretim niu yia.



• Oi staff bilong Junction i wok hat tru long niu yia nait na sanap malolo.



**Bisnis bilong Groim Diwai
insait long PNG
- Planim samting insait
long renfores eria**

Tok i go pas

Insait long olgeta eria we ol i statim fores menesmen, wanpela long ol bikpela samting i kamap em long traim na senisim ol tru tru fores we i gat kain kain diwai i go long ol fores we olgeta diwai i stap long wankain mak. Dispela i save kamap long taim bilong planim diwai. Dispela we i nogat bikpela hatwok, tasol i gat hevi bilong em tu.

Wok bilong makim diwai, saplai bilong pikinini diwai, neseri na teknik o we bilong planim, daunim ol gras nogut, bagarap ol binatang na kain kain musmus bilong diwai i save kamapim na manimak bilong dispela kain wok i sampela samting we i ken kamapim hevi. Maski ol renfores long planti kantri i bin bikpela tumas, mani bilong planim diwai i gat mak bilong em, olsem na liklik hap eria bilong fores tasol i ken senis i go kamap plantesen.

Long narapela sait, we bilong groim bek ol bus na sayor i no inap wok olgeta taim insait long ol renfores eria.

Long sampela hap we ol i daunim bikpela hap fores bilong mekim wok agrikalsa na gaden,

bai ples i mas sindaun long taim tru pastaim long ol bus na sayor long ol dispela hap wantaim ol pikinini diwai i groa bek gen. Sapos yu planim ol pikinini diwai, yu bai inap long hariapim groa bilong ol diwai.

Long ol arapela hap ol strongpela na gutpela diwai we i ken kisim bikpela mani i no save groa planti olsem ol bikpela diwai na pikinini diwai tu. Dispela taim, i mobeta long planim ol dispela strongpela diwai yu yet. Dispela rot em i stap namel long kamapim plantesen na menesim netserel fores.

Taim namba bilong ol manmeri insait long kantri i wok long go antap, i mas i gat moa graun bilong wok agrikalsa, na forestri nau i mas yusim gut graun. We ol i makim ol fores bilong katim timba tasol, ol i mas traim na kisim bikpela hap timba long en. Long sait bilong namba bilong ol diwai bilong salim, ol plantesen i ken katim planti diwai moa long ol netserel fores.

***Neks wik - Stori bilong
planim ol diwai spisis insait
long renfores.**

McCARTHY & ASSOCIATES (FORESTRY) PTY. LTD.
National & International Forest Consultants
mccaf@datec.net.pg

"Long kisim tok stia long olgeta wok"



Kaikai tru...Gavman i lukluk moa long agrikalsa na helpim ol manmeri long kamapim gutpela sindaun bilong ol yet.

Foto: PAUL ZUVANI

RDB kisim K58 milien long Siune

Maisan Pahun i raitim

MINISTA bilong Agrikalsa na Laipstok Matthew Siune i bin tokaut long ol nupela bod bilong Rural Development Bank (RDB) na tu amamas long K58 million we Nesenel Gavman i bin givim i go long kirapim na kamapim wok bilong RDB long helpim ol grasruts.

Mista Siune i bin tok tenkyu i go long Prais Minista Sir Michael Somare na Nesenel Eksekutiv Kaunsel (NEC) long kirapim bek na stretim RDB. NEC i bin tok orait long givim RDB K58 milien long helpim na kirapim bek benk we i ken helpim ol grasrut long kirapim liklik bisnis.

Dispela mani em bilong helpim wok na tingting bilong Gavman long 'Green Revolution Policy' we Sir Michael i bin kirapim long helpim ol lain long ples kirapim gaden bisnis.

RDB i bin bungim taim nogut bihain long planti dinau i kamap na ol manmeri husat i dinau i no bin bekim. Klostu long K160 milien i bin lus long dispela dinau mani. Nau yet olsem K7 milien dinau mani tasol i kam bek gen long benk bihain long wanpela komiti i bin wok hat tru long kirapim bek RDB. Dispela komiti i bin wok aninit long Masket langalio na menesmen bilong RDB long stretim gut ron bilong benk.

Bihain long ol dispela wok painimaut komiti i bin mekim, NEC i bin makim 8-pela nupela bod memba long ronim RDB.

Ol dispela nupela bod memba bilong RDB em

William Lamur olsem siman na Ricky Mitio olsem deputi siaman. Ol narapela memba em Nick Thompson, Matthew Kanua, Simon Tosali, Peter Kuman, Ray Clark na Richard Maru.

Ol dispela memba i kam long wanwan indastri insait long kantri na Mista Siune i bilip strong olsem bai ol i ken ronim gut RDB long ol yia i kam.

NEC i bin tokim ol dispela memba olsem ol i mas kamapim wanpela 14 mun kirapim bek pleni bilong RDB long pinis bilong mun Mas long dispela yia.

Gavman, long taim ol i bin kisim pawa, i bin tok olsem ol bai lukluk moa long developim agrikalsa.

Dispela em bikos agrikalsa em i wanpela sustenebel indastri, o wanpela indastri we i ken i stap longpela taim.

Tru olsem prais bilong ol komesel krop o ol gaden kaikai we ol fama i ken salim long kisim mani long ol maket hia long kantri na ovasis tu i save go antap na i kam daun, tasol ol kaikai yet i no save pinis, olsem gol, o kopa o wel.

Gavman i skelim olsem dispela i gutpela long developim bikos em bai helpim sindaun bilong ol manmeri na tu strongim ikonomi bilong kantri.

Planti kain toktok i bin kamap taim RDB i no bin ron gut bikos ol fama i no bin inap long kisim helpim long dispela benk.

Nau Gavman i kirapim bek gen, ating bai i gat sampela moa gutpela senis long agrikalsa indastri na sindaun bilong planti ol manmeri bilong kantri.



BANK OF PAPUA NEW GUINEA

PRESS RELEASE

KINA FACILITY RATE FOR JANUARY 2005

The public is advised that based on the assessment of key macroeconomic indicators available to the Bank of Papua New Guinea, the Kina Facility Rate (KFR) will remain unchanged at 7.00 percent for the month of January 2005.

Benny Popoitai, MBE
Acting Governor

Tok pilai wantaim Kanage olgeta wik!!

Ol tru tru poro o wantok bilong gutpela raitman Kanage i laikim tru sapos yupela i ken salim sampela tokpilai bilong yupela i kam na mipela putim long tok pilai kona bilong Kanage. Salim i kam long TOK PILAI KANAGE P.O. Box 1982, Boroko NCD o kam long opis klostu long BSP Waigani na neksdua long Mondo Sekanhan klos stua. Mipela stap long las opis. Sapatim raitman bilong yumi Kanage!!



Kanage em bilong MK long Maramb yet long Kimil-Banz. Ol MK i save kolim em Tulboks.

Em i bin spak long wanpela Mande i go Tunde na Trinde em i pilim sik long bel bilong em.

Isi tasol em i wokabaut olsem wanpela pato i nogat gras long beksait na i go long Kimil haus sik. Dokta boi ya i lukim Tulboks na askim em wanpela kwesten olsem 'ei pato olsem wanem long yu?'

Baga ya kirap tok olsem. Dokta Kanani mi spak tu deis na mi sik dambilo i go olgeta long andap na sindaun i bagarap.

Dokta save pinis so em i givim sut na ol meri sik marasin long Kanage Tulboks bilong MK. Tulboks dis i go pinis long Kimil snoka ples.

MATT DEDEBOH HOLEYAH BANZ WESTEN HAILENS PROVINS

Sarere na Kanage kirap long bikmoning tru na em i go waswas. I no longtaim Apo gentolmen, kamap opis man bilong Degii kona.

Bikmoning tu na ol manmeri kaikai buai, smok i stap long Gorobe market na ol lukim Kanage sanap i stap na ol askim em. 'Kanage, Sarere na yu laik go we?' Kanage hapman bilong toktok tu ya.

'Mi go luk fo wait ken, six peks kumu garas ya' Ol manmeri harim dispelana trautim buai, smok na ankonses nating nating na laip dai long hap.

Apinun nau na liklik bikman Kanage wom ap wantaim 12 peks wait ken, 6 peks SP na 1 pek kumu gras. Man, Apo dring dai pundaun kirap na em i putim trai leit wan tru long danis.

Danis pinis nao na Kanage i wokabaut isi isi i kam autsait wantaim ol pren meri na yu no wat, em i kamap ekting biksot long ai bilong ol poro bilong em.

Hatim bel wan stret. Wokabaut wantaim ol meri i stail moa stret. I no long taim liklik long baksait, traipela bikpela han pas long pes

na turangu pundaun apsait daun na kauntim sta.

FORATSCO BEGUSA POT MOSBI NCD

Kanage em bilong Tari na em save wok wantaim siti kaunsol long Pot Mosbi.

Wanpela fotnait Fraide, Kanage i lus go daun long Kawa Klab long holim wanwan. Boi em apim tupela pinis na go bek kisim 5-pela na putim antap long tabol.

Sem taim feiveret musik bilong em i pairap na boi i tromoi lek isi isi bihainim bit bilong musik. I no long taim filings kisim em na em stat singsing na danis na olgeta man i tromoi ai i kam long em wan i kilim tru i stap.

Taim musik i pinis, kwik taim em i cruz i go bek long tabol bilong em long dring.

Taim em i opim wanpela, em i kirap nogut long lukim olsem wanpela i lus.

Boi i belhat nogut tru na stat askim ol man tasol nogat man i bisi long harim em bikos tok pisin bilong em i no klia tumas.

Boi i lukim olsem na em bikmaus

na tok, 'I bot five bodols en put it on the table, who took wan en left for, I said mi tok.'

Na olgeta man i lap dai long Kanage taim ol i harim inglis bilong em. Tasol Kanage i no bisi, em i belhat tru na tekov.

NOPO PARA RAINBOW ESTATE NCD

Kanage em wanpela ragbi sta long Gahuku Lig long Goroka. Olgeta manmeri ol luksave olsem em man bilong tanim toktok.

Wanpela Sande em pilai pinis na em laik go long haus tasol ol pilai meits bilong em tok bai ol i go long maket pastaim.

Olsem na ol pulim lain i go long maket ples. Ol poro bilong Kanage i gat ol koins tasol Kanage em i gat K2 note long poket wantaim tripela paket kondom.

Kanage em wokabaut i go long maket na lukim wanpela naispela gel i salim pinat na Kanage lukim pinis tasol em giaman olsem em i no lukim.

Em abrusim em na i go daun na em kambek long baksait na askim

yangpela gel olsem 'hamas long 20t pinat?'

Na gel ya em smail na Kanage tu i smail na tok nais wan ya hamas long 20t pinat bilong yu na gel tok 20t. Na Kanage tok em bikpela mani tumas putim i go daun long liklik mani olsem 50t.

Tok pilai pinis na Kanage kisim pinat long K1.60 na instead long kisim K2 abrus na em givim paket kondom long tok givim mi 40t senis.

Trangu yangpela gel ya em sem long kisim dispela kondom na luk-luk long han bilong Kanage na Kanage tok hei yu kisim na givim mi senis.

Mi laik go ya na gel ya tok 'kondom bilong mekim wanem samt-ing?' Na Kanage lukim long han bilong em na em lukim kondom na em sem pipia stret na tok darling mi no minim so plis wanbel na tingting bilong yu salim i kam na bai mi salim wanbel na tingting bilong mi i go na em bai right olgeta.

WASKA NOEL GOROKA ISTEEN HAILENS PROVINS

TOK PILAI wantaim KANAGE



SALIM OL TOK PILAI BILONG YU I KAM NA BAI MI PUTIM INSAIT LONG DISPELA PESI

KANAGE SPAK LONG FRAIDE NA LONG 12 KILOK MIDNAIT BAI NIUYIA...

Hic! BRO! BAI YUMI BOM LONG 12 MIDNAIT STRET!

EM NAU! BAI YUMI KONKAIT STRET!

12 KILOK LONG BIKNAIT STRET OL MANMERI I AMAMASIM NIUYIA...

HEPI NIU HEPI NIUYIAA!! YIAA!!



KANAGE LUKIM TRAIPELA FAIAWOKS LONG ROT NA EM SINGAUT...

AIYOO!! LUKIM TRAIPELA FAIAWOKS KLOSTU TASOL LONG ROT YAH!! RAIT OLGETA!!




TUPELA LUSIM HAUS NA RON I GO DAUN LONG SEKIM HUSAT I PAIRAPIM OL FAIAWOKS I STAP...

EM MAS OL AUSTRALIA I KAM NA PAIRAPIM OL FAIAWOKS KLOSTU LONG ROT!!



TASOL NOGAT, TAIM OL I GO KLOSTU, OL I LUKIM OLSEM PAWALAIN LONG ROT I PAIA NA OL SPAKS WOK LONG SUT I KAMAUT I STAP...

MI NO INAP BILIP TRU. YAH!






•PNG Swimming sempion na Olimpik pilaia Ryan Pini bipo long em i go long Australia long tumoro i kam long Wantok opis aste na kisim piksa wantaim ol wokmanmeri. Fran long lep han em jenerol menesa Justin Kili na long raif han em atis Jada Wilson. POTO: NEVILLE CHOI



•9 Mail Morobe Blok soka wantaim Joe Ivaharia



•Pot Mosbi soka

Sarere 8 Januari, 2005

Venue	R5	A Gret	(De 2)	Taim	Mat/Stumps	Umpires
Amini	OS Hoods	vs	Dogura	10:00am	Hoods (Assn)	Raka Ipi/Hale Ginate
Colts	Mobil Steamships	vs	BNG Poreporena	10:00am	M/STC (Assn)	David John/Lakani Oala
R11 B Gret (40 overs)						
STC	Raukele	vs	OS Hoods	12:30	Raukele	Tony Alu
Nomads	Aussie HiCom	vs	Pari	12:30	AHC	Maru Hobart
MB	TST Coasters	vs	KCC	12:30	Coasters	Sinaka Kila
HMS2	Chubb United	vs	BNG Poreporena	12:30	United	Kila Iga
R11 Anda 19 (30 overs)						
STC	Raukele	vs	KCC	8:10	Raukele	Chris Alu
HMS2	Chubb United	vs	BNG Poreporena	8:10	United	Kila Iga
R10 Anda 17 (25 overs) (Stumps Only - Mat Optional)						
MB	Kempa	vs	Lamana Mariners	8:10	Mariners	Koupa Kila
KCC	KCC	vs	Pari	8:10	KCC	Arutu Goasa
R10 Anda 15 (20 overs) (Stumps Only - Mat Optional)						
Rules	Raukele	vs	Chubb United	9:00	Raukele	Walo Charlie
Rules	KCC	vs	OS Hoods	12:30	Hoods	Walo Charlie
R10 Meri (25 overs) (Stumps Only - Mat Optional)						
KCC	KCC	vs	Dogura	12:30	KCC	Arutu Goasa

Sande 9 Januari, 2005 De 2

Venue	R5	A Gret	Taim	Mat/Stumps	Umpires
Amini	Lamana Mariners	vs	Raukele	10:00am	Raukele (Assn) Herea Pegi/Hale Ginate
Colts	Chubb United	vs	TST Coasters	10:00am	Coasters (Assn) rakalipi/Clive Elly
R11 B Gret (40 overs)					
STC	Mobil Steamships	vs	PB Cheung	12:30	M/STC Peter Moide
Nomads	Curries	vs	Dogura	12:30	Curries Ralavu Rai
MB	Kempa	vs	Lamana Mariners	12:30	Kempa Ralavu Rai
R11 Anda 19 (30 overs)					
STC	Mobil Steamships	vs	Lamana Mariners	8:10	M/STC Kila Nouairi
MB	Kempa	vs	Dogura	8:10	Kempa Wari Kila
R10 Anda 17 (25 overs) (Stumps Only - Mat Optional)					
Nomads	Mobil Steamships	vs	BNG Poreporena	8:10	PCC Mahuta Kivung
HMS2	Chubb United	vs	Raukele	8:10	United Sinaka Kila
R10 Anda 15 (20 overs) (Stumps Only - Mat Optional)					
Rules	Lamana Mariners	vs	Pari	8:00	Pari Arutu Goasa
Rules	TST Coasters	vs	BNG Poreporena	11:00	Coasters Arutu Goasa
R10 Meri (25 overs) (Stumps Only - Mat Optional)					
Rules	TST Coasters	vs	BNG Poreporena	2:00	Coasters Arutu Goasa
HMS2	Chubb United	vs	Lamana Mariners	12:30	United Sinaka Kila

Bai: Anda 15 Dogura

Notes: 1) Umpires: Club captains to make alternate arrangements if the appointed Umpire is not in attendance. 2) Umpires to declare the winner, must print their names in the scorebook as well as sign the book. 3) Both Scorebooks to be completed with names of batsmen, bowlers, catches, wicket-keepers, DNBs and the winner declared. Penalty: one point. 4) A further penalty of two (2) competition points for failure to hand in your scorebook to Tony Elly's residence at Hohola by 7pm after the match. 5) 'A' Grade Rounds 9 & 10 One Day matches were cancelled & will not be rescheduled. FINALS as Scheduled on 12, 13 Feb6) Women draw as per notice

Sariti Kriket pilai long Pasifik

SUVA, Fiji Ailan: Ol rijinol television stesin i wok wantaim long soim wanpela sariti kriket pilai we bai kamap namel long Australia na Wol long Melbourne Kriket Graun long narapela wik Mande.

Fiji TV i kisim laisens long soim olgeta bilong dispela pilai na dispela piksa bai kamap long Tonga, Samoa, Amerika Samoa, Cook Ailan na Niue.

"Mipela i bin askim olgeta teritori long mekim ofa bilong ol long raits na kos bilong setelait. Olgeta mani (ol i kisim) bai go long Intenesenei Kriket Kaunsel long helpim dispela sori pasin," Fiji TV CEO Ken Clark i tok.

Fiji TV ma sista EMTV PNG i tok orait wantaim long soim dispela pilai laiv na givim olgeta mani i go long PNG na Fiji Red Cross.

"Tupela stesin wantaim i mekim dispela na mipela i amamas olsem mipela i sapatim dispela gutpela tingting long wei bilong mipela," Clark i tok.

Olota Rokovunisei, siaman bilong Fiji TV Bod i tok: "I gat tingting olsem kain samting bai kamap yet long bihain taim long lukim olsem yumi i wok bung wantaim. Em long kain prosek olsem ol television wokman na meri i ken wok bung wantaim na givim i go bek long ol komyniti.

Fiji TV i tok olsem em bai rausim SKY Entertainment, Hindi pilai sanel long soim

dispela pilai laiv. "Tru tru dispela i min olsem Sky Entertainment bai kamap olsem Fiji 1 long liklik taim long Jenuari, 10," Clark i tok.

Ol lain husat i stap long Viti Levu (wanpela bikpela ailan bilong Fiji) husat i nogat Sky bai mas tanim television bilong ol i go long Sky Entertainment long sampela taim namel long Jenuari 10.

Long wankain taim ol arapela ailan long Fiji na ailan teritori bai mas askim ol tokel TV stesin bilong ol long save moa.

"...Mipela i amamas tru olsem mipela i sapatim dispela gutpela tingting."



•Oltaim kanu Kotawin bilong ples Kapari bilong Marshall Lagoon, Sentral provins i stilim so taim em winim Niu Yia Wari Vele Kap. Papa na kepten bilong kanu Rai Alu i kisim tropi wantaim K2000 prais mani.



•Praivet Kampani netbol eksen long Rita Flynn Kot.



Molik laik lainim Krajicek long pilai

AUSTRALIA namba wan tenis pilaia Alicia Molik i tok em i laik lainim yangpela Dutch o Holan pilaia Michaela Krajicek na pinisim em long pilai we tupela i bin holim long aste nait.

Dispela toktok em Molik i mekim aste.

Molik i helpim gut Australia long winim namba wan pilai bilong ol long Hopman Kap taim em i bung wantaim Mark Philippoussis long winim Slovak pilaia.

Krajicek i namba wan 2004 yut pilaia tasol Molik i tok em bai mas lainim yet Krajicek long wanem samting tru em i pawa tenis.

Krajicek i hap-susa bilong Richard Krajicek husat i winim 1996 Wimbledon taitol.

Krajicek i winim namba wan pilai bilong em taim em i autim isi tiket bilong Zimbabwe pilaia Cara Black long Perth.


Black husat i gat 15pela krismas i bin pait hat strong tu taim em i pilai wantaim meri Amerika tasol i lus aste.

"Em i wanpela gutpela, yangpela pilaia. Em i nupela pilaia na em i save paitim ol gutpela bal," Molik i tok.

"Tasol em bai narapela kain long wanem samting Cara (Black) i givim em. Cara na mi i stap long tupela narapela narapela hap. Cara i save pilaim difensiv gem na mi save pilai wantaim hat.

"Em i save mekim ol gutpela sot tasol wanem samting mi bai mekim em long go tasol na givim long em stret. Mi no ting em i bin lukim wanpela hevi pilai, na olsem mi bai bungim olgeta samting na givim long em na lukim wanem samting bai kamap.

Na wantaim Philippoussis we tupela i



• Alicia Molik na Mark Philippoussis i karamapim olgeta ples long kot long dabo! pilai bilong tupela long Mande wantaim ol Slovak.

pilai egensim ol Slovak Molik i tok: "Em i hatpela pilai tru.

"Mipela i no bin pilai wantaim bipo na long mipela i miks na pilaim dabol gem dispela em i bikpela samting we em bai givim strong long mitupela long ol pilai bilong mitupela long Trinde (aste nait).

Long dispela tonamen ol pilaia bilong Rasia i sempion we ol bin pilaim Argentina aste. Tupela pilaia bilong Rasia em Marat Safin na Anastasia Myskina i bin lus long namba wan pilai bilong ol long Jemani long Mande.

Na Philippoussis i surikim ol trening

bilong em i go antap we em i laik long mekim gut long ol pilai.

Em i tok long pilai dabol wantaim Molik dispela em i no pilaipilai samting.

"Long ol dabol mi mekim," em i tok. "Long singel mi no amamas long dispela. Mi bin hat na olsem em i no gutpela.

"Mi gat nau (aste) long malolo long mekim sampela praktis na redim mi yet long pilai bilong Trinde.

"Sapos i gat sot kat mi bai kisim pinis," em i tok long nau olsem pilai bilong em i wok long kamap orait bihain long ol taim i go pinis we em i no bin pilai gut.

Cole i sevim Chelsea

WANPELA gol i kam long Joe Cole i helpim Chelsea long winim 8 taim Inglan primia soka sempion Liverpool 1-0 long pilai Anfield pilai graun long wiken.

Dispela win bilong Chelsea i mekim em i stap yet long namba wan ples long dispela kompetisen we em i gat 5-pela poin longwe long namba tu tim i stap bihain long em.

Na long dispela taim tu Arsenal husat i stap long namba tu ples i nekim Charlton 3-1 long stap yet long namba tu ples.

Cole em i wanpela senis pilaia na em i pairapim dispela bal long 18 mita mak i go insait long umben bilong Liverpool long 80 minit long taim em i go insait long pilai.

Pastaim long bal i go insait em i bin pas long Liverpool fulbek Jamie Carragher na bihain i go insait.

Sapos ol samting i go gut dispela bai i namba wan taim bilong Chelsea long kisim primiasip taitol bihain long 50 yia.

"Mipela i win bikos long gutpela difens na bikos mipela i laki liklik," Chelsea menesa Jose Mourinho i tok. "Dro ating bai i luk moa gutpela.

Chelsea i gat 52 poin we ol i winim 21 pilai long ol 28 pilai ol i kamap long ol. Arsenal i gat 47 poin, Manchester United 43 na Everton 40.

Long wiken tu United i winim Middlesbrough 2-0 na Everton i lus long Tottenham 5-2.

Long ol narapela pilai las tim West Brom i dro wantaim Bolton 1-1, Southampton i lus long Manchester City 2-1, Newcastle i winim Birmingham 2-1 na Aston Villa i winim Blackburn 1-0. Fulham i winim Crystal Palace 3-1 na Norwich i dro wantaim Portsmouth 1-1.

Liverpool husat i abrusim olgeta nara-



• John Arne Riise (kepten) i amamas wantaim ol wan pilaia bilong em bihain long em i skoaim gol egensim Luis Garcia long pastaim pilai bilong ol. POTO NA STORI I KAM LONG SYDNEY MORNING HERALD.

pela tim long holim rekot long winim 18 pela primiasip taitol i lus long Chelsea we ol i gat sans long dro taim ol i mas kisim wanpela penolti kik tasol dispela i bin kamap bihain long refri Mike Riley i ting olsem bal i pas long han bilong Chelsea midfil pilaia Tiago em Tiago i no min long holim. Na olsem dispela fri kik i go nating.

Tasol Liverpool i gat narapela gutpela sans we Djimi Traore i sutim i go stret long umben bilong Chelsea tasol gutpela han bilong Chelsea gol kipa Petr Cech i pasim bal na olsem Liverpool i no lukim gol.

Long wankain taim Arjen Roben na Tiago i traim hat long skoa long sait bilong

Chelsea. Long dispela pilai Xabi Alonso bilong Liverpool i kisim bagarap long lek bilong em long namba wan hap yet.

Cole husat i skorim gol long taim Liverpool i go pilai long hap bilong ol long pastaim pilai bilong tupela long Oktoba i tok em i hop dispela ol gol bilong em bai mekim em i mekim gutpela nem bilong em wantaim tim.

"Bai mi traim mekim gut olgeta taim long ol pilai bilong mi," Cole i tok.

"Mipela i save olsem kamapim gutpela pilai long stat bilong yia i gutpela mak long resis long sempionsip.

Tripela pilaia bai stap long sori pilai

TRIPELA Wes Indies pilaia Brian Lara, Chris Gayle na Dwayne Bravo i kisim tok orait long stap long sori pilai we bai kamap namel long Wol XI tim na Esia XI tim long dispela wik Mande long Melbourne Kriket Graun.

Dispela sori pilai em bilong givim mani long ol turangu manmeri na pikinini long Esia husat i kisim bagarap long bikpela solwara o sunami we i kilim klostu 130,000 manmeri.

Pastaim Wes Indies tim menesmen i bin tingting planti sapos dispela tripela pilaia i mas pilai tasol bihain ol i givim tok orait long ol i go het na pilai.

Menesmen i bin tingting planti long wanem ol i no laik bai dispela tripela man wantaim narapela 11pela pilaia long Wes Indies i kisim bagarap bipo long truru soris pilai bilong ol wantaim Australia long dispela taim.

Mausman bilong Wes Indies tim i tok olsem kosa Bennett King na menesa Tony Howard i givim tok orait long betman Lara na Gayle na olraunda Bravo long stap long dispela pilai we planti samting bai kamap long em.

Ol Wes Indies i kisim namba wan trening bilong ol long Junction Oval na i luk redi tasol long kamap long dispela traim pilai long painimaut strong bilong ol.

Dispela traim pilai i stap namel long ol na Viktoria long Melbourne Kriket Graun (MCG) long aste nait. Dispela pepa i go insait printing long dispela taim na olsem i no inap givim skoa o risalt bilong dispela pilai.

Pastaim long pilai i gat tok olsem ol Bushrangers bai kamapim wanpela strongpela sait wantaim pesman Shane Harwood husat i kisim malolo sampela taim na kam bek bihain long bagarap em i kisim long wicket bilong em.

Harwood i kisim bagarap taim em i kisim wanpela bal long Westen Australia pilaia long Pura Kap long stat bilong Disemba. Tasol nau olsem em i kam bek em bai pilai gut wantaim poroman bilong em Michael Lewis wantaim nupela bal.

All raunda Nick Jewell i stap tu long dispela sait we bai pilai namba tu pilai bilong Viktoria XI na long dispela taim boula Brad Knowles na Ian Hewett bai kisim malolo.

Aste nait ol Wes Indies i pilai wantaim Viktoria na long dispela Sarere na Sande (8 na 9 Jenuari) ol bai pilai wantaim Australia A long Hobart, Tasmania na long 14 Jenuari ol bai statim traiengula wanpela-de siris wantaim Australia long MCG.

Sait bilong Wes Indies em: Brian Lara (kepten), Chris Gayle, Wevill Hinds, Ramnaresh Sarwan, Shivnarine Chanderpaul, Dwayne Bravo, Ryan Hinds, Courtney Browne, Pedro Collins, Ian Bradshaw na Mervyn Dillon.

Sait bilong Viktoria em: Cameron White (kepten), Matthew Elliot, Jonathan Moss, Brad Hodg, David Hussey, Graeme Rummans, Tim Welsford, Nick Jewell, Ian Harvey, Adma Crosthwaite, Shane Harwood na Michael Lewis.

Ierodiaconou laik stap gut

LYDIA Ierodiaconou i gat niu tok promis tasol, stap strong na noken gat sik.

Dispela 22-yia fristail erial ski na namba tu wol sempion bihain long wantok Australia pilaia bilong em Alisa Camplin, i laik mekim gut long 2005.

Camplin i kamap namba wan na winim Olimpik gol medol. Na long Ierodiaconou em i laik redim em yet long long go insait long 2006 Winta Olimpik Gem long Turin, Itali wantaim gutpela tingting. Tasol toktok long karamapim yu yet long koton na skii i isi long tok tasol em i hat taim yu mekim samting tru.

Statim pilai taim yu kalap 9pela mita i go antap na tanim tanim wantaim na pundaun long sait bilong maunten i no isipela samting long mekim. Pilaia sapos i no was i ken kisim bagarap isi.

Meri Mount Buller i kisim bagarap pinis long patella tendonitis long rait skru bilong em na olsem olgeta taim em bai mas putim was long em i no ken kisim bagarap long dispela hap gen.

"Em i save pen tripela taim yu kalap na mekim, nois long bodi bilong yu," Ierodiaconou i tok. "Em i pilim olsem naip i go insait long skru bilong yu long taim yu pundaun long graun bihain long yu kalap tri mita i go antap. Dispela bai i no inap long helpim. I gutpela sapos yu bam tasol.

Ierodiaconou husat i amamasim namba wan krismas bilong em long ples, Australia bihain long faipela sisen (faipela yia) i lusim kantri gen long las Tunde na go long Montreal, Kanada.

Kikboksing Krismas

Andrew Molen i stori long samting em i lainim long 2004 Krismas kikboksing kem bilong em long wanpela ples long Sentral provins ausait long Pot Mosbi siti.

TRIPELA wiken i go pinis Disemba 17- 19, 2004 ol lain bilong Nandex Muay Thai Kikboksing kKlab long Pot Mosbi i pasim klab na i go kem long sampela hap bus bilong Tubuserea, Sentral provins.

I gutpela kem we planti samting em mipela i lainim long en. Sampela samting em mi lainim long en em:

Mi lainim pasin bilong wok bung wantaim olsem wanpela tim. Long spots ol i save tok tim spirit na kain kem olsem i helpim long strongim dispela. Wanpela i helpim narapela taim em i no mekim samting stret na mipela yet i kuk, stretim bet na wasim ol samting bilong mipela yet.

Dispela kikboksing kem i bin wanpela gutpela ekspiriens long mi na planti ol narapela lain i kam wantaim mipela. Mipela i no stap trening na malolo tasol, nogat.

Mipela i raun long ples na lukim tu na save long sindaun bilong ol pipel long hap. Mipela i go lukim we ol i save waswas, wokim gaden na wanem kain ol animol ol i lukautim.

Sampela i toktok planti long i nogat wara bilong waswas na sampela i toktok long planti taim i nogat lait tasol mi ting dispela wanpela narapela samting tu mi lainim long em we yumi i mas lainim long stap wantaim bilong wanem i no olgeta ples i gat pawa na wara tu em wanpela samting yumi i mas lukautim gu tu.

Dispela trening kem i bin gutpela fru na em bai gutpela sapos mipela i kisim dispela kain kem planti taim. Ol sampela teknik we mipela i lainim long trening taim olgeta wik em mipela i lainim long hap. Na tu long siti we mipela i stap wok, skul na mekim ol narapela samting, i save gat planti samting i distebim o bagarapim tingting bilong mipela long pas strong long trening tasol long kemp, i nogat wanpela samting na olgeta tingting bilong mipela i stap long tren gut tasol.

Mipela i no tren tasol. I bin gat taim we mipela i save sindaun isi na malolo tasol na stap. Taim mi no bisi long kem mi save sindaun na tingting long laip bilong mi na kikboksing pilai bilong mi.

Mi painim olsem bodi bilong mi i no tait turnas olsem taim mi go long wok o raun na kam bek long haus. Mi pulim win gut bilong kantri sait na nogat nois bilong ka o ol masin i bagarapim tingting bilong mi na dispela i gutpela tru.

Mi tingting tu long dispela spot na taim mi lukim ol sinia paitman olsem



• **Andrew Molen**, husat i raitim dispela stori, i wanpela sumatin bilong Nandex Kikboksing Skul.

Gabbie Yura na Stanley Nandex wanpela tingting tasol i save kamap long het bilong mi; "Mi bai i kamap nambawan."

Mipela i go kamap long Mirigini Trening Senta long Magi Haiwe long Fraide apinun na namba wan salens Nandex i putim long mipela em long ron i go antap long wanpela longpela maunten, go daun long narapela sait na ron i kam bek long ples mipela i stat long en. Bihain long mipela i kamap, mipela raun lukim ples na Nandex i soim maunten mipela bai resis long em.

Bik moning long Sarere mipela i go sanap long as bilong maunten na taim Nandex i singaut "Go," olgeta i givim siksti i go antap long maunten, tasol long namel lek bilong planti i dai na olsem ol i mas wokabaut. Taim mipela i kam antap long het bilong maunten mipela kisim win pinis na ron kalap wantaim i go daun long hap sait bilong maunten. I nogat rot na mipela i brukim bus tasol inap mipela i kamap long rot bilong ka we i stret na givim siksti i go bek long hap bilong pinis.

Bihain long dispela sampela i tok bel bilong ol i tanim liklik tasol ol i orait.

Mipela i kikai na malolo liklik na bihain kalap long bot na go long wanpela ailan ol i kolim Lion Ailan we i stap abrusim Loloata Ailan. Long hap mipela i waswas na pilai liklik na taim olgeta i kamap nau mipela statim



• **Linstan Andy (lephan), Bensley Yala (namel) na Joe Yabale (rait)** i sampela bilong ol sumatin husat i laik bihainim lek mak bilong Nandex. Foto: ANDREW MOLEN



• **Bensley Yala (lephan)** kisim lek nogut long **Linstan Andy (rait)**. Foto: ANDREW MOLEN

trening long nambis gen.

Mipela trening i go inap avinun na olgeta i angre, nek i drai na strong i pinis. Long dispela taim mipela i malolo na wetim bot inap em i go bel kisim mipela i go bek long bikples.

Long dispela taim Nandex i givim sampela presen long ol sumatin na wanpela bilong ol em, man husat i kam pas long resis bilong mipela i go antap long maunten.

Bik moning long Sande mipela i kirap na redi long trening gen. Ol sinia sumatin i kisim ol samting bilong pait i kam na mipela olgeta i sanap na pait i go i kam.

Bihain long dispela mipela i malolo na pilai nabaut. Mipela i wetim ka inap em i kamap na kisim mipela i kam bek long taun.

"Mipela i amamas tasol long dispela kem na mipela i kisim gutpela taim tru long hia.

"Mipela pulim planti gutpela win na luk fowet long wankain kemp narapela yia," wanpela sumatin na pait meri bilong klab, Anna Hanku i tok.

Long kem stret mipela i ron, i swim long wara na i lainim ol nupela we bilong pait.

Nandex husat i kam bek long mun Novemba, 2004 long wanpela pait bilong em insait long A-1 wol kap salens we em i kam namba tri i tok as bilong dispela trening kem em long bungim olgeta paitmanmeri bilong klab wantaim na lainim na soim sam-

"Mi tingting tu long dispela spot na taim mi lukim ol sinia paitman olsem Gabbie Yura na Stanley Nandex wanpela tingting tasol i save kamap long het bilong mi; 'Mi bai i kamap nambawan'."

pela ol stail we ol i lainim long yia i kam.

"Mi laik lukim hamas samting yupela i lainim pinis na sapos yupela i redi long go pait insait long ring," em i tok.

Long wankain taim dispela bung tu em long amamasim ron bilong skul long 2004 na pasim klab wantaim sampela kain malolo na givim ol stap sarap.

Long kem mipela sumatin i wokim ol strongpela trening long soim wanem samting mipela i lainim long yia i kam na tu em i redim mipela long sampela ol pait we bai i kamap long 2005.

Em i tok em i laik kamapim dispela kain kem olgeta yia na ol lain bilong ol narapela pait olsem Karate na Taekwondo tu i ken i kam joinim.

"Mi ting em i gutpela long yumi wokim dispela long pinis bilong olgeta yia na tu bipo long taim yumi i laik i go pait," Nandex i tok.

PNG Etletik gat planti wok

Paul Zuvani i raitim

PAPUA Niugini Etletik Union (PNGAU) i gat planti ol wok na pilai bilong kamapim long dispela yia.

Namba wan samting em bai mekim em long redim ples long holim Melanesian Sempionsip long Lae namel long mun Mas na Epril, wanpela wik bihain long Ista.

Na Seketeri bilong PNGAU Philip Rehder husat bai kamapim wanpela lokel komiti na bai stap siaman bilong dispela komiti bai go pas long redim ples na ol samting.

Rehder i tok Lae husat i bin holim wanpela sempionsip las yia i lukautim gut ol pilai na olsem ol narapela kantri i makim Lae gen long holim ol pilai long dispela yia.

Na Rehder i tok komiti bilong em i bai moa gutpela ol pilai bilong dispela yia.

Em i tok taim Melanesian Sempionsip i kamap PNGAU bai yusim ol ronmanmeri bilong em long redim ol long 2005 Palau mini-Saut Pasifik Gems, Filipino Open, Wol Sempionsip na Wol Yut Sempionsip long Morocco.

Em i tok Yunion i laik redim gut developmen skwat pilaia bilong em long Filipino Open na olsem dispela Open bai wanpela strongpela pilai na olsem em i gutpela long Yunion na moa yet kos bilong kamap long dispela Open i no dia tumas.

Tasol em i tok long dispela taim ol sinia pilaia bai redim ol yet long Palau mini-Saut Pasifik Gems.

Na long Wol Sempionsip Rehder i tok Yunion i no inap salim planti manmeri i go long Inglan long Jun long redim ol yet long dispela sempionsip long as bilong mani. i nogat inap mani.

"Wanpela meri na wanpela man tasol bai inap kamap long dispela sempionsip," Rehder i tok. "Tasol PNGAU i laik lukim olsem bipo long em i makim tupela pilaia em i laik givim taim long ol pilaia long ol i mas pait hat long winim ples long go.



• PNG U 18 Etletik tim wantaim ol medol bilong ol we ol i bin ron las mun long Osenia Gron Pri na Osenia Sempionsip long Australia.

FAIL POTO

Em i tok long dispela taim bihainim kain ron bilong hedola Mowen Boino, yut 100 mita sprin man Anton Lui na 100m sprin meri Mae Koime ol tasol inap go log dispela pilai. Tasol em i tok nogut dispela i senis bihain long mak em ol etlit bai kamapim long Melanesian Sempionsip.

Ol etlit husat Yunion i makim long go long Wol Sempionsip bai i no inap go long mini-Saut Pasifik Gems long wanem ol bai go stret long Helsinki long dispela sempionsip.

Na long Wol Yut Sempionsip em i tok Yunion i hop namba bilong ol pilaia bilong em nogut bai go antap long kisim tupela ronmanmeri long dispela yia bihain long olgeta yia em i save salim wanpela etlit tasol.

Em i tok long bipo Intenesenel Amata Etletik Federesen (IAAF) i save sponsorim wanpela etlit tasol nau i redi long sponsorim tupela.

Na long wanpela taim IAAF i putim ol kwalifaing taim long ol etlit long winim

dispela ol taim bipo long ol i kamap.

"Tupela Toea Wisil na Andrew Yeweh inap long kamap long dispela ol pilai long wanem tupela i gat strong long kwalifai," Rehder i tok.

Yeweh i kamap long bes taim long 2min 00.88 seken long 800m resis long las Osenia Gron Pri Mit long Cairns long kwalifai we kwalifaing taim i stap long 1min 59 seken.

Na Wisil i kisim taim tasol kamap orait long taim 25.91 seken long 200m resis long Osenia Sempionsip long Townsville we kwalifaing taim i stap long 25.90. Em i kisim silva medol.

Long dispela PNGAU i hop olsem tupela etlit bai i mekim gut yet bipo long 30 Jun, 2005.

Laspela bikpela pilai long kalenda bilong PNGAU em long nesene sempionsip long 23 i go inap 25 Septemba we em bai holim long Lae. Long dispela sempionsip Yunion bai makim skwat bilong 2006 Melbourne Komenwel Gem.

PNG na Tonga laik kamap long Wol Kap

Maisan Pahun i raitim

LONG insait long Pasifik Ailans Tonga i gat nem long pilai ragbi union long Wol.

Stat long las mun na i kam nau long dispela yia Tonga ragbi union tim bai kamap long planti intenesenel pilai long redim em yet long go insait long 2007 Wol Kap pilai.

Nau yet Tonga Ragbi union (TRU) i makim 60 pilaia long stap insait long wanpela tonamen we bai kamap long 8 i go inap long 12 Jenuari. Dispela tonamen bai kisim tasol 30 pilaia we ol bai go pilai raun long Australia na Nu Silan.


Sif Eksekutiv opisa bilong TRU Sakopo Lolohea i tok dispela "Ikale Tah" developmen tim bai go pilaim Auckland Blue's developmen tim long 4 Mas, Nu Saut Wels Akademi tim long 9 Mas, Sidni (Sydney) developmen tim long 13 Mas na las tru Brumby Runners long 19 Mas.

Bihain long dispela raun pilai long Australia na Nu Silan Tonga bai kamapim wanpela fainol tim "Ikale Tah" long 14 Mei. Dispela tim bai i redi long salensim Fiji na Samoa long Tri-Nesens Siris. Long dispela pilai tupela namba wan tim bai go insait long Wol Kap 2007.

Tim i kamap long namba tri ples bai go salensim ol narapela kantri gen long gat sans long pilai long go insait Wol Kap.

Las tupela Wol Kap i go pinis Tonga i bin bihainim kain rot tu na bin go insait long Wol Kap. "Tasol nau mipela i bilip bai mipela i ken winim Fiji na Samoa na go insait long Wol Kap pilai," Tonga kosa Viliami Ofahengaue i tok.

Hia yet long Papua Niugini nesene tim Pukpuk bai pilai insait long Isten Pasifik tonamen we bai salens i kam long kantri



• PNG Pukpuk pilaia (wantaim bal) i laik traime ronowe long Amerika Samoa long wanpela bikpela pilai bilong ol. FAIL POTO

olsem Cook Ailan, Solomon Ailan, Niue, Tahiti na Vanuatu namel long nau na 2006.

PNG Pukpuk tim yet i no inap go insait long wanpela bikpela 15's tonamen long redim em yet long ol dispela Isten Pasifik tonamen tasol bai i gat Supa 4 Salens olsem i bin kamap long mun Oktoba 2004.

Insait long Supa 4 Salens bai ol i kisim ol gutpela plaia bilong kantri i kam long Ailans, Hailans, Sauten na Noten rijon.

"Mipela i makim Supa 4 kompetisen bilong mipela olsem tonamen we bai mipela i makim ol namba wan pilaia long go pilai insait long Wol Kap 2007," mausman bilong PNG Ragbi Union Peter Tsiamalili Jr i tok.

Nau yet PNG Ragbi Union i no save gut sapos em bai pilai insait long wanpela 15s ragbi union intenesenel pilai o nogut.

"Mipela i wetim PNG Ragbi Union pres-

iden Graham Osbourne husat bai go long Niu Silan long 2 Februari Intenesenel Ragbi Union miting i kam bek na givim toksave," Tsiamalili Jr i tok. Ol ragbi union biknem kantri long Saut Pasifik kantri olsem Fiji, Samoa na Tonga bai kamap tu.

Ol kantri olsem olsem Cook Ailans, Niue, Tahiti, Solomon Ailan, Vanuatu na Papua Niugini i stap long Isten Pasifik tim.

Long go insait long Wol Kap 2007 sempion bilong Isten Pasifik tonamen na tim i bin lus long tri-nesen tonamen bai salens. Na wina bilong dispela pilai bai salens wanpela tim bilong Asia long kisim wanpela ples insait long 2007 Ragbi Union Wol Kap.

PNG i bin winim Isten Pasifik Tonamen long las Wol Kap resis tasol i bin lus long Tonga we i lukim Tonga i winim Saut Korea long Asia rijon.

Morata 2 winim fes Stet ov Orijin

Andrew Molen i raitim

MORATA 2 Blues i soim tru kala bilong ol long winim dispela namba wan stet ov orijin gem bilong ol insait long Morata Lig kompetisen long Pot Mosbi wantaim 14-0 skoa egensim Morata 1 Maroons.

Tupela tim wantaim i luk stail tru long ol nupela unifom.

Yes em i bin gutpela tasol trupela kala i bin kamap bihain long pinis bilong pilai.

Ol Maroons wantaim maroon unifom bilong ol i kamaut gutpela pilai wantaim ol hevi fowet bilong ol tasol Blues husat ol i putim wanpela unifom olsem bilong Melbourne Storm i pilai stail moa.

Beklain bilong ol i ronim bal gut na difens bilong ol tu i strong taim ol Maroons i kam klostu long trai lain bilong ol.

Dispela gem i lukim planti stail pilai i kamap na planti biknem pilaia insait long Pot Mosbi taun kompetisen i pilai insait long dispela gem tu.

Ol pilaia olsem Presiden 13 ful-bek Nixon Nagle na faiv-eit na kepten bilong Blues, Kevin Kepas i wok hat tru long tim bilong ol.

Long Maroons sait kepten na wanpilaia bilong kepas long Kone Tigers insait long PRL, Eki Ene i strongim manki bilong em wantaim Allan Titus, Enosi Gewa na Mark Timea.

Wanpela strongpela gem tru i kamap we i lukim wanpela trai tasol i kamap long fes hap we Nagle i skoa long kona bilong ol tasol kik bilong em i abrus na dispela i putim ol i go pas 4-0.

Bihain long hap taim ol Maroons i kam bek strong tasol ol i wokim planti asua long holim gut bal na dispela i lukim ol i lusim planti bal i go long ol Blues.

I no long taim hap bek bilong Blues, Stanley Douglas i skoa na Nagle i i kisim narapeta tu poin long putim ol i go 10-0.

Klostu long ful taim Blues winga Stanley Wakua i putim olgeta billp bilong Maroons i go bihain wantaim trai bilong em long kisim ol i go 14-0.

Gem kodineta John Mauwi i tok amamas long ol pilaia na tu long ol sapota long ol i kamap na sapotim gem na em i tok i gat tupela gem i stap we bai i kamap dispela sande na laspela long narapei wik.

Em i tok tu olsem Lig i gat tingting long makim ol pilaia long dispela salens long go pilai long lpatas Kap bihain long dispela yia na em i singaut long ol gavman bodi, bisnis haus na husat gutpela lain long helpim ol long kompetisen bilong ol.

"Dispela lig i stap moa long 20 yia na nau long strong bilong mipela yet na sapos sampela spon-sa inap long helpim em mipela bai i amamas tasol," em i tok.

Mauwi i tok long taim dispela lig i kirap inap nau ol bighet pasin we ol yangpela manki i sve mekim i no kamap bikpela tumas long wanem tingting bilong ol i stap long pilai na dispela em i wanpela gutpela mak bilong Lig.

Meri Goroka pilai ragbi

James Kila i raitim

GOROKA Ragbi Lig i ples tru bilong ol meri long pilai ragbi lig.

Dispela em i trupela tok long ragbi lig long kantri. Long Goroka na Isten Hailans provins olgeta ol meri i save soim stail na kala bilong ol taim ol i ron insait long pilai graun na pilai.

Ol i no wari sapos Gahuku propa sisen i pinis long wanem ol i givim samsam long ov-sisen lig long Goroka Nesene Pak.

Gahuku ov-sisen lig i bin statim sisen bilong em sampela wik bihain long Goroka Lig i pinisim propa sisen bilong em.

Tasol stat long 2004 gutpela moa kala i kamap long opim ai bilong ol brata husat i save raun nating long "Wol Tred Senta" long Kakaruk Maket na raun nating long taun.

Ol meri Gahuku i taitim bun long resis long lig. Gahuku ov-sisen lig i save kamapim ol strongpela pilai long Isten Hailans provins.

Dispela em long wanem Gahuku ov-sisen i gat nem long kamapim planti ol biknem pilaia husat i go mekim nem long Goroka Lahanis na PNG Kumuls.

Sampela bilong ol dispela biknem pilaia em ol lain olsem Stanley Gene na Makail Aizuwe. Dispela tupela pilai nau i karim nem bilong kantri na pilai long Hull Kingston Rovers long Inglan.

Ol narapela pilaia em Lawrence Goive, Tarzan Malaguna, Fatty Buka na sampela arapela moa.

Tasol bikpela kala em dispela ov-sisen i gat long en em pilai bilong ol meri.

LAE
BISCUIT



WANTOK Spots

LAE
BISCUIT



Redi long Morobe Gems

Yakam Kelo i raitim

MOROBE Provinsal Gavman i putim K200,000 bilong kirapim Morobe Gems we i sut long bungim ol pilaia long 9-pela distrik we bai bungim tu ol pilaia bilong wanwan lokal level gavman insait long ol dispela distrik.

Morobe Gems bai wanpela bikpela spot tonamen insait long provins long kamap long Lae siti long Mas 16 - 20 long dispela yia.

Mak olsem 9-pela distrik insait long Morobe provins bai salim ol tim bilong manmeri long pilai insait long soka, basketbol, volibal, netbol na etletik.

Morobe Provinsal Spot Kodineta Ludwig Peka i tokim Wantok olsem dispela Morobe Gems em bilong ol pipel bilong ples we i bihainim plen na tingting bilong PNG Provinsal Gems long bringim spot i go insait long ol asples long kirapim interes bilong spot na tu kirapim Lokal Level Gavman (LLG) spot tonamen long ol ples. Bihain long dispela LLG gems ol i ken makim distrik skwat long go pilai long provinsal gems. Insait long dispela provin-sel gems bai ol i makim Morobe skwat long ol dispela wanwan spot long go pilai long bikpela nesene tonamen bilong PNG Provinsal Gems long Goroka long dispela yia.

Mista Peka i tok dispela straksa o plen em bilong Morobe na ol Komyuniti Developmen Opisa long wanwan distrik bai i go pas long was long ol gems bilong ol na wok klostu wantaim Distrik Edministreta long lukim LLG gems na distrik gems bilong ol i ron gut bihainim dispela straksa. Ol tu em Progam Menesa bilong dispela tonamen. Mista Peka i tok ol asosiesen husat i memba wantaim ol nesene bodi olsem LFA, Lahi, Makam Distrik Soka, Bulolo na Wau Soka Asosiesen husat i afiliet long PNGFA, Lae Basketbol, Lae Volibol, Huon Volibol, Lae Netbol, Morobe Kantri Netbol, Lahi Netbol na arapela rejista asosiesen olsem i ken salim tasol Anda 23 tim bilong ol long dispela tonamen bilong Morobe Gems. Anda 23 em i olsem developmen skwat bilong ol.

Mista Peka i tok sapos ol dispela rejista asosiesen i salim tim bilong man na meri ol bai peim K400 rejistresen fi. Sapos ol i salim tasol tim bilong man bai fi em K200. Long sait bilong ol distrik tim, ol i mas salim skwat long dispela 5-pela spot olgeta. Na rejistresen fi bilong ol em K500. Tasol sapos ol i salim tasol tupela o tripela skwat long tripela spot tasol orait fi bilong



• Wina bilong Niu Yia Kanu resis long Kapari, Sentral provins, Rai Alu, i sanap wantaim ol sapota na hapim Wari Vele tropi em i kisim long winim resis. Em i winim tu K2000 prais mani. Moa long 20 seiling kanu i kamap long dispela resis.

ol em K300. Mista Peka i tok taim bilong rejistresen fi bai pas long Januari 31, 2005 olsem na olgeta fi i mas go insait long BSP bank, akaun namba em 1000385638 long Lae taun brens. Ol eksen opisa bilong dispela bikpela tonamen em, David Haro - Volutia Media, Aaron Mugalion - soka, Michael Waimba na Gawa Saking - Basketbol, Nathan Keputung na Jason - Volibol, Tom Young na Peter Saleau - Etletik, Rosemary Mase - Netbol, Nane Tomala na Ludwig Peka - Edmin na Fainens, Kitori Posanau na Geo Sam - Edmin na Akauns, Terry Sanga - Sekyuriti, Peter Eae - Sekyuriti na Dokta Chalau - Medikol. Olgeta Komyuniti Developmen Opisa o progam menesa bilong wanwan distrik i mas wok klostu wantaim ol dispela lain long luk-

save long wanem progam na wanwan gems bilong ol na tu long ol arapela sapot bilong tim bilong ol. Peka i tok ol i lukluk long ol pilai graun olsem LFA, Lae Basketbol, stedium na PTC Kolis long holim ol dispela pilai long en. Ol wok i go het yet long toktok na stre-tim wantaim menesmen bilong ol dispela pilai graun. Peka i tok tu olsem dispela tonamen bai i givim gutpela sans tu long ol i yusim ol referi bilong ol distrik bikos Morobe Provinsal Spot opis i bin holim planti referi kos long ol manmeri bilong wanwan distrik pinis na nau em sans long yusim ol. Dispela tu bai givim sans long ol long kisim strong na eksperiens long ranim kain bikpela tonamen long provinsal level. Wankain tu ol yangpela insait long ol distrik husat i bin sindaun pinis long ol menesmen kos long bipo bai gat sans nau long kari-

maut wok bilong ol long menesim ol tim na gems long dispela taim. Dispela bai wanpela bikpela tonamen tru we inap pulim moa long 45 tims olgeta i kam long ol 9-pela distrik. Tasol namba bai i go antap moa wantaim ol tim long ol taun na rejista asosiesen. Peka i tok dispela stail o straksa bilong Morobe Gems i no wankain olsem Morobe Kantri Gems we ol distrik asosiesen i save salim skwat i go long tonamen. Dispela em narakain. Wanwan LLG bai pilai na makim tim long ples yet na bihain kamapim distrik tim long dispela 5-pela spot ol bai pilai long en. Dispela distrik tim bai ol pilaia i kam long wanwan LLG o long ol asples stret. Peka i askim ol Komyuniti Developmen Opisa bilong wanwan distrik long toksave nau long opis bilong em long wanem gem na skwat ol i redim i stap. Morobe i soim rot pinis.

Pini lukluk long narapela gutpela yia

Paul Zuvani i raitim

PAPUA Niugini na Saut Pasifik sempion swima Ryan Pini i laik luklukim narapela gutpela yia.

Dispela 22-yia man husat i stadim Infomesen teknolosi long Yunivesiti ov Ingran long Australia i putim mak bilong PNG long wol mep nau yet i givim pret pinis long ol swima bilong Australia.

Em i tok long dispela yia em bai i no inap mekim planti nois tumas long dispela yia tasol bai kamap isis long ol pilai bilong em.

"Mi bai mekim isi long ol pilai bilong mi long dispela yia," Pini i tok. "Tasol dispela i min olsem wanem ol tren na ol swim mi kisim em bilong strongim mi na long mekim mi redi long 2006 Melbourne Komenwel Gems.

"Long dispela yia bikpela swim bilong mi em long Wol Sempionsip long Kenada long namel bilong yia," em i tok.

Pini husat i mekim wokabaut wantaim Queensland tim long go swim long Saina bihain askim bilong Saina i tok ol swim bilong em i bin gutpela.

Long dispela swim Pini i kamap namba foa long 100 mita bekestrok na namb tu long 100 mita flai.

"Em i gutpela tru mi kam bek long kantri long malolo.

"Na em i gutpela tu long kantri i givim luk-save long mi.

"Mi tok tenk yu long sapot kantri i givim long mi na mi bai traim hat yet long ol pilai bilong mi.

"Mi save i gat planti ol arapela yangpela na ol gutpela swima i stap tu. Sapos ol i traim hat mi bilip i nogat wanpela samting i

ken pasim ol.

"Bikpela samting em long wok hat. Wantaim 2006 Komenwel Gem Pini bai mas redim em yet tu long 2008 Beijing, Saina Olimpik Gems.

I gat ol arapela bikpela ol kos na swim long PNG em Pini i save kamap long ol.

Dispela ol wok na swim em klinik bilong ol swima long Lae na Pot Mosbi em kosa bilong Pini long Australia, Rick Van Der Zant i givim na Marsh Nesene Long Kos Swimming Sempionsip long Pot Mosbi long Septemba.